

मत्तीए ओसरो

चाव था

आव पोस्तोको येसुए उसिस मत्तीए ओसरो ज़। नो मिँ ड़ादा सरकारए उधूँल लिद सिर्मा स्यो-न्या येन ओदोऽयाव (मर्कूस २:१३-१४; लूका ५:२७-३२)। आलाव सर्सिउ पाँ भरी यहूदीरालाई नो ड़ादाकिन 'हुरिऽया' है यालिऽयाव दाऊदए ओथोलाव याराजा ख्रीस, येसुए ओक्याँत ज़ यो-के लिद थ-रैदचासिउ लिऽया। फरी 'स्वर्गताव राज्या जेऽाक ज़ हुद ले' लिद येसुए ओरासथैऽयाव चाव था यहूदीराए जूनी वाज़ माताद, मानुवाताव प्राइँ जातलाव मिँराए याजूनी ब लिऽया लिद सरैःसिउ लिऽया (मत्ती ८:११; १२:२१; २४:१४; २८:१८-२०)।

येसुए ओसाखा पुर्खार

(लूका ३:२३-३८)

१ येसु ख्रीस^१ अब्राहाम सोनो दाऊदनी निथोनी ज़ हुके। नोराए यामिनर आवर ज़,

२ अब्राहामए ओज़ा इसहाक,
इसहाकए ओज़ा याकूब,
याकूबए ओज़ा यहूदा, यहूदाए छुत
ओदाज्यु भाइर मनी याल्यो।

३ यहूदाए ओज्या तामार बातनी दुई
भाइ ताकिनी। तोबोए उमिन
फारेस, तोबोए उमिन जाहेर।

फारेसए ओज़ा हेस्रोन,
हेस्रोनए ओज़ा आराम,

४ आरामए ओज़ा अम्मीनादाब,
अम्मीनादाबए ओज़ा नहसोन,
नहसोनए ओज़ा सल्मोन,

५ सल्मोनए फरी ओज्या राहाबनी
बोअजलाई दैक्यो।

१ १:१ ख्रीसए ओअर्थ — परमेस्वरए खतैद उपरीव मिँ।

- बोअजए मनी ओज्या रूथनी
ओबेदलाई दैक्यो।
ओबेदए ओज़ा यिसै,
६ यिसैए ओज़ा दाऊद राजा।
दाऊदए उरियाए ओज्या बातनी
सोलोमनलाई दैक्यो।
७ सोलोमनए ओज़ा रहबाम,
रहबामए ओज़ा अबिया,
अबियाए ओज़ा आसा,
८ आसाए ओज़ा यहोसापात,
यहोसापातए ओज़ा यहोराम,
यहोरामए ओज़ा उज्जिया,
९ उज्जियाए ओज़ा योताम,
योतामए ओज़ा आहाज,
आहाजए ओज़ा हिजकिया,
१० हिजकियाए ओज़ा मनस्से,
मनस्सेए ओज़ा अमोन,
अमोनए ओज़ा योसिया,
११ योसियाए ओज़ा यकोनियास।
यकोनियासए छुत ओभाइर
मनी याल्यो। नो बेलाक ज़
इस्नाएलीरालाई बेबिलोनदा
क्योःद यारालाँकेर।
१२ बेबिलोनल ज़ यकोनियासए
ओज़ा सालतिएल जर्मिके।
नकिन सालतिएलए ओज़ा
यरूबाबेल,
१३ यरूबाबेलए ओज़ा अबिउद,

- अबिउदए ओज़ा एल्याकीम,
एल्याकीमए ओज़ा आजोर,
१४ आजोरए ओज़ा सादोक,
सादोकए ओज़ा आखिम,
आखिमए ओज़ा एलिउद,
१५ एलिउदए ओज़ा एलाजार,
एलाजारए ओज़ा मत्तान,
मत्तानए ओज़ा याकूब,
१६ याकूबए ओज़ा योसेफ,
योसेफए ओज्या मरियमनी ज़
येसु जर्मिके। नोलाई ज़ ख्रीस
है दोज़्यार।
१७ है जैद अब्राहामकिन दाऊद राजा
पै चौध पिरी ताके। दाऊद राजा-
किन बेबिलोनदा क्योःद यारालाँवक
पै ब चौध पिरी ज़ ताके। नकिन
ख्रीस ओजर्मिउक पै ब चौध पिरी ज़
ताके।

येसु उजर्मिउ

(लूका २:१-७)

- १८ येसु ख्रीस उजर्मिउ इतावनी ज़ —
येसुए ओआमा मरियमलाई भर्जा
योसेफत निद यानैज़्याव। नोनी बिह्या
निमादोद ज़ मरियम परमेस्वरए छैव
उपुरुसनी ज़ा दैन्या ताद उलिज़्याव।
१९ नो मरियमलाई निज़्याव योसेफ
धर्मी मिँ ओतावए मरियम ज़ा दैन्या

ताद उलिज़्याव सैंद ओपाहा भाःद
मायाद अलगज़ा रासो ओपैज़्याव।
२०निताव जैव ओपैज़्याक ज़ तछा
उमँल परमेस्वरए ओचाकज्या हुद, “नँ
दाऊदए ओथोलाव योसेफ, मरियम-
लाई रैन्या ताछेनी। नो उफूलाव ज़ा
ते परमेस्वरए छैंव उपुरूसनिकाव
ची। २१नो ओज़ा खेपा तारिज़्या। नोए
उमिन ‘येसु’† नैदियो, काराव ल्यो
ताकिन नोए उमींरालाई यादोव पापनी
यारास्त्रिज़्याव।”

२२आव भरी परमेस्वरए अगमबक्ता-
लाई सरो उपरींव मिताव ज़ योके।
नोए अइ लिद सर्द ओनैज़्याव,

२३“तोबो कन्या लुज़ा गर्बवती

ताद खेपा ज़ा तोबो

दैरिज़्याव।

होए उमिन इम्मानुएल

नैदयान्या लेर।”

होए ओअर्थ — परमेस्वर गेस ज़

लिज़्या।

२४है जैद योसेफ सैंसिद परमेस्वरए
ओचाकज्याए है ओदोव मिताव
ओज्या मरियमलाई रैक्यो। २५खाली
मरियमए ज़ा ओमादैवा पै निक्याँ
मासदैकिनी। ओदैवत फरी नो
भाउज़ाए उमिन येसु नैदिक्यो।

भाउज़ा येसुलाई खिम्हुव जैंसीर

२ राजा हेरोदए ओपालाक येसु
यहूदिया खन्दलाव बेथलेहेम
नाखारल ज़ जर्मिके। उजर्मिउ छीनी
जैंसीर पुर्ब त०नी यरूसलेमल हुद,
२“जर्मिउ यहूदीराए याराजा काङ्क
उलिज़्याव? नोलाई सरेस्न्या सोरो
पुर्बल गेरेंके। है जैद नोलाई धो
गेदोया लिद हुद गेले,” है यारादोकेर।
३नो पाँ राजा हेरोदए थैद उयुँर आँचा
पाँचा ताके। हिताव ज़ यरूसलेमलाव
लिज़्याव भरी ब राजाए उयुँ स्यासो ज़
ताके। ४है जैद राजा हेरोदए ओदेसलाव
लिज़्याव घेप्पा घेप्पा पुजारीर सोनो
सास्त्री भरी ब दुप्द, “नो धर्मसास्त्रलाव
सर्सिउ ख्रीस जर्मिन्या पो काङ्क
उलिज़्याव?” है लिद यासुधिक्यो।
५नोराए, “यहूदियालाव बेथलेहेमल
ज़ ताव परिन्त्या। अगमबक्ताए ब अइ
लिद सर्द नैव,

६“अ यहूदिया खन्दलाव बेथलेहेम,

नँ यहूदिया भरिलाव घेप्पारानी

नँ नमिन जिम्ज़ा माले।

नँनी ज़ तोबो याडैताव हुद डामीं

इस्त्राएलीराए यार्गे गावला

तान्या ले।”

†१:२१ येसुए ओअर्थ — परमेस्वरए बाँचैसिज़्याव।

१:२३ यसै ७:१४ २:६ मीका ५:२

७ राजा हेरोदए आव भरी थैद जैसीरालाई अलगज़ा खुल्द, “नो सोरो खाक जेरैःव?” है दाद थःरैद, ८ नोरालाई, “बाचिकेदा, नो जर्मिउ भाउज़ालाई बनै चावस खिम्च्यो। जेदैवत डालाई मनी है दाव ताके। डा ब बाद नोलाई धो डादोरिज़्या,” है दाद बेथलेहेमदा यापरीक्यो। ९ नोर राजाए ओपाँ भैःद याबाज़्याक फरी नो पुर्बलाव यारैःव सोरो याड़ा याड़ा बाद नो भाउज़ा जर्मिद उलिज़्याव पोक ज़ अदिके। १० नो सोरोलाई रैःद बनै रेंए रेंए, ११ नो फ़िमल ज़ पसिकेर। नल नो भाउज़ालाई ओआमा मरियमस उलिज़्याव दैद ओड़ाक फुलुप्सिद धो दाद यासुन्दुसर फैद सुनर धुपर बनै चाव चाव यासी डरोर ब चरैःकेर।

१२ हाः बेलाक ज़ तछा यामँल परमेस्वरए, “जे हेरोदए ल्योदा फरी ओल्द ताबाच्यो,” है ओरादोज़्याव रैःकेर। है जैद नोर हेरोदए ओल्योलाव घ्याँ माबाद तँनिकाव घ्याँ यादेसदा ओल्द बाकेर।

भाउज़ा येसुलाई इजिपदा यामोँनाव

१३ नो जैसीर याबाव छीनी तछा योसेफए उमँल मनी परमेस्वरए ओचाकज्या हुद, “नँ सोद हतप्त ज़

भाउज़ा सोनो ओआमालाई लाँद इजिपदा धोःचिके। फरी ‘हुचिके’ है डामादाचिवा पै होड ज़ लिच्यो। हेरोद राजाए नो भाउज़ालाई खिम्द सैःव पैज़्याव,” है दोक्यो।

१४ हाःत ज़ योसेफ सैसिद रील ज़ नो भाउज़ालाई ओआमास इजिपदा निलाँक्यो। १५ हेरोद ओमासिवा पै होड ज़ लिकेर। है जैद नत ज़ परमेस्वरए अगमबक्तालाई सरो उपरीव पाँ योःके। नोए ओसरो आव ज़, “डाज़ा इजिपनी खुल्द रैद डानै।”

हेरोदए भाउज़ा येसुलाई सैःव ओपैव

१६ नो जैसीर याबाव छीनी, ‘जैसीराए ते याछकैनाव ची ओल्यो’ लिन्या सैँद हेरोद बनै रसिद बेथलेहेम सोनो नजीलाव खेपा ताद लिज़्याव भाउज़ार नेरिमकिन मेदाडाव भरी ओपोःस ज़ सैःव यापरीक्यो। नो ओरासैःव, जैसीराए डादा सोरो यारैःव गोडँनी ज़। १७ नत ज़ यर्मिया अगमबक्ताए ओसरो पाँ योःके। नोए ओसरो आव ज़,

१८ “रामाल चिर्लनी बिर्ल थास्ज़्या।

राहेल ओज़ाराए जूनी

घरो ज़ लिज़्या।

पाइँ यासिधुवए सभैःद ब

मासभैःधुर।”

इजिपनी पुलुस्द नासरतल यालिनाव

१६ हेरोद राजा उसिउ छीनी योसेफ इजिपल उलिज्याक ज़ तछा उमँल परमेस्वरए ओचाकज्या फरी हुद, २० “नँ सोद भाउज़ालाई ओआमास लाँद इस्राएलीराए जेपोदा ओल्द बाचिके। भाउज़ालाई सैःव पैज्याव ओल ज़ सिधुके,” है ओदोव प्राईना ज़, २१ योसेफ सैसिद भाउज़ालाई ओआमास इस्राएल देसदा ज़ निलाँक्यो। २२ होड ओकेसोत हेरोदए ओपोल ओज़ा अखिल्लाउसए यहूदीराए यादेस ओचलैज्याव सैद योसेफ नल लिन्त्या ओछेःज्याव। है जैद तछा उमँल, ‘गालील खन्दल बाद तोबोक लिन्के’ लिद परमेस्वरए है ओदोव रँःक्यो। २३ है जैद गालीललाव नासरत यादोज्याव सहरल लिनाकेर। नो भरी ब अगमबक्तराए यासरो मिताव ज़ योःके। नो सर्सिउ आव ज़, “नोलाई नासरतलाव है दान्या लेर।”

रील सछैँज्याव यूहन्ना

(मर्कस १:१-८; लूका ३:१-१८;

यूहन्ना १:१६-२८)

३ नकिन तछा रील सछैँज्याव यूहन्ना यहूदियालाव बनल

अइ लिद यासथैहुक्यो, २ “स्वर्गताव राज्या सो हुरिके। जेपापलाई रास्द परमेस्वरए ल्योदा जेयुँ फकैँचिके।”

३ आव रील सछैँज्याव यूहन्नाए उजूनी यसैया अगमबक्ताए अइ लिद सर्द ओनैज्याव,

“तोबोए ओर्गा बनल अइ लिद उक्किज्याव थास्त्रिज्या,
‘हुरिज्याव प्रभुए ओयेम
बनैद गाँत्या गुँतीलाई
सदाँचिके।’ ”

४ यूहन्ना ऊँतए ओसनए क्वा ओक्वाइसिज्याव, ओवाँःत स्यालोए वाँःफो ओपोःसिज्याव। नोए स०ल०र कोस्योर ओराकैज्याव, ज़ेराए राप उज्युज्याव। ५ नोए ओल्योक यरूसलेमलावर, यहूदिया खन्दलावर सोनो यर्दन भै जीदाडावर ओपोःस ज़ ओपाँ थैना याहुज्याव। ६ नोराए सु सु यादोव यापाप यूहन्नालाई है यादोक ते यूहन्नाए यर्दन भैल यासछैँक्यो।

७ फरिसीर सोनो सदुकीर यासछैँसि-हुज्याव रँःद यूहन्नाए नोरालाई, “ए घुलए ओथोर, जे परमेस्वरए उरिसनी धोंःन्या सुए है ओदाचिउ? ८ जे साचो ज़ परमेस्वरए ल्योदा जेयुँ फकैँन्या ल्यो ताकिन साचो हो मिताव येन ब दाव ताके। ९ जे फरी, ‘गेपुर्खा

अब्राहामनी ज़ परमेस्वरए ओज़ार ताद गेले,' है जेमालिदी ब ताए। डा साचो है डादाचिज़्या, परमेस्वरए सीर लुंरानी तादी ब अब्राहामए ओथोर याजैधुव। १०किताव तोबो मिँए चाव सै माभाःज़्याव सीर धलैद मेंःल ओराख्याज़्याव, हिताव ज़ परमेस्वरए ब धलैन्याए जूनी ओरोवा सीए ओजराक भाःद नैव। ११डा ते परमेस्वरए ल्योदा जेयुँ जेफकैवनी रील डासछैचिज़्या। खाली डा डाछीनी डाकिन ओसक्ती ल्यो तोबो हुरिज़्या। डा होए ओपोला हाइदयान्या स्यासो ब डामाले। होए परमेस्वरए छैव उपरूस सोनो मेंःनी सछैचिरिज़्याव। १२होए गेदा भरी नाडलील च्यापद चाव भरी धन्सारल भाःद पुल भरिलाई खर्क ज़ माजिप्तिन्या मेंःल मुन्या ले," है लिद यासथैक्यो।

येसु रील ओसछैसिउ

(मर्कूस १:९-११; लूका ३:२१-२२;

यूहन्ना १:३२-३४)

१३हाःत ज़ येसु ब गालीलनी हुद यर्दन भैल यूहन्नाए ल्योक सछैसिहुके। १४यूहन्नाए येसुलाई भैःद मायाद, "डानी माःक, बुरू डा ची

नँनी सछैसिउ परिन्या," है ओदोक ते, १५येसुए, "आख पै नँनी ज़ जैव ताके। परमेस्वरए ओपैँज़्याव मिताव प्राईं येन गिन सयोःदचाव ज़ परिके," है ओदोक ते, यूहन्ना भैःके। १६येसु सछैसिद रीनी उपुलुसो प्राईंना ज़ नम फैसिद परमेस्वरए उपुरूस कुइतम मिताव भुहुद ओक्याँत उचुसिज़्याव रँःक्यो। १७हाःत ज़ नमतिन तोबो गा अइ लिद थास्के, "आव डायुँलाव डाज़ा ज़। आवलाई रँःद डायुँ होलाँ ताज़्या," है लिके।

सैतानए येसुलाई ओजाँचिउ

(मर्कूस १:१२-१३; लूका ४:१-१३)

येसु ननी पुलुस्द ओबाज़्याक 'येसुलाई सैतानए घजाँचिउक' लिद परमेस्वरए छैव उपुरूसए तोबो साइँसुइँव पोड लाँक्यो। २नल चालीस दिन, चालीस रात भरी काता ज़ माज़्याद ओल्योए ओकरेए माधुनाक्यो। ३हाःत ज़ सैतानए येसुलाई भुकैन्याए जूनी ओल्योक हुद, "नँ साचो ज़ परमेस्वरए ओज़ा ताकिन आव लुंरालाई भरेस याजैके," है ओदोक ते, ४येसुए, "धर्मसास्त्रल अइ लिद सर्सिउ लिज़्या, 'मिँलाई ज़्यावए वाज़ माडाव। डाज़्याव

परमेस्वरए ओयाःनी पुलुस्ज्याव पाँए ची, ” है दोक्यो।

५नकिन सैतानए येसुलाई यरूसलेमल लाँद ध्यान भिमए उतुपात बैद, ६“नँ साचो ज़ परमेस्वरए ओज़ा ताकिन आतिनी मेल ज़ो-निके। धर्मसास्त्रल अइ लिद सर्सिउ लिज़्या, ‘नँलाई बाँचैन्याए जूनी परमेस्वरए ओचाकज्यार परीदीरिज़्याव। नोराए नँलाई छींद नखँ लुँत बजारिउ यान्या मालेर, ” है दोक्यो। ७नकिन येसुए सैतानलाई, “धर्मसास्त्रल आव मनी सर्सिउ लिज़्या, ‘नप्रभु परमेस्वरलाई जाँचिन्या माताए, ’ ” है दोक्यो।

८फरी सैतानए येसुलाई तोबो भेंःव गोंत लाँद संसारलाव राज्या भरी ज़गै मगैवस सतेंदद्याद, ९“नँ डाखँत फुलुप्सिद धो नदाँकिन नो नरेंःव भरी नमीं ज़ जैद डाईरिज़्या, ” है दोक्यो। १०नाःत ज़ येसुए, “ए सैतान, डानी पुलुस्द बान्के। धर्मसास्त्रल इताव सर्सिउ लिज़्या, ‘नप्रभु परमेस्वरए ओज़ाक फुलुप्सिद होए ओसेवा वाज़ दान्या ताए, ’ ” है ओदोक ते, ११सैतानए येसुलाई रास्द बाके। हाःत ज़ परमेस्वरए ओचाकज्यार हुद येसुए ओसेवा दोकेर।

येसु परमेस्वरए ओपाँ सथैन्यात उथूसिउ

(मर्कस १:१४-१५; लूका ४:१४-१५)

१२हो बेलाक ज़ ‘रील सछेंज्याव यूहन्नालाई क्योःकेर दी’ लिन्या येसुए थैद ननी हाइसिद गालीलदा बाके। १३है जैद येसु उलिज़्याव नासरतलाई रास्द जबूलून सोनो नप्तालीनी निथो-राए यापो लापकाव, गालील दह छचोकाव कफर्नहुम सहरल लिनाके। १४नो भरी यसैया अगमबक्ताए ओसरो मिताव ज़ योःके। होए ओसरो आव ज़, १५-१६ “यर्दन भै होफताव दह

छचो जीकाव जबूलून सोनो नप्तालीनी निपो लापकाव गालील खन्दलाव

चुम चुमोल लिज़्याव

छुत जातलावराए

बनै घ्योःव ज़गै रेंःद नैर।

सिन्या सजाल परिउरालाई

नम ज़राँः ज़राँः उसँनाव मिताव ताद ले।”

१७है जैद येसु गालीलल ओबावकिन ज़ परमेस्वरए ओपाँ अइ लिद यासथै-क्यो, “स्वर्गताव राज्या सो हरिके। है जैद जेपापलाई रास्द परमेस्वरए ल्योदा जेयुँ फर्कैचिके।”

येसुए चार जनालाई उसिसर ओराजैव

(मर्कस १:१६-२०; लूका ५:१-११)

१८ तछा येसु गालील दह छयो छयो ओबाज्याक पत्रुस है यादोज्याव सिमोन सोनो ओभाइ अन्द्रियासनी दहल जाल निरै:सिज्याव निरै:क्यो। नोनी डाँ:र क्यो:ज्यावनी निल्यो। १९ येसुए नोनिलाई, “डास हुचिन्के, जिनलाई डाँ:र जिन्राखिम्ज्याव मिताव मिँर खिम्न्या डाजैचिन्निज्या,” है उनिदोव प्राइँना ज़, २० नोनी निजालर ख्यानैद ओलस ज़ बाकिनी। २१ जाँ होकसै याबावत फरी जब्दियाए ओज्जानी ओदाज्यु याकूब सोनो ओभाइ यूहन्नानी निबाबु जब्दियास दोङ्गात चुसिद जालर यारातालिज्याव रँ:द नोनिलाई मनी “डास हुचिन्के,” लिद निखुल्क्यो। २२ नोनी बेहार ज़ निबाबुलाई दोङ्गात ख्यानैद येसुस बाकिनी।

येसुए याजोरो हुवरालाई ओरासगराँव

(लूका ६:१७-१९)

२३ येसु गालील खन्द भरिल यहूदी-राए धर्मसास्त्र भिम भिमक बाद ‘स्वर्गताव राज्या हरिके’ लिन्या चाव

था सथैद भाँती भाँतिलाव रोगनी याजोरो हुवरालाई ब ओरासगराँ-ज्याव। २४ है जैद ‘येसुए निताव येन दोक्यो दी’ लिन्या सिरिया खन्द भरी फीजिद याजोरो हुवर, याक्याँत माचाव पुरूस ल्योर, पुलज्यावर सोनो याक्याँ सिउरालाई मनी येसुए ल्योक यारारैक सगराँद याएक्यो। २५ नो येनर थैद गालील खन्दलावर, देकापोलिसलावर, यरूसलेमलावर, यहूदिया खन्दलावर सोनो यर्दन भै होफताव जीलावर बनै माहोल्या ज़ येसुए उछीं उछीं याबाज्याव।

परमेस्वरनी धन्याकावर

(लूका ६:२०-२३)

५ येसुए नो माहोल्यारालाई रँ:द तोबो दाँदात बाद उचुसिक उछींत हुज्याव भरी ब ओल्योक ज़ हुकेर। २ हा:त ज़ येसुए अइ लिद यासथैक्यो,

३ “धन्या, यायुँल मासघ्यो:सिज्यावर, स्वर्गताव राज्या नितावराए जूँनी ज़ लिज्या।

४ धन्या, आज्याल सोगोल लिज्यावर, यायुँ होलाँ तान्या ले।

५ धन्या, परमेस्वरए ओक्याँत ख्यासिद यातहस लिज्यावर,

आव मानुवाताव हक दैन्या
लेर।

६ धन्या, परमेस्वरए ओपैज्याव
मिताव सयोःन्याए जूनी
यास० तरा चींज्यावर,
यापैज्याव भरी योःन्या ले।

७ धन्या, छुतए ल्योदा
यायुं नाज्यावर,
याल्योदा मनी परमेस्वरए
उयुं नान्या ले।

८ धन्या, आज्याल यायुं छैंवर,
परमेस्वरलाई रेंःन्या लेर।

९ धन्या, माखैज्यावरालाई
सखैज्यावर,
यामिन परमेस्वरए ओजाल
गनिसिन्या ले।

१० धन्या, परमेस्वरए उयुंलाव
मिताव येनत याखिरी पसिद
दुखर दैज्यावर,
स्वर्गताव राज्या नोराए जूनी ज
लिज्या।

११“डा डामिनत जेलाई अनाकलाव
पाँर ससैद, जेखिरी पसिद, उल्ली
गिल्ली दाद जेमिन बलेःद यायाचिक
धन्याकावर ज़ जेताज्या। १२जेयुंर
मासतेद रेंच्यो, काराव ल्यो ताकिन
स्वर्गताव घ्योःव इनाम दैन्या
जेले। अगमबक्ता भरिरालाई मनी

जेकिन डादा निताव दुखर याव ज़
यारानैज्याव।”

सापी सोनो ज़गै

(मर्कूस ६:५०; लूका १४:३४-३५)

१३“जे आव मानुवात सापी
मितावर जेलिज्या। सापीए ओदार
ओमालिकिन नोलाई कै जैद ची
ओदार ल्यो जैन्या? है जैद नो काम
मालागिउ ओतावए नोलाई ख्याद
मिँराए छिल्ली निन्या वाज़ ताज्या।

१४“जे आव मानुवाताव ज़गै
स्यासो ब जेलिज्या। भेंःवताव
जैसिउ सहर ब मामोंसिए। १५सोनो
मिँराए लोसै तैःद जाए माकपर,
दिउ बाल्न्यात ची भाःर। हुनी वाज़
फ़िमल लिज्यावरालाई पलाँ ताज्या।

१६हिताव ज़ जे मनी मिँराए याडाक
जेज़गै ओरैःक। हो ताकिन ची चाव
जेयेन रेंःद स्वर्गताव जेबाबुए उमिन ब
सघ्योःदयान्या लेर।”

कानुनलाव येन सयोःन्या

(लूका १६:१७)

१७“जे डालाई ‘मोसाए ओकानुन
सोनो अगमबक्ताराए यायेन समैना
उहुव’ है तालिच्यो। समैना माःक,
सयोःना डाहुव ची। १८डा साचो



है डादाचिऱ्या, आव नाम नम ओमाखेमा पै, धर्मसास्त्रलाव सर्सिउ पाँ ओमायोःवा पै, तोबो ब खेर बान्या माले। १९ है जैद जोए धर्मसास्त्रलाव पाँ तकेऱा तादी ब ओबलेःकिन स्रो नो छुतलाई तँनी ओपैकिन नोए उमिन स्वर्गताव राज्याल प्राइँरानी जिम्ऱा तान्या ले। फरी नो भरी ओल माबिरैद ओदोकिन छुतलाई ब दान्या ओपैकिन नोए उमिन स्वर्गताव राज्याल घ्योःव ज़ तान्या ले। २० है जैद ज़ डा साचो है डादाचिऱ्या, सास्त्रीर स्रो नो फरिसीराए यादोऱ्याव धर्मकिन जे कोसै जेमादोकिन, स्वर्गताव राज्याल पसिउ दैन्या जेमाले।”

रिस स्रो नो मिँ सैःन्या

२१ “जे ब थैद जे नैऱ्याखेहो, भाःकाव जेसाखा पुर्खारालाई ‘मिँ मासैःन्या,’ स्रो नो, ‘जोए मिँ सैःऱ्याव, होए सजा ब दैव ज़ परिके’ है लिद सथैव ज़ यारानैऱ्याव। २२ डा ते भन जेलाई इतावनी है डादाचिऱ्या, जोए ओभाइलाई रसिद वाऱ ओएकिन नोलाई ब सजा दैन्या ओछ्यास लिऱ्या, स्रो नो जोए छुतलाई, ‘नँ कान्ल ज़ काम मालागिउ भोकोता,’ है दोऱ्याव, नोलाई भन घ्योःव

कचरील लाँन्या ओछ्यास लिऱ्या। फरी जोए छुतलाई, ‘मुख्र नफ्याःहुव,’ है दोऱ्याव, नोलाई नर्गलाव मेंःए ओऱ्यास तान्या ओछ्यास लिऱ्या। २३ है जैद नँ ध्यान भिमल परमेस्वरए उमिनत कातार चरैःना नबाक ननैए उयुँल नउपत कातार उलिऱ्याव नसैकिन, २४ नो चरैःना नरैवलाई होक ज़ ख्यानैद डादा नो ननैस सखैसिद वाऱ चरैःयो।

२५ “नजगऱ्याए अदालतदा मुद्दा भाःनाद उईकिन होड ओमाकेस्द येमक ज़ खैनानी, मानी नोए न्याधिसए उकुइत सँपिद, न्याधिसए फरी पुलिसए उकुइत सँपिद भयालखानाल भाःनिरिऱ्याव। २६ साचो ज़, नल नपरिकिन तपैसा तादी ब ओपोःस ज़ नमाफोःवा पै पुलुसो दैन्या नमाले।”

जारी येन

(मर्कस १०:११-१२; लूका १६:१८)

२७ “जे आव ब थैद जे नैऱ्याखेहो, ‘अर्काए ओऱ्याए ल्योदा माबान्या।’ २८ डा ते भन है डादाचिऱ्या, जोए तोबो मेंमालाई चाव रँःद उयुँल बलेःव ओपैकिन होए पाखात ब ओबलेःधुव मिताव ज़ लिऱ्या। २९ है जैद तँनिकाव नमीए माचावल ओपारैनिकिन नोलाई



कोला-द ख्याके। नक्याँ भरी नर्गल ओबाज़्याव देखा बुरू तोबो ओमाल्यो पाथ लिज़्या। ३०हिताव ज़ तँनिकाव नकुइए माचावल ओपारैनिकिन नोलाई च़मद ख्याके। नक्याँ भरी नर्गल ओबाज़्याव देखा बुरू तोबो च़मद ख्यान्या पाथ लिज़्या।

३१“फरी कानुनलाव आव मनी जेसैज़्याखेहो, ‘जोए ओज्यालाई रासो ओपैकिन होए रास्न्या कागत सर्द ओरासोक।’ ३२डा ते भन है डादाचिज़्या, जोए ओज्या ओरेए ओसतत उलिज़्यावत ब ओरेए ओरास्किन, फरी नो मेंमाए छुत रे ओदोकिन, नो रास्ज़्याव ओरेए नो मेंमालाई जारी येन ज़ दाव परींक्यो। फरी जोए नो रास्सिउ मेंमालाई रैज़्याव, होए मनी जारी येन ज़ दोक्यो।”

किज्या माभाःन्या

३३“आव ब थैद जेनैज़्याखेहो, भाःकाव जेसाखा पुर्खारालाई, ‘धुत किज्या भाःन्या माताए,’ सोनो, ‘परमेस्वरए उमिनत काताराल किज्या जेभाःकिन नोलाई जुनी ब सयो-व ज़ परिए’ है लिद सथैव ज़ यारानैज़्याव।

३४डा ते भन है डादाचिज़्या, किज्या भाः ज़ ताभाःच्यो। नम छुद तादी ब ताभाःच्यो, नत परमेस्वरए उसिंहासन लिज़्या। ३५नाम छुद ब ताभाःच्यो, नाम परमेस्वरए उखँ नैन्या पो ची। यरूसलेमए उमिननी ब ताभाःच्यो, नो राजाराए याराजाए ओसहर ची। ३६जेडै छुद ब ताभाःच्यो, जेडैताव चेमलाई पालो ब जेमाजैधुइ, मोलो ब जेमाजैधुइ। ३७है जैद जे हैज़लाई हैज़, माःकलाई माःक ज़ है लिच्यो। नोकिन आगल्या भरी ओचाहित माल्यो ज़ लिज़्या।”

खिस माफेरैन्या

(लूका ६:२६-३०)

३८“आव ब थैद जेनैज़्याखेहो, ‘छुतलाई ओहा केःद ओएकिन, उमी पा-द ओएकिन, हाए ओपोल हा, मीए ओपोल मी ताव ज़ उपरिज़्याव।’ ३९डा ते भन जेलाई है डादाचिज़्या, माचाव येनत खिस ताफेरैच्यो। काताकावए तँनिकाव नगालात लप्तैद उईकिन, तँनिकाव नगाला ब थाँदियो। ४०सोनो काताकावए नचूबन्दी नैन्याए जूनी मुद्दा भाःद उईकिन नफुतु ब हाइद एयो। ४१फरी काताकावए करस ज़

५:३१ ब्य २४:१-४ ५:३३ लेबी १६:१२; गन्ती ३०:२; ब्य २३:२१ ५:३४ यसै ६६:१

५:३५ यसै ६६:१; भज ४८:२ ५:३८ प्रस २१:२४; लेबी २४:२०; ब्य १६:२१

तकिलोमितर लाँव ओपैकिन नोस
अभ्र नेकिलोमितर पै बानी। ४२ नँस
निज्यावलाई एयो, नँस कातार लोसो
ओपैकिन 'माले' है मादाद लोइयो।”

सुतुररालाई समारिन्या

(लूका ६:२७-२८, ३२-३६)

४३ “आव ब थैद जेनैज्याखेहो, ‘नै
मेंलाई समारिन्या, सुतुरलाई सोन्या।’
४४ डा ते भन जेलाई है डादाचिज्या,
जेसुतुररालाई मनी यारासमारिच्यो,
जेखिरी पसिज्यावराए याजूनी
पोंखारिच्यो। ४५ हो ताकिन ची स्वर्ग-
ताव जेबाबुए ओज़ार तान्या जेले।
होए चाव माचाव प्राइँलाई निमी
ब पले-द याएज्याव, धर्मीर सोनो
अधर्मीरालाई नम ब सवाद याएज्याव।
४६ जेलाई समारिज्यावरालाई वाज़
जेरासमारिकिन स्वर्गताव जेजुँ कातानी
जेदैरिज्याव? ना:वाकाव येन ते पापी
है यारादोज्याव सिर्मा स्यो-ज्यावराए
मनी दोज्यार। ४७ जेक्याँदाडावरालाई
वाज़ मानस जेरासुम्किन नो काता ज़
मा:क। ना:वाकाव ते परमेस्वरलाई
मासरेस्ज्यावराए ब दोज्यार। ४८ है
जैद स्वर्गताव जेबाबु किताव ओखत
माल्यो छैँव लिज्या, जे ब हिताव ज़
ताव परिके।”

माल्योरालाई यान्या

६ “मिराए याड़ाक वाज़ सतैसिन्या
धर्मनी जोगोइसिद लिच्यो, मानी
स्वर्गताव जेबाबुए ल्योनी काता ज़
दैन्या जेमाले। २ है जैद जे मायो-व
माथैँवरालाई जेराएक नो कैफतीराए
याराएज्याव मिताव मा:क। नोर मिराए
ड़ाक चाव धर्मी सरै:सिन्याए जूनी
धर्मसास्त्र फ़िम जीदा, बजार जीदा
भोंकरर तपद दुलिज्यार। जेलाई साचो
है डादाचिज्या, नोराए याइनाम ना:
ज़। ३ है जैद जे मायो-व माथैँवरालाई
जेराएक वोर्फताव जेकुइए जेभा:व
दाबज्याफताव जेकुइए तासैँवक।
४ सुए ज़ यामासैँद जेभा:व मिताव
ओताक। हो ताकिन ची मोंसिउलाव
रँ:ज्याव परमेस्वर जेबाबुए नो जेदोव
रँ:द स्वर्गताव जेइनाम यान्या ले।”

परमेस्वरलाई पोंखारिन्या

(लूका ११:२-४)

५ “परमेस्वरलाई जेपोंखारिक ब नो
कैफतीराए यापोंखारिज्याव मिताव
पोंखारिन्या मा:क। नोर धर्मसास्त्र
फ़िम जीदा, येम खार जीदा ‘प्राइँए
घरँ:सिरक’ लिद च्याँ:सिद पोंखारिन्या
युँ दोज्यार। साचो है डादाचिज्या,

नोराए याइनाम नाः ज़। ६बुरू जे ते परमेस्वरलाई जेपोंखारिक तोबो कुन्तील पसिद याम गल्द सुए ज़ यामारेंःद स्वर्गताव जेबाबुलाई पोंखारिच्यो। हो ताकिन ची मोंसिउलाव रेंःज्याव परमेस्वर जेबाबुए स्वर्गताव इनाम यान्या ले। ७फरी जे जेपोंखारिक परमेस्वरलाई मासरेस्ज्यावराए मांःती पर्वख्यान तालिच्यो। नोराए ‘कुधु ख्योःव गेपोंखारिकिन थैदचासिवा’ लिन्या सम्जिज्यार। ८जे ते नितावर ताताच्यो। जे जेमापोंखारिद ज़ परमेस्वर जेबाबुए ‘आव आव चाहिज्या’ लिन्या डादा ज़ सैंज्याव। ९जे जेपोंखारिक इतावनी पोंखारिच्यो,

‘अ स्वर्गत लिज्याव गेबाबु,
नँ नमिन प्राइँए ज़ छैंव ओथःरैरक।

१० स्वर्गताव नराज्या आव नामल
उहुक,
स्वर्गताव है नलिज्याव मिताव
आव मानुवाल ब ओताक।

११ गेलाई चाहिज्याव ज्याव
दिनकाव ज़ जोरैदचासियो।
१२ नउपर्त गेदोव पापरानी रास्सियो।
हो मिताव ज़ गे ब मिँराए गेउपर्त
यादोव पापरानी गेरारास्ज्या।

१३ गेलाई माचाव चेतैन्यारानी
जोगोइद
माचाव भरिनी पलेःद पाथस
नैसियो।

[खर्क ज़ माखेम्न्या राज्या ब
नमीं ज़,
सक्ती ब नमीं ज़, ज़गै मगै ब
नमीं ज़। आमैन।’]

१४जे जेडैताव पाप दोज्यावलाई जेरास्किन, स्वर्गताव जेबाबुए जेलाई मनी रास्न्या ले। १५फरी जे जेडैताव पाप दोज्यावलाई रासो जेमाभैःकिन स्वर्गताव जेबाबुए जेलाई ब रास्न्या माले।”

उपासिन्या

१६“जे जेउपासिक कैफतीराए यादोज्याव मिताव तादोच्यो। नोर, ‘हत्या गेकातिज्याव प्राइँए घरेंःसिरक’ लिद याडाःर ब हुली हुली च्याःव जैसिज्यार। जेलाई साचो है डादाचिज्या, नोराए याइनाम नाः ज़। १७जे ते जेउपासिक ‘मिँराए तासरेस्सिरक’ लिद जेडाःर हुर्सिद मासर थीसिद ल्यो ताके। १८हो ताकिन ची मोंसिउलाव रेंःज्याव स्वर्गताव जेबाबुए ओल ज़ सैंद स्वर्गताव जेइनाम नैदचान्या ले।”

स्वर्गताव धन

(लूका १२ः३३-३६; १६ः१३)

१९“जे आव मानुवात जेजूनी धन सम्पती तादुच्यो। आव मानुवाताव

धन भरी घुनराए ब ज्युज्यार, खैए ब कैज्याव, चोरराए ब भिम पाःद कुज्यार। २० है जैद जे जेसम्पती स्वर्गत दुच्चिके। नल घुनए ब माज्युव, खैए ब माकैव, चोरराए ब मालारं। २१ काराव ल्यो ताकिन जोड जेधन लिज्या, जेयुं ब होड ज़ तान्या ले।

२२ “जेक्याँताव बत्ती जेमी लिज्या। है जैद जेमी चाव उलिकिन जेक्याँ भरी पलाँव ज़ ताज्या। २३ फरी जेमी माचाव उलिकिन जेक्याँ भरी चुम चुमोल ज़ ताज्या। है जैद नो जेक्याँताव पलाँव ताव परिन्या चुम चुमो ओताकिन भन ज़ छाम छाम तान्या ताज्या।

२४ “तोबो बाँदाए नेब्लो साहुनी नियेन मादोधुव। दाव उपरिकिन नोए तोबोलाई सोद तोबोलाई चाव रँःन्या ले, कितर तोबोए ओपाँ भैःद तोबोलाई ओलेखा नैदयान्या माले। हिताव ज़ जे मनी परमेस्वरए ओसेवा सोनो पैसाए ओसेवा तखेप्त जेमादोधुइ।”

व्रीनी फुइ मालिन्या

(लूका १२:२२-३४)

२५ “है जैद डा जेलाई है डादाचिज्या, जे जेक्याँए उजूनी ‘काता डाज्युके,

काता डाओके, काता डाक्वाइसिके’ लिद व्रीनी फुइ तालिच्यो। आव गेजिउ ज्यान्या क्वाइसिन्याए जूनी वाज़ माःक। २६ नमताव बाज़ारालाई याराचिऊचिके। नोराए धुर ब माभाःर, क्याःन्या ब माक्याःर, ज्याव ब मादुप्पर। हितावत ब नोरालाई चाहिज्याव भरी स्वर्गताव जेबाबुए याएज्याव। परमेस्वरए जेलाई भन बाज़ाराकिन घेप्पा रँःचिज्याव। २७ जेनी सुए ची सोगो दाद जेजिउत तघन्ता जेचाःधुरिज्याव?

२८ “है जैद काताए जूनी क्वाइसिन्या क्वारात सोगो जेदोज्याव? बुखीताव वासर याराचिऊचिके। नोराए धामा दाद माखलर। २९ हितावत ब सोलोमन राजा बनै तह महौ ओजैसिदी ब वास तकल माताए। ३० परमेस्वरए आछिम वैद पराःती मेंःल बाज्याव छीर नाः चाव याजैज्याव ल्यो ताकिन जेलाई भन कै जैद माक्वाइचिउके? काता नाः जेयुं माहुबोर जेलिज्याव!

३१ “है जैद जे ‘काता डाज्युके, काता डाओके, काता डाक्वाइसिके’ लिन्यादा जेयुं थू जैद व्रीनी फुइ तालिच्यो। ३२ आव भरी ते परमेस्वर-लाई मासरेस्ज्यावराए याध्यावना ची। जे जेजूनी चाहिज्याव भरी ते

स्वर्गताव जेबाबुए ज़ सैज़्याव।
३३बुरू जे प्राइरानी ड़ात परमेस्वरए
ओराज्या खिम्द उयुंलाव मिताव
येन दान्या जैसिचिके। हो ताकिन
ची जेलाई चाहिज़्याव भरी ओल ज़
जोरैदयाचिरिज़्याव। ३४है जैद जे
पराःतीकावए जूनी सोगो तादोच्यो।
पराःतीकाव सोगो हो छचाम ज़
खेम्ज़्या। काताए जूनी आछिम-
काव सोगोत भन होलाई ब चाव
जेपैज़्याव?”

अर्काए ओखत मापलेन्या

(लूका ६:३७-३८, ४१-४२)

७ “जे अर्काए ओखत पलेद
ताएच्यो, मानी परमेस्वरए
जे जेखत ब पलेदयान्या ले। २जे
छुतलाई कितावनी जेथरैज़्या, जे
मनी हितावनी ज़ जेथरिज़्या। सोनो
किताव गोइंनी जेगोइंज़्या, जे मनी
हिताव गोइंनी ज़ दैन्या जेले। ३फरी
कै जैद ननैए उमीलाव तकेज़ा सींका
नरंःज़्याव, नं नमीलाव नाःल्दिउ मुंदा
ताकितर नमारंःज़्याव? ४नमीलाव
नाःल्दिउ मुंदा लिज़्यावत कै जैद
ननैलाई, ‘नमीलाव सींका हाइद डाई’
है नदोधुरिज़्याव? ५ए निताव पांज़्याव
कैफती, ड़ादा नमीलाव मुंदा हाइकेदा,
ननैए उमीलाव सींका नहाइक छर्लङ्ग
रंःन्या नले।”

काः स्यासोर सोनो ऊ स्यासोर

६“छैव पांर काः स्यासोरलाई
ताराएच्यो, मानी नोर जेल्योदा हुद
छुपिहुन्या लेर। सोनो हिरामुती
स्यासोर ऊ स्यासोराए याड़ाक
ताख्याच्यो, मानी नोराए हिलाल
छिल्ल्या लेर।”

जोए खिम्ज़्याव होए ज़ दैज़्याव

(लूका ११:६-१३)

७“फरी ब तोबो है डादाचिज़्या,
परमेस्वरस जेन्किन जेलाई यान्या
ज़ ले, जेखिम्किन दैन्या ज़ जेले, याम
कोतो कोतो जेजैकिन जेजूनी फैसिन्या
ले। ८जोए निज़्याव होलाई यान्या
ले, जोए खिम्ज़्याव होए दैन्या ले,
जोए कोतो कोतो जैज़्याव होए उजूनी
फैसिन्या ले। ९फरी तोबो जिम्ज़ा
लुज़ाए ओबाबुस भरेस उन्किन लुं
ते मायो, १०डॉः उन्कि घुल ते मायो।
११है जैद जे निताव पापल लिज़्याव
मिराए जेज़ारालाई निताव चाव चाव
यान्या जेसैकिन, स्वर्गताव जेबाबुए
भन ओलस जेन्किन चाव चाव कै
जैद मायाचिउके? १२है जैद जे छुतए
ल्योनी किताव जेपैज़्या, जे ब छुतए
ल्योदा हितावनी ज़ दोचिके। मोसाए
ओकानुन सोनो अगमबक्ताराए यासरो
ब नत ज़ तुपिज़्या।”

चूव ग्राम

(लूका १३:२४)

१३“चूव ग्रामनी ज़ पसिच्यो। नासदा बान्या येम ते राँव, पसिन्या ग्राम ब बनै वै:व लिज़्या। नो येमनी बाज़्यावर बनै कुधु ज़ लिज़्यार। १४खाली अजम्बरी जुनीदा बान्या येम सोनो ग्राम चूव, धो पसिउ ओतावए नो येमल बान्यार छछा ज़ ताज़्यार।”

मिँ ओयेननी ज़ सरेस्सिए

(लूका ६:४३-४४; १३:२५-२७)

१५“परमेस्वरए ओपाँ बले:द तँनी पैज़्यावराए ल्योनी जोगोइसिद लिच्यो। नोर पाखात बगाललाव बेधा स्यासोर जैसिज़्यार, यायुँल ते छे छे डम्सिउ पर स्यासोर लिज़्यार। १६किताव सीरालाई यासैनी जेरा-सरेस्ज़्या, हिताव ज़ नोरालाई मनी यायेननी ज़ सरेस्न्या जेले। कारजुत जोम्परसै मासैए, जुसैत कोराली ब मासैए। १७हिताव ज़ चाव सीए चाव सै ज़ भा:ज़्याव, माचाव सीए माचाव सै ज़ भा:ज़्याव। १८फरी चाव सीए माचाव सै माभा:व, माचाव सीए चाव सै ब माभा:व। १९जो सीए चाव सै माभा:व नो सीं पल्द में:ल ख्यान्या

वाज़ ताज़्या। २०है जैद जे हो तँनी पैज़्यावरालाई यायेननी ज़ सरेस्न्या जेले।

२१“जोए ओया:ए वाज़ डालाई ‘प्रभु, प्रभु’ है दाँज़्याव, नो स्वर्गताव राज्याल पसिधुन्या माले। जोए स्वर्गताव डाबाबुए उयुँलाव मिताव येन दोज़्याव, हो वाज़ पसिन्या ले। २२नो छचाम कुधुए डालाई, ‘अ प्रभु, अ प्रभु, गे नमिननी परमेस्वरए ओपाँ ब गेरासथैके, माचाव पुरूसर ब गेरापले:के, अचम्बलाव सरेसर ब गेरासतैके,’ है यादाँकिन, २३डा नोरालाई, ‘जेलाई खर्क ज़ डामासरेस्चिए, जे निताव परमेस्वर-किन तँदाडाव येन दाज़्यावर, आनी पुलुस्द बाचिके,’ है दान्या डाले।”

लुँ तर्त सोनो बालुवा तर्त जैसिउ फ़िमनी

(लूका ६:४७-४९)

२४“है जैद जोए आव डापाँ थैद दोज़्याव, नो तोबो ओगहक ल्यो मिँए फ़िम ओजैक पतालल लुँ तर्त गज ओथाँज़्याव स्यासो लिज़्या। २५नम बनै वाद, ल्यो माल्यो बतासर भलर उहुक नो फ़िम लुँ तर्त ओतावए माधलिके। २६हो मिताव ज़ जोए

आव डापाँर थैद ओमादोकिन तोबो ओगहक माल्यो मिँए फ़िम ओजैक बालुवा तर्त ओजैव स्यासो ज़ लिज़्या। २७ बतासर दाद, नमर वाद, भलर हुद नो फ़िमलाई धलैद प्याःपी जैद लाँज़्याव।”

२८ येसुए आव पाँर सथैद उतुपैवत, नो माहोल्थार येसुए ओपाँ थैद अचम्ब ताकेर, २९ काराव ल्यो ताकिन होए यासास्त्रीराए यारापैज़्याव मिताव माताद बनै हकस ओरापैज़्याव।

येसुए कुरीलाई ओसगराँव

(मर्कूस १:४०-४५; लूका ५:१२-१६)

नाःत ज़ येसु नो दाँदातिन भरिके। उछींत बाज़्याव मिँर बनै माहोल्थार यालिज़्याव। २ नो बेलाक ज़ तोबो कुरी ओल्योक हुद उखँत फुलुप्सिद, “अ प्रभु, डाल्योदा नयुँ ओताकिन डालाई सगराँन्या नले,” है ओदोक ते, ३ येसुए नोलाई उकुइए छाप्द, “नल्योदा डायुँ लिज़्या ज़, गराँनिके,” है ओदोव प्राईना ज़ नो ओक्याँताव कुरीए रास्द सोजोकाव ज़ ताके। ४ येसुए नो गराँवलाई, “आव नक्याँताव डादोव येन सुलाई ज़ है तारादोयो। बुरू नगराँव साचो ज़ ओल्यो लिन्या थःरैव परीन्याए जूनी

पुजारीए ल्योक सतैसिनाद मोसाए ओकानुनलाव मिताव चरैःन्यार चरैःनाके,” है दोक्यो।

येसुलाई उयुँ हुबो कप्तान

(लूका ७:१-१०; यूहन्ना ४:४३-५४)

५ फरी येसु कफर्नहुमल ओकेस्नावत तोबो रोमी कप्तान ओल्योक हुद, ६ “अ प्रभु, तोबो डानोकोर ओजोरो हुद उखँ उकुइ माचलिद फ़िमक ज़ घ्याँसिद ले,” है ओदोक ते, ७ येसुए, “ताए, डा हुद सगराँन्या डाले,” है दोक्यो। ८ नो कप्तानए फरी, “अ प्रभु, डा इतावए डाफ़िमक नँलाई लाँन्या स्यासो डामाले। बुरू आकिन ज़ ‘गराँनिके’ है नलिकिन डानोकोर गराँन्या ले। ९ डा ब छुतए ओहक धूँलाव मिँ ज़, डा डाधूँल मनी कुधु सिपाईर लिज़्यार। नोरालाई ‘बाचिके’ है डारादोक बाज़्यार, ‘हुचिके’ है डारादोक हुज़्यार। डाबाँदालाई ब ‘इताव दोके’ है डादोक दोज़्याव,” है दोक्यो।

१० येसुए नो कप्तानए ओपाँ थैद अचम्ब ताद ओलस बारिज़्यावरालाई, “डा जेलाई साचो है डादाचिज़्या, इस्राएलीराए खार्ल मनी आव मिताव डाल्योदा उयुँ हुबो सु ज़ डामादैताए। ११ आदा थैचिके, स्वर्गताव राज्यालाव

भत्यारल पुर्ब-पछचुंनी छुत जातलाव मिँर ब बनै कुधु ज़ हुद अब्राहाम, इसहाक, याकूबरास सिप ज़ चुसिन्या लेर। १२इस्त्राएली राज्यालाव ताव परिन्याकावर ते नल मापसिद चुम चुमोल परिरिज़्यार। नल याहार डर डर कैद चिर्लनी बिर्ल घन्या लेर,” है दाद, १३फरी नो कप्तानलाई, “बानिके, डालाई किताव नयुं उहुबो हिताव ज़ तान्या ले,” है दोक्यो। नो कप्तानए ओनोकोर येसुए है ओदोव बेलाक ज़ होड ओगरांधुव ओल्यो।

येसुए पत्रुसए उमुइँज्युलाई ओसगराँव

(मर्कूस १:२६-३१; लूका ४:३८-३९)

१४नकिन येसु पत्रुसए उक्किमक ओबाक पत्रुसए उमुइँज्यु ओजोरो हुद घ्याँसिद उलिज़्याव रँ:क्यो। १५येसुए नोलाई उकुइ छाप्द ओयो प्राइँना ज़ ओजोरोए रास्क्यो। नो सोद बेहार ज़ येसुलाई ज़्यावर ब जैदिक्यो।

येसुए याजोरो हुवरालाई ओरासगराँव

(मर्कूस १:३२-३४; लूका ४:४०-४१)

१६रिमदा रिमदा मिँराए याजोरो हुवर, माचाव पुरूसराए क्यो:द

यारानैज़्यावरालाई येसुए ओल्योक यारारैकेर। येसुए ओपाँए ज़ नो माचाव पुरूसर पुलुस्द धों:केर, याजोरो हुवर ब गराँकेर। १७नो ओदोव येन यसैया अगमबक्ताए सर्द ओनैज़्याव मितावनी ज़ ताके। नोए ओसरो आव ज़,
“गेदुखर ब पले-दद्यासिक्यो,
गेजोरोर ब सगराँदद्यासिक्यो।”

येसुस बाव पैँज्यावर

(लूका ६:५७-६२)

१८येसुए ल्योक तछा मिँर ल्यो माल्यो याछुइसिहुवए दोङ्गल पसिद उसिसरालाई, “दह होफत गेबाया,” है यादोक्यो। १९हा:त ज़ तोबो सास्त्री येसुए ल्योक हुद, “गुर्बा, नँ जोदा नबाज़्या, डा ब नँस ज़ डाबाया,” है ओदोक ते, २०येसुए, “स्यालर लिन्या कुँ ब लिज़्या, बाज़ार लिन्या सिप ब लिज़्या। डा मिँ मिन्सिद हुवलाई ते डै कपन्या पो ब माले,” है दोक्यो।

२१फरी तोबो ओलस बाज़्यावए, “अ प्रभु, डादा डाबाबुलाई डागादैदा, नँस डाबाया,” है ओदोक ते, २२येसुए, “सिउरालाई सिउ स्यासोराए घरागादैज़्यारक, नँ ते डास घुहुनी,” है दोक्यो।

येसुए बतासलाई ओथकनैव

(मर्कूस ४:३५-४१; लूका ८:२२-२५)

२३ नकिन येसु दोङ्गाल उपसिउत उसिसर ब ओलस ज़ बाकेर। २४ दह माँजल याबाज़्याक उमँ:जानी ल्यो माल्यो बतास हुद रीए ओछल्कार दोङ्गाल पसिद दोङ्गालाई गदैवा गदैवा जैक्यो। हो बेलाक येसु ड़ल्द उलिज़्याव। २५ उसिसराए येसुलाई सोचोइद, “प्रभु, गेलाई बाँचैसिके, खदम ज़ गेतारिके,” है यादोक ते, २६ येसु सोद, “जे काराव जेछे:ज़्याव? जेर्युँ ना: माहुबोर,” है दाद बतास सोनो रीनिलाई उनिसिडारो प्राइँना थपक ज़ अदिके। २७ निताव रँ:द उसिसर अचम्ब ताद, “आव किताव मिँ ओताव? बतासर रीराए ब ओपाँ यादोऽ्याव,” है लिकेर।

खादर पोल लिज़्याव बूलिउनी

(मर्कूस ५:१-२०; लूका ८:२६-३६)

२८ येसु उसिसरास दह होफताव गदरिनीराए यापोड याकेसो प्राइँना ज़ माचाव पुरूसराए क्यो:द यारानै-ज़्यावनी नेब्लो खादर पोनी पुलुस्द नोस दैसिहुकिनी। नोनी बनै निछचास ल्योनी निल्यो, नलाव घ्याँ सु ज़ आदा होदा यामालिधुऽ्याव। २९ नोनी बनै चोइस अइ लिद किकिनी,

“अ परमेस्वरए ओज़ा, गिनस नखै काता उलिज़्याव? परमेस्वरए गोइँद ओनैऽ्याव बेला ओमाहुद ज़ गिनलाई दुख याना नहुव रो?” है दोकिनी।

३० नो बेलाक जाँ होकसैक ऊर तबगाल यालाऽ्याव। ३१ नो माचाव पुरूसराए, “गेलाई पले:न्या ताकिन नो ऊराए क्यौँत बाव यासिके,” है यादोक ते, ३२ “ताए, नोनी निक्याँनी पुलुस्द बाचिके,” है ओरादोक ते, नोर पुलुस्द ऊराए याक्यौँत यापसिउ प्राइँना ज़ ऊर ओपो:स ज़ बूलिद दाँदातिन सुइँ:किनाद दहल ज़ो:द प्राइँ ज़ सुद सिकेर।

३३ निताव रँ:द नो ऊ गावलार ननी धोँ:नाद सहर जीदा बाद प्राइँलाई ज़ ‘माचाव पुरूसराए क्यो:द यारानै-ज़्याव मिँनिलाई इताव इताव ताके’ है यारादोकेर। ३४ नो याथैव प्राइँना ज़ सहरलावर ओपो:स ज़ येसुए ल्योक बाद, “आनी पुलुस्द बान्के,” है दोकेर।

येसुए उखँ उकुइ सिउलाई ओसगराँव

(मर्कूस २:१-१२; लूका ५:१७-२६)

६ हा:त ज़ येसु उसिसरास दोङ्गाल पसिद ड़ादाडाव यालिज़्याव कफर्नहुमल ज़ बाकेर। २ नल तोबो उखँ उकुइ सिउलाई भेलोङ्गाल भा:द येसुए ल्योक रैकेर। येसुए नोराए यायुँ

उहुबो रँ:द नो उखँ उकुइ सिउलाई, “अ कान्छा, नयुँ होलाँ जैके, नपाप क्याल्लिके,” है दोक्यो। ३नो है ओदोव सास्त्रीराए थैद या याल, “आव मिँए काराव ब्याँ इताव परमेस्वरए उमिन ओबले-ज्याव?” है लिकेर। ४येसुए नोराए यायुँलाव पाँ सैद, “जे काराव जेयुँल आव डापाँ माचाव जेथ-रैज्याव? ५नो मिँलाई ‘नपाप क्याल्लिके’ है दान्या सैं ‘सोद बान्के’ है दान्या काताकाव सजालो उलिज्याव? ६अब डा मिँ मिन्सिद हुवए आव मानुवात पाप क्याल्ल्या डाकुइत उलिज्याव सैं ओमालिज्याव, चिऊचिके,” है दाद नो उखँ उकुइ सिउलाई, “नँ सोद नभेलोङ्गार घुर्द नभिमदा बान्के,” है ओदोव प्राइँना ज़, ७नो उखँ उकुइ सिउ थर च्याँ:सिद ओभेलोङ्गार घुर्द उभिमदा बाके। ८नो रँ:ज्याव माहोल्याराए निताव येनर रँ:द छे-द, “परमेस्वरए मिँरालाई ब इताव अचम्ब-लाव सक्तीर ओराएज्याव ओल्यो,” लिद परमेस्वरए उमिन सघ्यो:दिकेर।

येसुए मत्तीलाई उसिस ओजैव

(मर्कूस २:१३-१७; लूका ५:२७-३२)

६येसु ननी ओबाज्याक तोबो मत्ती यादोज्यावलाई सिर्मा स्यो-न्या अद्दाक

चुसिद उलिज्याव रँ:द नोलाई, “डास हुन्के,” है ओदोव प्राइँना ज़ नो च्याँ:सिद येसुए उछीत बाके।

१०येसु उसिसरास होए उभिमक बाद ज़्यान्याए जूनी चुसिकेर। नो बेलाक ओलस सिप ज़्युज्यावर सिर्मा स्यो-ज्यावर स्रोनी पापी है यारादोज्यावर बनै कुधु ज़ यालिज्याव। ११फरिसीराए निताव रँ:द येसुए उसिसरालाई, “जेगुर्बाए कै जैद निताव सिर्मा स्यो-ज्यावर स्रोनी पापीरास सिप उज्युज्याव?” है यारादोकेर।

१२येसुए नो यापाँ थैद, “याजोरो माहुज्यावरालाई सगराँन्या मिँ माचाहिए, याजोरो हुज्यावरालाई वाज़ चाहिज्या। १३हिताव ज़ डा मनी ‘गे धर्मी’ है लिज्यावराए जूनी डाहुव मा:क, ‘गे पापीर ज़’ है लिज्यावराए जूनी डाहुव ची। आव धर्मसास्त्रलाव पाँए ओअर्थ ब सैच्यो, ‘पाथा पल्द चरै:ज्यावरास मा:क, यादया ल्योरास डायुँ होलाँ ताज्या।’ ”

उपासिन्या

(मर्कूस २:१८-२२; लूका ५:३३-३६)

१४हो बेलाक ज़ रील सछैँज्याव यूहन्नाए उसिसर येसुए ल्योक हुद,

“गे स्रोनो फरिसीर गेउपासिज्या, नँ नसिसर काराव यामाउपासिज्याव?” है यादोक ते, १५येसुए नोरालाई, “जन्तीर ब्याहोल्यास यालेवा पै सोगोल यालिज्याव रो? खाली जो छचामकिन ब्याहोल्यालाई छुतैर, हो छचामकिन वाज़ उपासिन्या लेर,” है दाद, १६फरी घर्ती भाःद याएक्यो, “सुए ज़ ओरे छिबो क्वालाई साःरो क्वाए मातालिउ, ओतालिकिन नो साःरोए पुराँदोलाई ओल्योदा सेल्द भन ज़ चीज्याव। १७स्रोनो, साःरो दाखमदच पुराँदो प्रिर्गुलल सुए ज़ माभाःर। म्नी उस०ए प्रिर्गुललाई सुफुद दाखमदच ब भोन्या ले, प्रिर्गुल ब खेर ज़ बान्या ले। है जैद साःरो दाखमदच साःरो प्रिर्गुलल भाःकिन वाज़ नेथो ज़ खेर बान्या मालिनी।”

याइरसए ओज़ा स्रोनो भी भोन्या ओबेथा ल्यो मेंमा

(मर्कूस ५:२१-४३; लूका ८:४०-५६)

१८येसुए नो पाँर ओरासथैज्याक ज़ धर्मसास्त्र फ़िमलाव याघेप्पा तोबो हुद येसुए उखँत फुलुप्सिद, “मेंमा डाज़ा भर्जा ज़ सिद ले। नँ हुद नोए ओक्याँत नकुइ नैद नएकिन नो सैसिन्या ले,” है ओदोक ते, १९येसु ननी च्याँःसिद उसिसरास नोस बाकेर।

२०येमत याबाज्याक तोबो बाह बर्स भरी ओक्याँतिन भी भोन्या बेथाए क्योःद ओनैज्याव मेंमा येसुए उछींनी हुद ओक्वाए उतुपात छाप्दिक्यो। २१नो मेंमाए उयुँल उयुँल ‘येसुए ओक्वा वाज़ छापो डादैकिन आव बेथानी गरँन्या डाले’ है लिद ओखामिज्याव। २२येसु उछींदा फर्किद नोलाई रँःद, “अ माँज़ा, नयुँ होलाँ जैके, डालाई नयुँ नसुहुबोनी ज़ नगराँके,” है ओदोव प्राइँना ज़ नो मेंमा गराँके।

२३हाःत ज़ येसु उसिसरास नो धर्मसास्त्र फ़िमलाव याघेप्पाए उफ़िमक याकेस्क नो सिउए उजुँनी सहन यातपज्याव, चिर्लनी बिर्ल याघज्याव रँःद, २४येसुए नोरालाई, “लाँःदा बाचिके, लुज़ा मासिए, अइज़ डल्द ले,” है यादोक्यो। येसुए ओपाँ थैद हसैकेर। २५येसुए नोरालाई लाँःदा पुलुसो परींद ओल फ़िमल पसिद नो सिउ लुज़ालाई उकुइनी ओक्योःव प्राइँना थर च्याँःसिके। २६निताव अचम्बलाव पाँ नो खन्द भरिदा ज़ थास्नाके।

येसुए निमी मारैःवनिलाई रँःधुन्या उनिजैव

२७येसु ननी पुलुस्द ओबाज्याक नेब्लो निमी मारैःवनी उछीं उछीं बाद,

“अ दाऊदए ओथोलाव, गिनलाई नयुँ ओनाक,” लिद बनै चोइस किकिनी। २८येसु फिमल उपसितत नो निमी मारैःवनी ब ओल्योक ज़ हुकिनी। येसुए नोनिलाई, “डालाई ‘नसगराँसिन्धुया ज़’ लिद जिनयुँ माहुप्ज़्या?” है उनिदोक ते, “गिनयुँ हुप्ज़्या, प्रभु,” है दोकिनी। २९हाःत ज़ येसुए नोनिलाई निमीत छाप्दद्याद, “जिनयुँ उहुबो मिताव ज़ ओताक,” है उनिदोव प्राइँना, ३०रँःधुन्या ताकिनी। येसुए नोनिलाई फरी, “आव जिनक्याँताव डादोव येन सुए ज़ तासैरक,” है दाद निअर्थैक्यो। ३१नोनी भन ननी बाद येसुए ओदोव भरी प्राइँड ज़ है यारादोनाकिनी।

येसुए तोबो लातालाई पाँधुन्या ओजैव

३२नोनी निबाव छीनी फरी माचाव पुरूसए क्योःद ओनैज़्याव तोबो लातालाई येसुए ल्योक रैकेर। ३३येसुए नो माचाव पुरूस पलेःद ओयो प्राइँना ज़ नो लाता पाँधुन्या ताके। नो येनर रँःद नक लिज़्याव माहोल्याराए, “इताव येनर ते इस्माएलीराए गेपोल खर्क ज़ गेमारँःए!” लिद अचम्ब ताकेर। ३४फरिसी भरिए ते, “आवए माचाव

पुरूसराए याघेप्पाए उमिननी माचाव पुरूसर यापलेःज़्याव,” है लिकेर।

मिरालाई रँःद येसुए उयुँ ओनाव

३५येसु सहर सहर, नाखार नाखार यादुप्सिज़्याव धर्मसास्त्र फिम फिमक बाद परमेस्वरए ओराज्यालाव चाव था ब ओरासथैज़्याव, भाँती भाँतिलाव रोगनी याजोरो हुवरालाई मनी ओरासगराँज़्याव। ३६नो ओल्योदा हुज़्याव माहोल्यारालाई यागावला माल्यो यार्च्या सिद थलिउ बेधा स्यासोरालाई रँःद, येसुए उयुँ नाद, ३७उसिसरालाई है यादोक्यो, “तामर चिकार यामीःनाव मिताव, परमेस्वरए ओराज्याल हुन्यार कुधु ज़ ताद लेर। खाली नोरालाई रैन्या बाहोय्यार ते छ्या ज़ ताकेर। ३८है जैद नोरालाई रैन्या मिरँ ओरापरींवक लिद परमेस्वरलाई पोंखारिच्यो।”

येसुए उसिसरालाई ओरापरींव

(मर्कूस ३:१३-१६; ६:७-१३;

लूका ६:१२-१६; ६:१-६)

१० येसुए बाह्व जना उसिसरालाई खुल्द माचाव पुरूसर पलेःन्या सनो भाँती भाँतिलाव रोगनी सगराँन्या सक्तीर ब याएक्यो।

२नो बाह्व जना ओसाचीराए यामिनर आवर ज़ — प्राइरानी ड़ाताव उसिस पत्रुस यादोज्याव सिमोन, नकिन नोए ओभाइ अन्द्रियास, जब्दियाए ओज़ानी याकूब स़ोनो यूहन्नानी। ३नकिन फिलिप, बारथोलोमाइ, थोमा, सिर्मा स्यो-ज्याव मत्ती, अल्फयसए ओज़ा याकूब, थेदियस, ४देसभक्ता सिमोन स़ोनो छीनी येसुलाई धोका याज्याव यहूदा इस्करियोत।

५नो बाह्व जनारालाई येसुए अइ लिद यापरीक्यो, “जे जेबाक यहूदी-राकिन छुत जातलावराए ल्योदा ताबाच्यो, स़ोनो सामरीराए यासहरल ब तापसिच्यो। ६बुरू एकसब्दचा ज़ इस्राएली जातलाव डोइव बेधा स्यासोराए ल्योड ज़ बाच्यो। ७नड बाद पो पोड, ‘स्वर्गताव राज्या सो हुरिके’ है लिद यारासथैच्यो। ८याजोरो हुवरालाई ब यारासगराँच्यो, सिउरालाई याराजागैच्यो, कुरी-रालाई सोजोकाव ज़ याराजैच्यो, माचाव पुरूसर यारापले-च्यो। आव सक्ती भरी अइज़ जेदैके, अइज़ याराएच्यो। ९जेवाँ:फोत सुन चाँदीर पैसार तालाँच्यो। १०येमत जेबाक भैं ब तालाँच्यो, फेरैसिन्या क्वा ब तालाँच्यो, छुत पोला ब तालाँच्यो,

भुइ ब तालाँच्यो। जो येनत तादी ब येन दाज्यावए ज्याव दैव ज़।

११“फरी जो नाखारल जो सहरल तादी ब जेबाक जे लिन्या स्यासो सोजो मिँए उक्थिमक लिच्यो। ननी जेमापुलुसा पै नक ज़ लिच्यो। १२नो फ़िमल जेपसिक, ‘आव फ़िमलाई असिक ओताक,’ है लिच्यो। १३है जैद नो फ़िमलावराए जेलाई नैन्या स्यासोर यालिकिन नो जेदोव असिक नोरास ज़ ओताक। फरी नोर जेलाई नैन्या स्यासोर यामालिकिन नो जेदोव असिक नोरास ताताक। १४जोराए जेलाई ल्यो मायाद जेपाँ ब थैव यामाभै:किन नो फ़िमनी तादी ब सहरनी तादी ब जेपुलुस्क नो पोलाव जेखँताव गालो धुइरो नल ज़ थरैद ख्यानैद याराएच्यो। १५डा जेलाई साचो है डादाचिज्या, परमेस्वरए फाल्न्या छ्याम नो सहरलाव मिँराकिन बुरू सदोम स़ोनो गमोरालावरालाई सहिधुन्या तारिज्या।”

सम्जैन्या पाँर

(मर्कूस १३:६-१३; लूका २१:१२-१७)

१६“जे फरी जोगोइसिद बाच्यो। जेलाई प्रर मितावराए खार्ल बेधा

पाथा मितावर जैद डापरींचिऱ्या।
 है जैद जे सैन्यात घुल मिताव बाथो,
 दान्यात कुइतम मिताव लातो
 ताच्यो। १७ है जैद माचाव मिंराए
 ल्योनी जोगोइसिच्यो। नोराए जेलाई
 अदालतदा लाँद सूपिचिरिऱ्यार, धर्म-
 सास्त्र भिम भिमल रीःचिरिऱ्यार।
 १८ सोनो डा डाजूनी हाकिमर राजाराए
 डाक सच्याँद खोलेःचिरिऱ्यार। ननी ज़
 जे नोरालाई सोनो छुत जातलावरालाई
 डासाची यान्या जेले। १९ है जैद नोराए
 जेलाई यासूपिचिक, ‘डा कै लिन्या,
 काता पाँन्या ओताव’ लिद जेयुँ आँचा
 पाँचा ताजैच्यो। नो बेलाक जे पाँव
 परिन्या भरी परमेस्वरए ल्योनी ज़
 दैन्या जेले। २० नो बेलाक पाँन्यार जे
 माःक, परमेस्वर जेबाबुए छैव उपुरूस
 जेयाःत चुसिद पाँन्या ले।

२१ “हो बेलाक ओभाइए ओदाज्यु-
 लाई, ओबाबुए ओज़ालाई सैःन्या
 सजाल यारापारैरिऱ्यार। याबाबु
 याआमाकिन तँदा जैसिद याज़ाराए
 सैःन्या सजाल यारापारैरिऱ्यार। २२ जे
 डामिनतावर जेतावए जेलाई प्राइँए
 सोन्या लेर। खाली जो आव भरी
 ओमाखेमा पै थंरिऱ्या, होए अजम्बरी
 जुनी दैन्या ले। २३ जो नाखारल
 जेबाऱ्या होल जेखिरी यापसिकिन
 ननी हाइसिद छुत नाखारल धोंःच्यो।
 साचो है डादाचिऱ्या, जे इस्राएलीराए

यासहर भरिल आव येन जेमातुपैद ज़
 डा मिँ मिन्सिउ हुन्या डाले।”

२४ फरी, “उगुर्बाकिन उसिस घेप्पा
 माताए, ओयेन दाऱ्याव ब ओघर-
 पतीकिन घेप्पा माताए। २५ उसिस
 उगुर्बा ओतावक पै वाज़ ताऱ्या,
 ओनोकोर मनी ओघरपतीए ओहक
 भरी ओदैदी ब ओघरपती ओतावक
 पै वाज़ ताऱ्या। है जैद डा भिमए
 ओर्गेलाई ज़ माचाव पुरूसराए
 याघेप्पा ‘बालजिबुल’ है यादाँकिन
 भन जे डाभिमलावरालाई कै जैद है
 मादाचिरके?”

सु रँःद छेःन्या

(लूका १२:२-९)

२६ “है जैद जे नोरालाई रँःद
 ताछेःच्यो। नो बेलाक कप्सिउल
 लिऱ्याव भरी प्राइँए सैन्या लेर,
 मोसिउल लिऱ्याव भरी ब छर्लङ्ग ज़
 रँःरिऱ्यार। २७ है जैद जेलाई मोसिउ-
 लाव है डादाचिउ भरी जे पाखाड
 ज़ यारासथैनाच्यो। डाल्योनी जेर्नाल
 खुस खुसनी जेथैव भरी ब थालातिन
 यारासथैच्यो। २८ जेक्याँलाई वाज़
 सैःदचाऱ्यावर जेपुरूसलाई कैज़
 माजैधुऱ्याव मिँर रँःद ताछेःच्यो।
 बुरू जेपुरूस जेक्याँलाई नर्गल ख्याद
 चुयाप जैधुऱ्याव परमेस्वरलाई रँःद
 वाज़ छेःच्यो।

२६ “नेब्लो बिडज्या तपैसाल ओमाबिकैज्याव रो? बिडज्या ना: सोङ्गो ओतादी ब स्वर्गताव जेबाबुए ओमासैद तोबो ब नामल तेन्या माले। ३० होए जेडैताव जेचेम आ: लिज्या लिन्या ब सैज्याव। ३१ है जैद काताल ज़ ताछेच्यो। कुधु बिडज्याराकिन होए जेलाई घेप्पा रँ:चिज्याव।

३२ “है जैद जोए मिंराए डाक ओलाज माहुद ‘डा येसुसकाव ज़’ है लिज्या, डा ब नोलाई स्वर्गताव डाबाबुए ओडाक ‘डासकाव ज़’ है दान्या डाले। ३३ हो मिताव ज़ फरी जोए मिंराए डाक ‘डा येसुसकाव मा:क’ है लिज्या, डा मनी स्वर्गताव डाबाबुए ओडाक ‘आव डासकाव मा:क’ है दान्या डाले।”

सिसए फो:व परिन्या ए:

(लूका १२:५१-५३; १४:२६-२७)

३४ “जे डालाई ‘आव मानुवाताव मिंरालाई सखैना हुव लिज्या’ है तालिच्यो। डा ते भन जेखार्ल तरवाली रैद डाहुव मिताव लिज्या। ३५ आव डापाँए ज़ा बाबुनिलाई माखैव निजैरिज्याव। हिताव ज़ ज़ा-मा तादी ब, फुबु भदै तादी ब माखैव याजैरिज्याव, ३६ सोनो

यासुतुर याभिमल ज़ तान्या ले। ३७ जोए डाकिन ओबाबु ओआमानी निल्योदा उयुं थू ओजैकिन नो डासकाव तान्या स्यासो माले। सोनो डाकिन ओजाराए ल्योदा उयुं थू ओजैकिन हो ब हिताव ज़ ताज्या। ३८ है जैद जोए कुसत सिन्या मिताव दुखर सहिउ माभै:द डाछींत ओमाहुकिन नो डासकाव तान्या स्यासो माले। ३९ जोए आव उजिउत ओललाई तान्या वाज़ खिम्ज्याव, होए उजुनीलाई समैज्याव। फरी जोए आव उजिउत उजिउए मया मादाद डा डाजूनी दोज्याव, होए जुनी दैरिज्याव।”

सिसए दैन्या इनाम

(मर्कूस ९:४१)

४० “जे परमेस्वरए ओपाँ जेरासथै-नाक जोए जेलाई ल्यो याचिज्याव, होए डालाई ब ल्यो ओयाँव मिताव ज़ लिज्या। नो डालाई वाज़ मा:क, डालाई परीज्यावलाई मनी ल्यो ओयो मिताव ज़ ताज्या। ४१ जोए अगमबक्तालाई ओयेन सरेस्द उभिमक ल्यो एज्याव, नोए मनी नो अगमबक्ताए ओदैरिज्याव मिताव ओल ब दैन्या ले। हो मिताव ज़

जोए धर्मी मिँलाई ओयेन सरेस्द उक्किमक हुव एज्याव, होए मनी नो धर्मीए ओदैरिज्याव मिताव ओल ब दैन्या ले। ४२ डा जेलाई साचो है डादाचिज्या, जोए जिम्ज़ारालाई तादी ब डासकावर याल्यो लिद सरेस्द तुखुरी स्रोमो री वाज़ ओराएदी ब नोए उइनाम जुनी ब दैन्या ज़ ले।”

११ येसुए बाह्व जना उसिस-रालाई आव पाँ भरी है दाद ओरापरींवत ओल मनी नलाव सहर सहर, नाखार नाखार जीदा परमेस्वरए ओपाँ यासथैनाक्यो।

यूहन्नाए येसुए उजूनी उसुधिउ पाँ

(लूका ७:१८-२३)

२रील सछैँज्याव यूहन्ना भयाल-खानाल उलिज्याक ज़ ख्रीसए ओयेन भरी थैद तोबो नेब्लो उसिसरालाई येसुए ल्योक, ३“नो धर्मसास्त्रलाव सर्सिउ ‘हुरिज्या’ है यालिज्याव नँ ज़ रो, सैं छुतलाई कीन्या?” है दोनाव यापरींक्यो। ४येसुए नो है यादोव थैद नोरालाई, “आव डादोव जेरैःव जेथैव भरी यूहन्नालाई है दोच्यो। ५‘यामी मारैःवरालाई सरैःद याएज्याव, माबा-धुन्यारालाई बाधुन्या याजैज्याव,

कुरीरालाई यासगराँज्याव, याना माथासोरालाई थैधुन्या याजैज्याव, सिउरालाई याजागैज्याव, गरीबरालाई ब परमेस्वरए ओपाँ यासथैज्याव,’ है दोनाच्यो। ६डालाई रँःद यायुँ माकेःज्यावर असिक दैवर लिज्यार,” है दाद यापरींक्यो।

यूहन्नाए उजूनी येसुए ओपाँ

(लूका ७:२४-३५)

७नोर याबाव छीनी येसुए माहोल्या-रालाई यूहन्नाए उजूनी अइ यादोक्यो, “जे यूहन्नाए ल्योक बनल जेबाक नोलाई किताव जेरैःया? बतासए आदा फुलुपनी होदा फुलुप ओजैज्याव छी स्यासो ते जेमारैःखेहो। ८हिताव ओमालिकिन किताव जेरैःया? सैं बनै चाव चाव क्वा क्वाइसिउ मिँलाई जेरैःव? निताव क्वा क्वाइसिज्यावर ते दरबारल वाज़ लिज्यार सानी। ९है जैद ओल्योक जेबाक नोलाई किताव जेरैःया? अगमबक्ता ज़ जेरैःखेहो सानी। डा फरी है डादाचिज्या, अगमबक्ता-किन भन घेप्पालाई ज़ जेरैःके। १०नो यूहन्ना धर्मसास्त्रलाव सर्सिउ मिँ ज़। नोए उजूनी सर्सिउ आव ज़, ‘डाकत्वाल्यालाई नड़ा नड़ा परींद डाईज्या।

नजूनी नोए नडादा ज़

नयेम तयार जैदीरिज़्याव।'

११ है जैद डा जेलाई है डादाचिज़्या, मिंनी जर्मिउ भरिरानी रील सछैंज़्याव यूहन्नाकिन घेप्पा सु ज़ माले। हैदी ब स्वर्गताव राज्यालाव गोईनी ताकिन ते प्राइरानी जिम्ज़ा नोकिन घेप्पा लिज़्या। १२ है जैद रील सछैंज़्याव यूहन्नाए ओरासथैहुवकिन आक पै ज़ मिंर स्वर्गताव राज्याल पसिन्याए जूनी याजिउ च्यो च्यो भाःद काला मुलु छुइसिनाज़्यार। फरी तँदा जैसिज़्यावर नोलाई हारैद वैन्या बनै धामा दोज़्यार। १३ मोसाए ओसरो कानुनलाव सोनो अगमबक्ताराए यापालाकिन यूहन्नाए ओपाला पैकाव यापाँव भरी ब हुज़्याव ख्रीसए उजूनी ज़ ओल्यो। १४ सोनो आव ब जेमातीधुरिज़्या, नो ख्रीसकिन डादा हरिज़्या है यालिज़्याव एलिया ते नो यूहन्ना ज़। १५ आव पाँ जोए थैन्या उयुं लिज़्या, चावस ओथैवक।”

१६ येसुए फरी, “आव बेलाकाव मिंर कितावर यालिज़्याव लिक ते, बजार खार्ल रैःसिज़्याव लुज़ा स्यासोर लिज़्यार। १७ नोर यानैरास गन्गनैद,

‘बाँसुली तपद गयाचिक ब

जेमास्याके,

लंसिद गयाचिक ब जेमाघर्के।’

१८ हो मिताव ज़ रील सछैंज़्याव यूहन्नाए ज्यान्यार ओमाज़्युक, ओन्यार ओमाओक नोलाई ‘दैनी परिद ले’ है दोज़्यार। १९ डा मिं मिन्सिद हुवए फरी ज्यान्यार डाज़्युक, ओन्यार डाओक, ‘चिऊचिके, काता ज़ मानैज़्याव ज्यास्ती, दाखमदच ओए ओए बारिज़्याव, सिर्मा स्योःज़्याव पापीराए यानै’ है दाँज़्यार। हैदी ब डा डागहक थोरिउ लिज़्या लिन्या डायेनए ज़ थरैःज़्याव।”

यायुं माफकैःज़्याव सहरर

(लूका १०:१३-१५)

२० नकिन येसुए अचम्बलाव ओयेन सतैद ओरायो सहरलाव मिंराए यायुं यामाफकैवनी नोरालाई अइ लिद यासिडाक्यो, २१ “जे खोराजीन सोनो बेथसेदालावरालाई थैए माँतकन ज़ लिज़्या। जे जेरैःव परमेस्वरए ओसक्तीलाव येनर तुरोस सोनो सीदोनलावराए^१ यारैःव ताकिन आः भरी यापापए जूनी यायुं माचाव दाद

^१११:२१ तुरोस सोनो सीदोन सहरलाव माचाव येन दोज़्याव छुत जातलाव मिंराकिन यहूदीर यासघ्योःसिज़्याव।

११:१० मला ३:१ ११:१४ मला ४:५

बर्ला सुर्सिद धुलील चुसिद यायुँ फकैद यापापर रास्थुखेरहो। २२ है जैद परमेस्वरए फाल्न्या छचाम जेकिन बुरू तुरोस सोनो सीदोनलावरालाई सहिधुन्या तारिज्या।

२३ “हिताव ज़ फरी जे कफर्नहुम-लाव मिँर, स्वर्गत केसो मितावर जेडम्सिज्या, भन नर्गल ज़ बान्या जेले। जेल्योडाव अचम्बलाव येनर सदोम सहरल सतैद डारायो ताकिन नो सहर आःपै रहिन्या ओल्यो। २४ है जैद जेलाई है डादाचिज्या, परमेस्वरए फाल्न्या छचाम जेकिन बुरू सदोमलावरालाई सहिधुन्या तारिज्या।”

“डाल्योक हुद जेर्सा नैचिके”

(लूका १०:२१-२२)

२५ नाःत ज़ येसुए परमेस्वरलाई, “अ बाबु, नाम नमलावराए याडैताव, नँलाई धन्याबाद डाचरैःनिज्या। नँ नपाँर सैन्या जैसिज्यावर, याबुद्धी ल्यो जैसिज्यावरालाई सतैद मायाद, भाउज़ा मितावरालाई सतैद नराएके। २६ है ज़ बाबु, नल्योदा बान्या येम नो ज़ चाव नथरैके,” है लिद पोंखारिक्यो।

२७ नकिन येसुए, “ताव भरी डाबाबुए डाकुइत ज़ याद नैनाव। किताव परमेस्वरए वाज़ ओज़ालाई सरेस्ज्याव, हिताव ज़ ओज़ाए वाज़ परमेस्वरलाई सरेस्ज्याव। है जैद डा छुतलाई सतैद डाएकिन वाज़ होए परमेस्वर डाबाबुलाई सरेस्थुज्याव। २८ जे वीनी फुइ ताद थलिद लिज्यावर, डाल्योक हुद जेर्सा नैचिके, डा जेयुँर होलाँ जैदचान्या डाले। २९ डाकुम नधेल भाःद डास सिऊसिन्के। डा डायुँ ग़ालो सोनो डायुँ नाज्याव डालिज्या। है जैद जे डाल्योक जेहुकिन जेस० होलाँ तान्या ले। ३० डाकुम ब सजालो लिज्या, डागुर ब बोमो लिज्या,” है यादोक्यो।

येसु न्नासिन्या छचामकिन घेप्पा ज़

(मर्कस २:२३-२८; लूका ६:१-५)

१२ हो बेलाक तछा न्नासिन्या छचाम येसु उसिसरास एँः खालाव घ्याँ याबाज्याक उसिसर याकरेए बाला फ्याःद याकैज्याव। २ फरिसीराए निताव रँःद येसुलाई, “चिऊके, नसिसराए न्नासिन्या छचाम मादान्या येन ज़ दोज्यार,” है यादोक ते, ३ येसुए, “धर्मसास्त्रलाव सर्सिउ

दाऊद राजा ओनैरास याकरेकाव यादोव येन जेमापरिए रो? ४ दाऊद ध्यान फिमल पसिद परमेस्वरलाई चरै:सिउ भरेस हाइद ओनैरास भा:द ज्युकेर। नो भरेस पुजारीराए वाज्र ज्यान्या ओताज्याव, दाऊद ओनैरास ज्यान्या ओमाताज्याव। ५ काता मोसाए ओकानुन जेमापरिए रो? नासिन्या छचाम ध्यान फिमल पुजारीराए येन दाद कानुनलाई बले:ज्यार। कानुननी फरी नोराए याखत ते माले। ६ डा फरी जेलाई साचो है डादाचिज्या, ध्यान फिमकिन घेप्पा तोबो आक लिज्या। ७ जे धर्मसास्त्रलाव सर्सिउ 'पाथा पल्द चरै:ज्यावरास मा:क, यादया ल्योरास डायुं होलां ताज्या' परमेस्वरए है ओल्यो पांर जेथ:रैधुव ताकिन जे ब जेदया ल्योर तान्या जेल्यो। ८ डा मिं मिन्सिद हुव नासिन्या छचामकिन ब घेप्पा ज़ डालिज्या," है यादोक्यो।

येसुए उकुइ थँवलाई ओसगराँव

(मर्कस ३:१-६; लूका ६:६-११)

६ येसु ननी पुलुस्द नोराए याधर्म-सास्त्र फिमल बाके। १० नल उकुइ थँव मिं तोबो उलिज्याव। नल लिज्यावराए येसुए ओपाहा भा:दचान्याए जूनी येसुलाई, "नासिन्या छचाम ओजोरो

हुवलाई सगराँन्या ओताज्याव सैं ओमाताज्याव?" है यादोक ते, ११ येसुए, "जे सुवाराए तोबो जेबेधा नासिन्या छचाम भल्खादाल ओतेकिन होल ज़ जेमानैज्याखेहो, जेहाइज्या-खेहो सानी। १२ बेधाराकिन मिंर घेप्पाल गनिसिउर लिज्यार। है जैद नासिन्या छचाम कानुनलाव सर्सिउ मिताव मिंए जूनी चाव दाव परिके," है दाद, १३ नो उकुइ थँवलाई, "नकुइ तङ्गके," है दोक्यो। नोए उकुइ ओतङ्गैव प्राइँना तँनिकाव उकुइ स्यासो सोजोकाव ज़ ताके। १४ नो फरिसीराए निताव रँ:द लाँ:दा पुलुस्द, 'आवलाई कै जैद सै:न्या ओताव?' लिद गुमुस्ता दोनाकेर।

येसु परमेस्वरनी छाँतिसिउ ज़

१५ येसुए नो सै:व यापैज्याव सैंद ननी हाइसिद छुतड बाके। ओलस बावर ब बनै माहोल्या ज़ यालिज्याव। नलाव याजोरो हुव भरिलाई ब यासगराँक्यो। १६ फरी नोरालाई, "आव जेक्याँताव डादोव येन सुलाई ज़ है तारादोच्यो," है यादोक्यो। १७ ननी ज़ यसैया अगम-बक्ताए ओसरो ब यो:के। नोए ओसरो आव ज़,

- १८ “आव छाँतिद डानैज़्याव डायुँलाव
डानोकोरलाई चिऊचिके।
नोलाई रँ:द डायुँ होलाँ ताज़्या।
नोए ओक्याँत ज़ डापुरूस
डानैरिज़्या,
नोए प्राइँ जातलाव मिँरालाई
सतलाव पाँ सथैन्या ले।
- १९ नो सुस ज़ इंसिन्या माले,
बजार जीदा ब स्याप स्याप
ख्यान्या माले।
- २० बुरू कान्ल ज़ मागनिसिउरालाई
यायुँ के:दचान्या माले,
यायुँ स्यासे तेवरालाई ब
यायुँ होलाँ जैदचान्या ले।
सतलाव ओयेन ओमासभे:वा पै
नो येन दाव ज़ नैन्या ले।
- २१ है जैद प्राइँ जातलाव मिँराए
होए ओक्याँत ज़
आस दान्या लेर।”

येसुलाई सैताननिकाव याजैव

(मर्कूस ३:२०-३०;

लूका ११:१४-२३; १२:१०)

२२ हा: बेलाक ज़ माचाव पुरूसए
क्यो:द ओनैज़्याव तोबो मिँलाई येसुए
ल्योक रैकेर। नो मिँ उमी मारै:व लाता
उलिज़्याव। येसुए नोलाई ओसगराँवत
उमी ब रँ:के, पाँधुन्या ब ताके।

२३ नो येन रँ:द माहोल्यार अचम्ब ताद,
“आव ज़ सा, दाऊदए ओथोलाव
‘हुरिज़्या’ है यालिज़्याव ख्रीस?”
है यालिज़्याव। २४ फरिसीराए थैद,
“आव ते भन माचाव पुरूसराए
याघेप्पा बालजिबुलए उमिननी
माचाव पुरूसर पले-ज़्याव ची,” है
यारादोकेर।

२५ येसुए नोराए यायुँलाव पाँ
सैद, “तोबो राज्यालाव मिँर या
या यामाखैकिन राज्याए उमिन
ज़ माज़्या। हो मित्ताव ज़ तोबो
सहरलावर तादी ब तोबो फ़िमलावर
तादी ब या या यामाखैकिन चितराँ
पुतराँ तान्या लेर। २६ है जैद सैतानए
ओराज्यालावर ब या या माखैद
तोबोए तोबोलाई ओपले-किन होए
ओराज्या कातानी उरहिरिज़्याव?
२७ डा बालजिबुलए उमिननी माचाव
पुरूसर डारापले-ज़्याव ताकिन
जेसकावराए कातानी यारापले-ज़्याव?
है जैद नो जेपाँ जेसकावराए ज़ जेडैत
फुलुपदचान्या लेर। २८ खाली डा
परमेस्वरए उपुरूसनी डारापले-ज़्याव
ताकिन परमेस्वरए ओराज्या जेखाल
ज़ हुद ले। २९ फरी तोबो ओर्सा ल्यो
मिँलाई ड़ादा यामाकिवा पै उफ़िम
पा-द ओजा-यार हाइद मालाँधुर।

३०“जो डास माखैए नो डाकिन तँदाडाव ज़ लिज़्या। हिताव ज़ फरी जोए डाल्योदा मारारैव, होए डाकिन तँदा ज़ याख्यानाज़्याव। ३१ है जैद डा जेलाई साचो है डादाचिज़्या, मिंराए जो पाप यादोदी ब, परमेस्वरए उमिन याबले-दी ब नोराए यापाप क्यालो दैसिए। खाली जोए परमेस्वरए छैव उपुरूसए उमिन बले-दिज़्याव, होए ओपाप क्यालो मादैसिए। ३२ हो मिताव ज़ जोए डा मिं मिन्सिद हुवए डाडैत माचाहिउ पाँर भाःद डामिन बले-ज़्याव, होए ओपाप क्यालो दैसिए। खाली जोए परमेस्वरए छैव उपुरूसए उमिन बले-द ओएकिन, नो पाप आव जुनील तादी ब अजम्बरी जुनील तादी ब क्यालो मादैसिए।”

गराँव सीं स्रोनो काना सींनी

(लूका ६:४३-४५)

३३“गराँव सीं ताकिन ओसै ब गराँव ज़ ताज़्या। काना सीं ताकिन ओसै ब काना ज़ ताज़्या। है जैद सींलाई ओसैनी ज़ सरेस्सिए। ३४ हिताव ज़ जे घुलए ओथोर, माचाव जेयुँनी कातानी ची चाव जेपले-धुरिज़्याव? युँल किताव लिज़्या याःनी ब हिताव ज़ हुज़्या। ३५ चाव मिंए उयुँनी चाव

वाज़ हुज़्या, माचाव मिंए उयुँनी माचाव वाज़ हुज़्या। ३६ डा साचो है डादाचिज़्या, मिंराए यापाँव माचाहिउ पाँ भरी तछा परमेस्वरए ओडाक फाल्सिन्या छचाम नो भरी थःरैव परिरिज़्या। ३७ है जैद हो छचाम धर्मी थःरिन्या सैं पापी थःरिन्या जेसाची जेपाँ ज़ तारिज़्या।”

सरेस खिम्ज़्यावर

(मर्कूस ८:११-१२; लूका ११:२६-३२)

३८ हाःत ज़ नक लिज़्याव सास्त्रीर स्रोनो फरिसीराए, “अ गुर्बा, गेलाई नसरेस तोबो सतैदचासिके,” है यादोक ते, ३९ येसुए, “जे आव जुक-लाव जेयुँ माहुबो पापीराए सरेस वाज़ जेखिम्ज़्या। खाली जेदैरि-ज़्याव सरेस ते योना अगमबक्ताए ओक्याँत ताव सरेस वाज़ जेदैरिज़्या। ४० किताव योना नो घेप्पा डाँःए उफूल स्रोला स्रोरी ओल्यो, हिताव ज़ डा मिं मिन्सिउ मनी नाम जींल स्रोला स्रोरी डालिरिज़्या। ४१ निनवे सहरलाव मिंराए योनाए ओरासथैव पाँर थैद परमेस्वरए ल्योदा यायुँ फकैकेर। खाली जे ते भन जेखार्ल हुद लिज़्याव योनाकिन घेप्पाए ओसथैचिक ब परमेस्वरए ल्योदा

जेयुँ जेमाफर्केके। है जैद परमेस्वरए
मिँरालाई ओराफाल्रिज़्याव छचाम
नो डादाडाव मिँराए यायुँ याफर्केवनी
ज़ जेगलती थंरिरिज़्या। ४२हिताव ज़
नो दखिन देसलाव रानीए परमेस्वरए
ओपाँ सोलोमनए ओयाःनी थैना बनै
तादानी हुके। जे जेखाल हद लिज़्याव
ते सोलोमनकिन भन घेप्पा लिज़्या।
है जैद परमेस्वरए ओराफाल्रिज़्याव
छचाम आव बेलाकाव मिँराए
यागलती नो रानीए ओक्याँनी ज़
थंरिरिज़्या।”

ओल्द हुज़्याव माचाव पुरूस

(लूका ११:२४-२६)

४३“मिँनी पलेसिउ माचाव पुरूस
नो मिँए ओक्याँनी उपुलुसोत री
माल्यो साइँसुइँवक नासिन्या पो
खिम्नाज़्याव। लिन्या पो ओमादैकिन,
४४फरी ओल्द डादाडाव उपुलुसोए
ओक्याँत ज़ पसिउ पैँज़्याव। नल
ओबाक स्यासी जैद थिक थाक
जैसिउ खाली पो रँ:द, ४५ओलकिन
माचाव पुरूसर सात गोता ओलस रैद
नल पसिद नो मिँलाई डादाडावकिन
भन ज़ माचावए क्योःज़्याव।
आज्यालकाव पापी मिँर ब हिताव ज़
जेतारिज़्या।”

येसुए ओआमार ओभाइर

(मर्कस ३:३१-३५; लूका ८:१६-२१)

४६येसु नो माहोल्यारास ओपाँज़्याक
ज़ ओआमा सोनो ओभाइर हुद लाँ:क
च्याँ:सिद येसुलाई किउ यारापरीकेर।
४७ननी येसुए ल्योक तोबो बाद,
“लाँ:क नआमा सोनो नभाइर
नँस दैसिना हुद लेर,” है ओदोक
ते, ४८येसुए नो है दाना हुवलाई,
“डाआमार डाभाइर कितावर?” है
लिद, ४९उकुइ उसिसराए ल्योदा छों
जैद, “चिऊके, डाआमार डाभाइर
आवर ज़। ५०जोराए स्वर्गताव
डाबाबुए ओपाँ थैद दोज़्यार, होर ज़
डाआमार डाभाइ बैनीर ताज़्यार,” है
लिके।

धुर वास्न्या घर्ती

(मर्कस ४:१-६; लूका ८:४-८)

१३ हो छचाम येसु नो फिमनी
पुलुस्द दह छचोक बाद
चुसिद उलिज़्याक, २ल्यो माल्यो
मिँर ओल्योक छुइसिहुकेर। है जैद
येसु दोङ्गाल चुसिद दोङ्गालाई रील
छचावा होकसै लाँक्यो। माहोल्या
भरी ओङ्गक दह छचोक च्याँ:सिकेर।
३येसुए नोरालाई ओपाँ घर्ती भा:द

यासथैक्यो। तोबो ओरासथैव आव
ज़, “तोबो मिं ओएँःल धुर वास्ना
बाके दी। ४ धुर ओवास्ज़्याक रूवा
येम जीदा परिके दी। नो येमलाव
परिउ बाज़ाराए ज्युकेर दी। ५ रूवा
धुर गम छ्या छ्या ल्यो ओदादरत
परिके दी। नत गम छ्या छ्या वाज़
ल्यो ओतावए हतप्त ज़ परीके दी।
६ खाली निमी ओसोराक उहुवत
ओजरा नाम जील ओमाल्योए
च्याकराप चिकुरूप थँके दी। ७ फरी
रूवा धुर जुर रमराए खार्ल परिके
दी। नोलाई जुर रमराए गाल्क्यो दी।
८ फरी रूवा धुर ते चाव गमस्याल
परिके दी। नो ओसै बनै भाःद
रूवात तीस, रूवात साथी, रूवात
सय दोबोर यासै भाःकेर दी। ९ आव
पाँ जोए थैन्या उयुं लिज़्या, चावस
ओथैवक।”

थैज़्यावत ब मातीधुर

(मर्कूस ४:१०-१२; लूका ८:९-१०)

१० येसुए उसिसर ओल्योक हुद,
“काराव मिंरालाई घर्ती भाःद वाज़
नरासथैज़्याव?” है यादोक ते,
११ येसुए, “जेलाई वाज़ स्वर्गताव
राज्यालाव कप्सिउ पाँर छर्लङ्ग
सतैंसिउ लिज़्या, उपुर्कावरालाई ते

मोंसिउ मिताव लिज़्या। १२ है जैद
जोए परमेस्वरए ओपाँ रैद नैव, होए
भन ज़ तीधुन्या ले। जोए परमेस्वरए
ओपाँ माभैःए, होए ओरैव ब ओपोःस
ज़ मान्या ले। १३ होए उजूनी ज़
घर्ती भाःद डारासथैज़्याव। नोराए
रँःज़्यावत ब मारँःधुर, थैज़्यावत ब
मातीधुर। १४ नितावराए जूनी डादा ज़
यसैयाए धर्मसास्त्रल अइ लिद सर्द
नैद यायो,

‘थैन्या ते जेथैज़्या, जेमातीधुइ।

रँःन्या ते जेरँःज़्या, जेमासरेस्धुइ।

१५ आवराए यायुं काता ज़

मातीधुन्या भुत्यासो ताद ले।

यार्ना ब सूइसिउ मिताव ताद ले।

यामी ब चिम जैद यानैज़्याव

मिताव लिज़्या।

निताव यामाताव ताकिन आः

भरी यामीए रँःधुखेरहो,

यार्नाए थैधुखेरहो,

यायुंल तीधुखेरहो।

डाल्योदा यायुं ते फकैँधुखेरहो।

सोजोकावर ब डाराजैधुखेहो।’

१६ जे ते परमेस्वर दाइनो तावर
जेलिज़्या, जेमीए ब जेरँःधुज़्या, जेर्नाए
ब जेथैधुज़्या। १७ जेलाई साचो है
डादाचिज़्या, अगमबक्त्तार, घेप्पा धर्मी
मिंराए ब आव जे जेरँःव पाँर रँःन्याए

जूनी यायुं थू जैद ब रँ:व मादैकेर,
थैन्या युं दाद ब थैव मादैकेर।”

धुर वास्सिउ घर्तीए ओअर्थ

(मर्कूस ४:१३-२०; लूका ८:११-१५)

१८“है जैद जे नो धुर वास्सिउ घर्तीए ओअर्थ थैचिके। १९जोए परमेस्वरए ओराज्यालाव पाँ थैद ओमाबुभि-धुकिन, सैतान ओल्योक हुद उयुंलाव वास्सिउ पाँ भरी स्याप सिप जैद लाँदिज्याव। नो ज़ नो येमलाव परिउ धुर। २०फरी नो ओदादरताव परिउ आव ज़, जोए परमेस्वरए ओपाँ थैद बेहार ज़ तीद खुसी ब ताज्या। २१खाली नो मिँ परमेस्वरए ओपाँत उयुंल ओजरा माल्यो मिताव ओतावए नो पाँ छ्यावा पै वाज़ रहिज्या। नो पाँनी नोए ओक्याँत खिरीर उपसिकिन दुखर ओदैकिन नो पाँत उयुं क्य़ाज्या। २२फरी नो ज़ुर रमराए खालाँव परिउ धुर आव ज़, जोए परमेस्वरए ओपाँ ते थैज्याव, खाली धन सम्पतीदा उयुं थू जैद ‘आव डाजिउत कै तान्या ओताव’ लिद वीनी फुइ ब लिज्या। है जैद नितावराए परमेस्वरए ओपाँलाई यागालोए नो पाँ ओसै माभा:ज्याव ताज्या। २३फरी नो चाव गमस्याल परिउ धुर आव ज़, जो मिँए परमेस्वरए ओपाँ थैद चावस उतीकिन नो मिँ परमेस्वरए ओराज्याल ख्वात तीस,

ख्वात साथी, ख्वात सय दोबोर ओसै भा:ज्याव धुर स्यासो ज़ ताज्या।”

ताम खार्ल खु वास्सिउ घर्ती

२४नकिन येसुए फरी तोबो घर्ती भा:द अइ लिद यासथैक्यो, “स्वर्गताव राज्या किताव उलिज्याव लिक ते, तोबो मिँए ओएँ:ल बनै चाव धुर ओवासो मिताव लिज्या। २५नो ओवासोत तछा रील ओल स्याँद उलिज्याक उसुतुर हुद ओएँ:लाव ओवासो धुर खार्ल खु वास्द ख्यानैदिक्यो दी। २६छीनी नो धुर परीद ओबालार ओभा:वत नल खुर ब रँ:केर दी। २७नो एँ:ए ओर्गेए ओयेन दाज्यावर याघरपतीए ल्योक हुद, ‘आव नएँ:ल ते चाव धुर वाज़ नवास्ज्याव सानी, आव खुर कातानी याहुव ओताव?’ है यादोक ते, २८नो याघरपतीए, ‘काताकाव डासुतुर हुद खु ओवासो ताखेहो,’ है यादोक्यो दी। ओयेन दाज्यावराए फरी, ‘कै नलिज्या? नो खुर गेराखुलकैना रो?’ है यादोक ते, २९‘खुलकैन्या मा:क, नोलाई जेखुलकैक कसाराक तामर ब जेराखुलकैया। ३०क्या:न्या बेला ओमातावा पै निताव ज़ घलिज्याक, सिप सिप ज़ घमी:रक। यामी:वत क्य़ा:ना बाज्यावरालाई ड़ादा खु भरी खुलकैव परींद पोला पोला

जैद मेंःल मुव डारापरीरिज़्या। ताम भरिलाई ते सिमद दहरा बुमल भाःव डारापरीरिज़्या, है यादोक्यो दी।”

बाजीए उधुर सोनो भरेस
सोगोइन्या वासः

(मर्कस ४:३०-३४; लूका १३:१८-२१)

३१नकिन येसुए फरी तोबो घर्तीनी अइ लिद यासथैक्यो, “स्वर्गताव राज्या तोबो मिँए बाजीए उधुर बारील ओभाःव मिताव लिज़्या। ३२नो धुर प्राइरानी तकेज़ा ओतादी ब, परीद ओघ्योःवत नो बारीलाव डैराकिन प्राइरानी घेप्पा ताद नोए ओखारत नमताव भुज़्याव बाज़ार सिपर जैद बासिज़्यार।†

३३“हिताव ज़ फरी स्वर्गताव राज्या भरेस सोगोइन्या वासः स्यासो ब लिज़्या। सोःसेमे मुछिसिउ कनेल तोचोप भाःदी ब प्राइँ सरालिज़्याव।”

३४येसुए माहोल्यारालाई ओपाँ ओरासथैक घर्ती ओमाभाःवा पै ओमारासथैज़्याव। ३५ननी ज़ अगमबक्ताए धर्मसास्त्रलाव ओसरो योःके। नोए ओसरो आव ज़,

“डापाँ भरी घर्तीर भाःद
डारासथैरिज़्या।

नाम नम ओतावकिनकाव
कप्सिउ पाँ ब
सतैदचान्या डाले।”

ताम खार्लाव खुए ओअर्थ

३६नकिन येसुए नो माहोल्यारालाई ख्यानैद फिमल बाके। उसिसर ओल्योक हुद, “गुर्बा, नो आछ्याकाव नभाःव एँःलाव खुए ओअर्थ गेलाई पलास्दचाव ताके,” है यादोक ते, ३७येसुए, “नो चाव धुर वास्ना बाज़्याव मिँ मिन्सिउ ख्रीस ज़। ३८एँः आव मानुवा ज़। नो चाव धुर परमेस्वरए ओराज्यालाव मिँर ज़। नो खु फरी, सैतानए उमीर ज़। ३९नो खु वास्ज़्याव उसुतुर ओल सैतान ज़। नो क्याःन्या बेला आव जुक खेम्न्या बेला ज़। नो क्याःना बाज़्यावर परमेस्वरए ओचाकज्यार ज़। ४०किताव नो एँःए ओगेए खु भरी खुल्कैद मेंःल मुज़्याव, हिताव ज़ आव जुक ओखेमोत, ४१डा मिँ मिन्सिद हुवए स्वर्गताव डाचाकज्यारालाई डारापरीरिज़्या। नोराए बलेःज़्यावर, अधर्म दाज़्यावरालाई दुप्द परमेस्वरए ओराज्यानी पलेःद, ४२मेंःए मुल्काल

† १३:३२ मर्क ४:३०-३२ चिऊन्या।

१३:३५ भज ७८:२

याराख्यारिज़्यार। नल याहार डर डर कैद चिर्लनी बिर्ल घन्या लेर। ४३ धर्मी भरी ते परमेस्वर याबाबुए ओराज्याल निमी मिताव फ़ार फ़ारोर तारिज़्यार। आव पाँ जोए थैन्या उयुँ लिज़्या, चावस ओथैवक।”

एँःल गादैसिउ गदान्त

४४ “फ़री, स्वर्गताव राज्या तोबो एँःल गादैसिउ गदान्त मिताव ब लिज़्या। नोलाई तोबो मिँए ओदैकिन नो एँःए ओएः ओमासुदुमा पै पाखात मापलेद नल ज़ नैज़्याव। नो बनै रेंए रेंए उफ़िमदा बाद ओलसकाव लिज़्याव भरी योद नो गदान्त ल्यो एँःलाई लँःज़्याव।”

असली हिरामुती

४५ “फ़री, स्वर्गताव राज्या तोबो बेपारीए असली हिरामुती उखिम्ज़्याव मिताव लिज़्या। ४६ नोए बनै ओएः ल्यो ओदैकिन ओलसकाव लिज़्याव भरी योद तादी ब लँःज़्याव।”

जाल रैःसिन्या घर्ती

४७ “फ़री, स्वर्गताव राज्या तोबो जाल रैःसिज़्यावए दहल जाल ओख्याव मिताव लिज़्या। नो ओजाल ओस्रेल्क चाव माचाव डॉः भरी स्याप सिप जैद यारैज़्याव। ४८ नो जाल दहनी

ओहाइवत चुसिद चाव भरी ओजाल भाःद माचाव भरी याख्याज़्याव। ४९ आव जुक खेम्न्या बेला ब हिताव ज़ तारिज़्या। परमेस्वरए ओचाकज्यार हुद धर्मीराए खालाव लिज़्याव पापीरालाई स्लेल्द, ५० मेंःए मुल्काल याराख्यारिज़्यार। नल याहार डर डर कैद चिर्लनी बिर्ल घन्या लेर।”

५१ नकिन येसुए उसिसरालाई, “आव डापाँव भरी जेमातीया?” है ओरादोक ते, “गेतीके,” है दोकेर। ५२ येसुए फ़री, “चाव ताके। धर्मसास्त्रलाव पाँ सैँज़्याव सास्त्री स्वर्गताव राज्यालाव पाँ ब उसिऊसिकिन तोबो बनै धनी मिँ स्यासो ताज़्या। नोए उफ़िमनी बनै याएः ल्योर, साःरोर पुराँदोर पुलुस्न्या लेर।”

येसुलाई ओमान नैद यामायो

(मर्कूस ६:१-६; लूका ४:१६-३०)

५३ येसुए आव घर्तीलाव ओपाँ भरी तुपैद ननी पुलुस्द, ५४ ओल ओनाखारल बाद नलाव धर्मसास्त्र फ़िमल ब परमेस्वरए ओपाँ यासथैक्यो। नलावर येसुए ओपाँ थैद अचम्ब ताद, “आवए इताव ग्यानर, अचम्बलाव सक्तीर कातानी औरैव? ५५ काता, आव नो सीं तुज़्यावए ओज़ा माःक रो? आवए ओआमा ब गेसकाव लिज़्याव मरियम ज़ सानी। ओभाइर ब याकूब,

योसेफ, सिमोन, यहूदार ज़ सानी।
 ५६ ओबेनीर ब गेस ज़ लिज़्यार सानी।
 नितावए इताव पाँर कातानी औरैव
 ओताव?” है लिद, ५७ जाँ सोव
 माँ:ती जैकेर। येसुए नो यापाँ सैद,
 “अगमबक्तालाई ओल ओनाखारलावर
 सोनो ओक्याँदाडावराए वाज़ ओमान
 नैद माएर, उपुर्कावराए ते नैदिज़्यार,”
 है यादोक्यो। ५८ नोर येसुलाई यायुँ
 ओमाहुबोए नल अचम्बलाव ओयेनर
 कोसै मादोक्यो।

रील सछैँज्याव यूहन्ना उसिउ

(मर्कूस ६:१४-२६; लूका ६:७-९)

१४ हा: बेलाक राजा हेरोदए
 येसुए अचम्बलाव ओयेनर
 थैद, २ ओयेन दाज्यावरालाई, “आव ते
 रील सछैँज्याव यूहन्ना ची जन्द उहुव
 सा। है जैद ज़ ताखेहो ना: सक्तीलाव
 येनर ओदोज्याव,” है यादोक्यो।

३ नो हेरोदए डादा ओभाइ फिलिपए
 ओज्या हेरोदियासए ओपाँनी यूहन्ना-
 लाई क्यो:द किद भ्यालखानाल भा:द
 ओनैज्याव। ४ नो यूहन्नाए डादा नो
 राजालाई, “नँ नभाइए ओज्यालाई रैन्या
 माताए,” है ओदोवए, ५ राजाए नोलाई
 सै:न्या युँ दाद ओनैज्याव। खाली जनता
 भरिए ‘यूहन्ना अगमबक्ता ज़ लिज़्या’

लिद याथरैवए हेरोदए नोलाई सै:न्या
 जाँ ओछे:ज्याव।

६ तछा राजा हेरोद उजर्मिउ मानिन्या
 छचाम उहुवत हेरोदियासए मेंमा ओज़ा
 नो भत्यार ज्युना हुवराए याड़ाक बाद
 स्याद याएक्यो। राजा हेरोद बनै खुसी
 ताद, ७ नो लुज़ालाई, “नँ जो नपैँज्या,
 हो ज़ डायौँ” लिद किज्या भा:क्यो।
 ८ नो लुज़ाए फरी, ओआमाए ओपैव
 मिताव ज़, “डालाई रील सछैँज्याव
 यूहन्नाए ओडै चमद ताथील भा:द
 आक ज़ रैदचाँके,” है ओदोक ते,
 ९ राजाए उयुरँ स्यासे सतेक्यो। खाली
 ओपाहुनाराए डाकाव ओभा:व किज्या
 ओमाख्याधुवए, १० भ्यालखानाल
 लिज़्याव यूहन्नाए ओडै चमो
 यापरीक्यो। ११ नोर बाद यूहन्नाए ओडै
 चमद ताथील भा:द नो लुज़ालाई
 एकेर। नो लुज़ाए फरी ओआमालाई
 लाँदिक्यो। १२ छीनी यूहन्नाए उसिसराए
 ओमोरोलाई चिहुद लाँद यागादैवत
 येसुलाई है दोनाकेर।

येसुए पाँच हजारलाई भरेस ओरायो

(मर्कूस ६:३०-४४; लूका ६:१०-१७;

यूहन्ना ६:१-१४)

१३ येसुए नो पाँ थैद दोङ्गाल पसिद
 तोबो साइँसुइँव पोक ओबातड

बाके। नो माहोल्यार ओबाज्याव सेंद सहररानी पुलुस्द याखँनी ज़ दह छयो छयो ओल्योदा ज़ बाकेर। १४ येसु दोङ्गातिन उभरिउ प्राइँना मिँर बनै माहोल्या रँ:द उयुँ नाद याजोरो हुवरालाई यासगराँ-क्यो।

१५ जाँ रिमदा रिमदा उसिसर ओल्योक हुद, “गे इताव साइँसुइँवक गेलिज्या, नम ब नुप्नाके। आव माहोल्यारालाई नाखार जीदा यापरीके, ज़्यावर लँ:द घज्युरक,” है यादोक ते, १६ येसुए, “आवर आनी यामाबादी ब ताए। जे ज़ ज़्यावर याव ताके,” है ओरादोक ते, १७ उसिसराए “गेस भरेस पाँच गोता, डाँ: नेब्लो वाज़ लिज्या,” है यादोक ते, १८ येसुए “जेस लिज्याव भरेस सोनो डाँ: डालाई रैदचाँचिके,” है दाद, १९ नो माहोल्यारालाई बाँल चुसिउ परींद नो पाँच गोता भरेस नेब्लो डाँ: उकुइत रैद स्वर्गदा भाल्सिद, असिक निद भरेसर के:द उसिसरालाई नो माहोल्यारालाई भा:दचाव यापरीक्यो। २० नोर प्राइँए याफू तसी ज़्युकेर। नो यासयेलोर यादुप्क बाह भुर्नु ताके। २१ नो भरेस ज़्युज्यावर, मेंमार सोनो लुज़ार माभा:द, खेपार वाज़ पाँच हजारा याल्यो।

येसु री तर्त तर्त ओबाव

(मर्कूस ६:४५-५२; यूहन्ना ६:१६-२१)

२२ हा:त ज़ येसुए उसिसरालाई दोङ्गाल पसिउ परींद दह होफत ओलकिन ड़ादा ज़ यापरीक्यो। ओल येसुए ते नो माहोल्यारालाई याफिमदा याफिमदा ओरापरीज्याव। २३ नोरालाई ओरापरीधुव छींनी ओल तोबो दाँदात बाद पोखारिनाक्यो। नो बेलाक नम भयानाद उलिज्याव, नो दाँदात ओबातड ज़ उलिज्याव। २४ फरी उसिसर यालिज्याव दोङ्गा दहल कुधु होड ज़ केस्द उलिज्याव। नो बेलाक ज़ बतास उसिसराए ल्योदा बनै चोइस हुद रीए ओछल्काए नो दोङ्गालाई आदानी होदा ओजैज्याव। २५ हा:त ज़ रीलाव तीन बजेवाक येसु री तर्त तर्त याल्योदा ज़ बाके। २६ उसिसराए री तर्त तर्त उहुज्याव रँ:द, “आव ते भ्या ची सा!” है लिद याछ्याचेए बनै क्रिकेर।

२७ हा:त ज़ येसुए, “ताछे-च्यो, जेयुँ होलाँ जैचिके, डा ची,” है ओरादोव प्राइँना, २८ पत्रुसए, “प्रभु, साचो नँ ज़ ताकिन, डालाई ब री तर्त तर्त नल्योदा हुव याँके,” है दोक्यो। २९ येसुए, “ताए, हुन्के,” है ओदोव प्राइँना पत्रुस दोङ्गातिन भरिद री तर्त तर्त येसुए ल्योदा ओबाज्याक, ३० रीए

ओछल्का उहुज्याव रँद छेद रील गदिउ ओपैज्याक, “दे प्रभु, डालाई जोगोइनाके,” है ओदोव प्राइँना, ३१ येसुए नोलाई उकुइनी क्योःद, “नँ किताव मिँ नल्यो, नयुँ माथरिद आःपै डालाई नयुँ ओमाहुज्याव,” है दोक्यो। ३२ नोनी दोङ्गाल निपसिउ प्राइँना ज़ बतास ब थकनिके। ३३ नो दोङ्गाल लिज्यावराए फरी, “नँ साचो ज़ परमेस्वरए ओज़ा नल्यो,” लिद उखँत फुलुप्सिकेर।

येसुए याजोरो हुवरालाई ओरासगराँव

(मर्कूस ६:५३-५६)

३४ दह होफताव गनेसरेत यादोज्याव पोड याकेसोत, ३५ नलाव लिज्याव मिँराए येसुलाई सरेस्द नजीदाडाव याजोरो हुव भरिरालाई दुपद ओल्योक यारारैकेर। ३६ नोराए, “नक्वाए उतुपा वाज़ छापो गेदैक,” है दाद छापो भरी ओपोःस ज़ गर्राँकेर।

यहूदीराए यापुर्खारानी हुव चलन

(मर्कूस ७:१-१३)

१५ तछा यरूसलेम सहरनी फरिसीर स़ोनो सास्त्रीर येसुए ल्योक हुद, २ “नसिसराए

काराव गेसाखा पुर्खारानी हुव चलन यामादोज्याव? आवराए याकुइ माचोखोइद ज़ ज्युज्यार,” है यादोक ते, ३ येसुए नोरालाई, “जे ते भन जेसाखा पुर्खारए याचलननी परमेस्वरए ओकानुनलाई जेबलेज्या। ४ परमेस्वरए, ‘बाबु आमाए ओमान नैदद्याव ज़ परिए,’ स़ोनो, ‘जोए ओबाबु ओआमाए उमिन बलेदिज्याव, होलाई सैःव ज़ परिए’ है लिज्या। ५ जे ते भन, ‘जोए ओबाबु ओआमानिलाई, ‘जिन डानिकाव दैव परिन्या भरी परमेस्वरए उमिनत ची नैद डानै,’ है उलिकिन, ६ नो मिँलाई ओबाबु ओआमानी निभार मालागिए,’ है जेलिज्या। है जैद जे निताव जेयेननी ज़ जेचलनलाई सघ्योःद परमेस्वरए ओपाँलाई अनाकलाव जेजैज्या। ७ जे मिताव कैफतीराए जूनी यसैयाए डादा ज़ थिक सर्द नैदद्याचिउ। नोए ओसरो आव ज़,

८ ‘आवराए यायाःए वाज़

डामान नैदचाँज्यार।

यायुँ ते डाकिन तादाड लिज्या।

९ मिँराए याससैव चलनलाई

सघ्योःद,

अनाकल ज़ डासेवा दोज्यार,’ ”

है यादोक्यो।

मिँलाई बले-न्या पाँर

(मर्कूस ७:१४-२३)

१० नकिन येसुए नक लिज्याव माहोल्यारालाई ओल्योदा खुल्द, “आव डापाँ चावस थनैच्यो, ११ पाखानी याःल पसिज्यावए मिँलाई माछैव माजैव। मिँलाई माछैव जैज्याव ते याःनी पुलुस्ज्यावए ची,” है लिद यासथैक्यो। १२ उसिसराए नो ओपाँ थैद येसुलाई, “प्रभु, आव नपाँए फरिसीराए यायुँ कोला कोला जैद नरायो नमासैए रो?” है यादोक ते, १३ येसुए, “स्वर्गताव डाबाबुए ओमारारूपिउ भरी तछा भोस्त्रिज्यार। १४ हैज घताज्यारक, नोर तोबो उमी मारैःवए उमी मारैःवलाई दौरैद ओलाँज्याव मितावर लिज्यार। नितावनी दौरैसिद निबाक नेब्लो ज़ भल्खादाल तेन्या लिनी,” है यादोक्यो।

१५ हाःत ज़ पत्रुसए फरी, “डादाडाव नपाँए ओअर्थ गेलाई पलास्दचाव ताके,” है ओदोक ते, १६ येसुए, “जे किताव मिँर जेल्यो, आःपै डापाँ जेमातीधुज्याव। १७ जो ज़्याव ज़्युदी ब नो ज़्याव अइज फूल पसिद छीनी पुलुस्द बाज्या लिन्या जेमासैए रो? १८ मिँलाई बले-ज्याव ते युँल सिर्जेद याःनी पुलुस्ज्याव पाँए ची। १९ युँलाव

माचाहिउ पाँर आवर ज़ — माचाव चेतैन्या, मिँ सैःन्या, अर्काए ओज्याए ल्योदा बान्या, पातज्या पातर्नी जैसिन्या, कुन्या, धुत गोहाई यान्या, अर्काए उमिन बले-दचान्या, २० आवर ज़ मिँलाई बले-न्या पाँर। निताव कुइ माचोखोइद ज़्यान्याए काता ज़ माबले-व।”

छुत जातलाव कनानी मेंमा

(मर्कूस ७:२४-३०)

२१ येसु ननी पुलुस्द तुरोस सीदोन जीदा बाके। २२ नलाव तोबो कनानी मेंमा येसुए ल्योक हुद, “अ प्रभु, दाऊदए ओथोलाव येसु, डाल्योदा नयुँ ओनाक। मेंमा डाजालाई माचाव पुरुसए क्योःद बनै हत्या याद नैव,” है लिद उक्कि, २३ येसुए घाइ ज़ मादोक्यो। उसिसराए फरी, “आव मेंमा बनै भ्याउँ भ्याउँ लिज्या, हतप्त ज़ पले-के,” है यादोक ते, २४ येसुए नो मेंमालाई, “डा इस्राएली जातलाव माव डोइव बेधा स्यासोराए जूनी वाज़ डाहुव ची,” है ओदोक ते, २५ नो मेंमाए येसुए उखँत फुलुप्सिद, “जेरो डाप्रभु, डाल्योदा नयुँ ओनाक,” है दोक्यो। २६ येसुए फरी, “लुजाराए याज्युज्याव ज़्याव नैद काःरालाई यान्या माताए,”

है ओदोक ते, २७नो मेंमाए, “हैज़ प्रभु, हैदी ब यार्गेराए तेबलतिन यासतेव ज़्याव काःराए मनी ज़्याव दैर सानी,” है ओदोक ते, २८येसुए, “अ माँ, नँ बनै नयुँ हुबो मेंमा नल्यो। है नल्यो भरी योःन्या ले,” है ओदोव प्राईना होड ओज़ा ओगराँधुव ओल्यो।

येसुए कुधुलाई ओरासगराँव

२९येसु ननी पुलुस्द गालील दहलाव घ्याँ बाद तोबो दाँदात पुलुस्द चुसिके। ३०नत चुसिद उलिज़्याक नजीलाव माहोल्याराए काना दूँदार, लुला लडरार, लाता भैरार, याजोरो हुवरालाई ब येसुए ल्योक रैद ओड़ाक यारानैकेर। येसुए नो भरिलाई ओपोःस ज़ यासगराँक्यो। ३१नो माहोल्याराए निताव मापाँधुन्यार पाँधुन्या याताव, यामी मारैःवर रँःधुन्या याताव, माबाधुन्यार बाधुन्या याताव रँःद नोर बनै अचम्ब ताद इस्राएलीराए यापरमेस्वरलाई बनै घ्योःव ज़ थःरैद उमिन ब सघ्योःदिकेर।

येसुए चार हजारलाई भरेस ओरायो

(मर्कूस ८:१-१०)

३२नकिन येसुए उसिसरालाई ओल्योदा खुल्द, “आव माहोल्यार रँःद डायुँ नाज़्या। आवर डास याल्यो आछिम स्रोला ताकेर। याज़्याव

भरी ब खेम्के। आवरालाई करे ज़ परींन्या डायुँए माभैःए, अइज़ परींकिन येमत याकरेए माधुन्या लेर,” है ओरादोक ते, ३३उसिसराए, “इताव साईंसुईवक आःकाव माहोल्यारालाई गे कातानी ज़्यावर रैद सत्राँन्या की?” है यादोक ते, ३४येसुए, “जेस भरेस खागोता उलिज़्याव?” है ओरादोक ते, “भरेस सात गोता, डाँःजुँर नेबरेँवा लिज़्यार,” है दोकेर। ३५नकिन येसुए नो माहोल्यारालाई नामक चुसिउ परींद, ३६नो सात गोता भरेस स्रोनो डाँःजुँर उकुइत रैद धन्याबाद चरैःद नो भरेसलाई केःद उसिसरालाई नो माहोल्यारालाई भाःदचाव ओरापरींक ते, भाःद याराएकेर। ३७नोर प्राईँए याफू तसी ज़्याद यासयेलो यादुप्क सात भुर्नु ताके। ३८नो ज़्युज़्यावर, मेंमार स्रोनो लुज़ार माभाःद, खेपा भरी वाज़ चार हजार याल्यो। ३९नकिन नो माहोल्यारालाई याफिमदा याफिमदा परींद येसु दोङ्गाल पसिद मगादान खन्द जीदा बाके।

फरिसीराए स्वर्गताव सरेस याखिमो

(मर्कूस ८:११-१३; लूका १२:५४-५६)

१६ नल फरिसीर स्रोनो सदुकी-राए येसुलाई जाँचिन्याए जूँनी ओल्योक हुद, “गेलाई स्वर्गताव नसरेस तोबो सतैँदचाव ताके,”

है यादोक ते, २येसुए, “जे रिमदा नम घाव जेरें:किन ‘परा:ती बेलन्या ले’ है लिन्या जेसैंज्या। ३छकालन्या नम घाव जेरें:किन ‘आछिम नम वान्या ले’ लिन्या ब जेसैंज्या। है जैद जे निताव नमताव सरेसर थ:रैधुज्यावराए कै जैद बेलाए ओसरेसर ताकितर जेमाथ:रैधुज्याव? ४आव जुकलाव यायुं माहुबो पापीराए सरेस वाज्ज खिमज्यार। खाली यादैरिज्याव सरेस ते योनाए ओक्याँत ताव सरेस वाज्ज दैरिज्यार,” है दाद याख्यानैक्यो।

फरिसीर स्रोनो सदुकीराए यापाँनी जोगोइसिन्या

(मर्कूस ८:१४-२१)

५नकिन येसु उसिसरास दह होफत याबाक उसिसराए यास भरेस लाँन्या यामें:व ओल्यो। ६नक याकेसोत येसुए उसिसरालाई, “जे फरिसीर स्रोनो सदुकीराए भरेसल याभा:ज्याव वास:नी जोगोइसिद लिच्यो,” है ओरादोक ते, ७नोराए या याल, “भरेस रैन्या गेमें:वए नै ओदासिज्याव ताक्या,” है यालिज्याव। ८येसुए थैद, “ए जेयुं माहुबोर, काराव जे डापाँलाई भन भरेस त०दा जेथ:रैनाज्याव? ९आ:पै जेमातीधुइ रो? पाँच गोता भरेसए पाँच हजारए याफू तसी ज़्यादकाव यासयेलो कुधु

भुर्नु ओताव मा:क रो? काता घरी जेमें:धुव। १०स्रोनो सात गोता भरेसए चार हजार मिँए याफू तसी ज़्यादकाव यासयेलो कुधु भुर्नु ओताव मा:क रो? ११कै जैद जेमाबुभिधुज्याव? डा ते भरेसए जूँनी डापाँव मा:क। फरिसीर स्रोनो सदुकीराए जूँनी डापाँव ची,” है ओरादोक ते, १२बल्ल, “भरेसए जूँनी ते मा:क ची ओल्यो, फरिसीर स्रोनो सदुकीराए यापाँनी जोगोइसिद लिच्यो है ओदासिउ ची ओल्यो,” है लिकेर।

पत्रुसए येसुलाई ख्रीस लिन्या ओथ:रैव

(मर्कूस ८:२७-३०; लूका ९:१८-२१)

१३नकिन येसु कैसरिया फिलिप्पी खन्द जीदा ओबावत उसिसरालाई, “डा मिँ मिन्सिद हुवलाई मिँराए सु है दाँज्यार?” है ओरादोक ते, १४उसिसराए, “ख्वाराए रील सछै-ज्याव यूहन्ना है दींज्यार, ख्वाराए एलिया है दींज्यार, ख्वाराए फरी यर्मिया ताक्या, सैं काताकाव अगमबक्ता ताक्या है दींज्यार,” है यादोक ते, १५येसुए, “जे डालाई सु है जेदाँज्या नी?” है ओरादोक ते, १६सिमोन पत्रुसए, “नँ जींदो परमेस्वरए ओज़ा ख्रीस ज़,” है दोक्यो। १७येसुए नो थैद पत्रुसलाई, “धन्याकाव, योनाए ओज़ा सिमोन पत्रुस, नल्योदा

परमेस्वर दाइनो ताव। आव पाँ मिँए बुद्धीनी नथःरैव माःक, स्वर्गताव डाबाबुनी नथःरैव ची। १८ है जैद डा नमिन पत्रुसाँ जैद डाईंज़्या। नो पहर तर्त ज़ डा मन्दली डा जैरिज़्या, सोनो नर्गलाव सक्तीराए नोलाई पल्लैधुन्या मालेर। १९ स्वर्गताव राज्यालाव साँचार ब नँलाई डाईरिज़्या। है जैद नँ आव मानुवात जो नथःरैज़्या, स्वर्गत ब हो ज़ थ०रिन्या ले। फरी, आव मानुवात जो येन मादान्या नथःरैज़्या, स्वर्गत मनी हिताव ज़ थ०रिन्या ले,” है दोक्यो। २० नकिन उसिस भरिरालाई, “डा ख्रीस ज़ लिद सुलाई ज़ है तारादोच्यो,” है यादोक्यो।

येसु उसिन्याए जूनी डादा ज़ ओपाँव

(मर्कूस ८:३१-६:१; लूका ९:२२-२७)

२१ हो बेलाकिन ज़ येसुए यरूसलेमल ओक्याँत हुरिज़्याव दुखर उसिसरालाई है यादोनाक्यो। “डा यरूसलेमल डाकेसोत गेदेसलाव स्मेरर, मुख्या पुजारीर सोनो सास्त्रीराए ल्योनी बनै धो सहिउ दुखर डादैरिज़्या। नोराए यासैःनाव सोलात सिउनी सैसिद डासोरिज़्या,”

लिद उसिसरालाई है ओरादोक ते, २२ पत्रुसए येसुलाई तँदा लाँद सिडार्द, “प्रभु, परमेस्वरए निताव ताव तायोक, नक्याँत निताव खर्क ज़ ताताक,” है ओदोक ते, २३ येसु पत्रुसए ल्योदा भाल्सिद, “ए सैतान, डाडाकिन पुलुस्निके। नँ ते डालाई परमेस्वरए ओयेनत डायुँ केःदयान्या ची नपैके। नँ नयुँ परमेस्वरए ल्योदा माभाःद मिँराए याभाःज़्यावदा ची नभाःके,” है दोक्यो।

२४ उसिस भरिरालाई येसुए, “जोए डास हुन्या युँ दोज़्याव, होए उजिउए मया मादाद क्रुसत सिन्या मिताव दुखर सहिद डाछीँत उहुक। २५ जोए आव उजिउत ओललाई तान्या वाज़ खिम्ज़्याव, होए उजुनीलाई समैज़्याव। फरी जोए आव उजिउत उजिउए मया मादाद डा डाजूनी दोज़्याव, होए जुनी दैरिज़्याव। २६ जोए आव मानुवात लिज़्याव भरी दुप्द उजुनीलाई ओसमैकिन नोलाई काता फाइदा ची तायादा? नोए उजुनीए ओपोल काता यान्या? २७ डा मिँ मिन्सिउ तछा स्वर्गताव डाबाबुए ओज़गै मगैरास ओचाकन्यारास आव मानुवात फरी तखेप हुद मिँराए

† १६:१८ पत्रुसए ओअर्थ — पहर।

१६:१८ १ कोर ३:११; १०:४; एफि २:२०; १ पत्र २:६-८; दर्सन २१:१४

यादोव यायेनए ओजेला डाराएरिज्या। २८डा जेलाई साचो है डादाचिज्या, आकाव च्याँ:सिद लिज्यावरानी जे रूवा रूवाराए डा मिँ मिन्सिउलाई डाराज्यास डाहुज्याव जेमारेँ:वा पै सिन्या जेमाले,” है लिद यासथैक्यो।

येसुए ओजगै ओसरै:व

(मर्कूस ६:२-८; लूका ६:२८-३६)

१७ नकिन छ दिनत येसुए पत्रुस, याकूब सोनो होए ओभाइ यूहन्नारालाई याबातड तोबो भें:व गोंत ओलस यालाँक्यो। २नक याकेसोत येसुए ओक्यारँ तोसिद, ओडा:र ब निमी स्यासो भ्रार भ्रारो ताके, ओक्वार ब तक तकौ मी भी:न्या ताके। ३ना:त ज़ मोसा सोनो एलियानी नक ज़ सरै:सिद येसुस पाँकिनी। ४नो रें:द पत्रुसए येसुलाई, “अ प्रभु, गे आक लिन्या बनै चाव लिज्या। नयुँ ओताकिन, डा जेलाई सोम्लो पाल तङ्गद डायच्यो, तोबो नँलाई, तोबो मोसालाई, तोबो एलियालाई,” है लिद, ५ओपाँज्याक ज़ तोबो बनै धोइ धोइव बादल हुद नोरालाई याकप्यो। नो बादल जीनी तोबो गा

अइ लिद थास्के, “आव डायुँलाव डाज़ा ज़, आवलाई रें:द डायुँ होलाँ ताज्या। जे आवए ओपाँ थैच्यो,” ६है उलिज्याव नो सोम्लोए थैद नोर याछ्याचेए फुलुपसिकेर। ७हा:त ज़ येसु हुद नोरालाई छाप्द, “सोचिके, ताछेच्यो,” है ओरादोवत, ८आदा होदा याभाल्सिक येसुलाई वाज़ रें:केर।

ख्रीसकिन डादा एलिया

(मर्कूस ६:६-१३)

६नो गोंतिन याभरिज्याक येसुए नोरालाई “आव जेरें:व भरी डा मिँ मिन्सिउ सिद डामासैसिवा पै सुलाई ज़ है तारादोच्यो,” है ओरादोक ते, १०नो सोम्लोए, “सास्त्रीराए काराव ख्रीसकिन डादा एलिया हुन्या ले है यालिज्याव?” है यादोक ते, ११येसुए, “हैज़, एलिया डादा ज़ हुद प्राइँलाई ताव परिन्या मिताव जैन्या ले। १२खाली डा जेलाई आव मनी है डादाचिज्या, एलिया ते डादा ज़ हुधुके। आलाव मिँराए भन नोलाई मासरेस्द यामन लागिउ ज़ जैकेर। हिताव ज़ डा मिँ मिन्सिउलाई मनी दुखर याद सै:नारिज्यार,”

है यादोक्यो। १३ हाःत ज़ नो स्रोम्लोए एलियाए ओयेन रील सछैंज्याव यूहन्नाए ओक्याँत ची ओताव ओल्यो लिन्या थःरैकेर।

माचाव पुरूसए ओक्योःव छोज्या

(मर्कूस ६:१४-२६; लूका ६:३७-४३)

१४ येसु नो स्रोम्लोरास नो गोतिन भरिद माहोल्याराए ल्योक याबाक ननी तोबो हुद येसुए उखँत फुलुप्सिद, १५ “अ प्रभु, डाज़ालाई नयुँ ओनाक, नोलाई पुल्ल्या बेथाए क्योःद बनै दुख याद नैव। कैताक मेंःल ब परिज़्या, कैताक रील ब परिज़्या। १६ नोलाई नसिसराए ल्योक डारैक सगराँद मायाँधुकेर,” है ओदोक ते, १७ येसुए, “ए जेयुँ माहुबोर, परमेस्वरस माखैवर, डा जेस खा ची डालिरिज़्याव, खा डासहिचिके!” है दाद नो छोज्याए ओबाबुलाई, “नज़ालाई आदा रैके,” है दाद, १८ नो माचाव पुरूसलाई ओहण्कैव प्राइँना ओक्याँतिन पुलुस्द बाके। नो छोज्या ब हो प्राइँना ज़ गराँके।

१९ नकिन जाँ छ्यावाक उसिसराए येसुलाई सुए ज़ यामासैँद, “गे कै जैद नो माचाव पुरूसलाई गेमापलेःधुव?” है यादोक ते, २० येसुए, “परमेस्वरए

ओल्योदा जेयुँ ओमाहुबोए ज़ जेमापलेःधुव। डा जेलाई साचो है डादाचिज़्या, परमेस्वरए ओल्योदा बाजीए ओसै हावालिउ तादी ब जेयुँ जेसुहुष्किनी तोबो हाँलाई ‘भोस्निके’ है जेदोकिन भोस्न्या ज़ ले। है जैद जे मादाधुन्या काता ज़ माले। २१ [हैदी ब इताव पुरूसलाई पलेःन्या ते उपासिद मापोँखारिवा पै मापलेःसिधुइ।”]

येसु उसिन्याए जूनी फरी ओपाँव

(मर्कूस ६:३०-३२; लूका ६:४३-४५)

२२ छींनी तछा येसु उसिसरास गालीलल यादुप्सिक उसिसरालाई, “डा मिँ मिन्सिउलाई तछा मिँराए याकुइत सँपिनारिज़्यार। २३ नोराए डालाई सैःनारिज़्यार। हैदी ब स्रोलात परमेस्वरए सोचोइनारिज़्याव,” है यादोक्यो। नो थैद उसिसराए यार्युँ माचाव जैकेर।

ध्यान फ़िमलाव सिर्मा

२४ छींनी कफर्नहुमल याबावत ध्यान फ़िमलाव सिर्मा स्योःज़्यावर हुद पत्रुसलाई, “जेगुर्बाए ध्यान फ़िमलाव सिर्मा ओफोःज़्याव सैँ ओमाफोःज़्याव?” है यादोक ते, २५ “फोःज़्याव ज़,” है दाद पत्रुस

फ़िमल उपसिउत येसुए, “अ सिमोन, नँ कै नलिज़्या? आव मानुवाताव राजाराए सिर्मा स़ोनो दोरो सुरालाई याराहाइज़्याव? याफ़िमलावरालाई सैं छुतडावरालाई?” है ओदोक ते, २६सिमोनए, “छुतडावरालाई,” है दोक्यो। येसुए, “हो ताकिन ते गे नो फ़िमलावराए ते माफो-व परिन्या। २७हैदी ब नोरालाई सभैःन्याए जूनी बलछी लाँद दहल रैःसिनान्केदा, प्राइरानी उस०कताव नहाइव डाँःए ओयाः नफैक गिन फोःन्या चाँदीए सिक्का नोए ओयाःल दैन्या नले। हो ज़ लाँद गिनजूनी फोःनायो।”

घेप्पा जैसिन्या पाँ

(मर्कूस ९:३३-३७; लूका ९:४६-४८)

१८ हो बेलाक ज़ येसुए उसिसर ओल्योक हुद, “स्वर्गताव राज्याल प्राइरानी घेप्पा सु गेलिज़्याव?” है यादोक ते, २येसुए तोबो ज़िम्ज़ारालाई रैद याड़ाक सच्याँद, ३“जेलाई साचो है डादाचिज़्या, जे जेयूर त़ोद लुज़ा मिताव जेमातावा पै स्वर्गताव राज्याल पसिउ दैन्या जेमाले। ४जो आव लुज़ा मिताव मासघ्योःसिद सज़िम्सिज़्या, हो ज़ स्वर्गताव राज्याल घेप्पा ताज़्या। ५फ़री जोए डामिनत आव मिताव ज़िम्ज़ारालाई यासुम्ज़्याव,

होए डालाई ब सुम्नाज़्याव। ६फ़री जोए आव मिताव डालाई यायुँ हुबो ज़िम्ज़ारालाई पापल ओरापारैकिन, नितावलाई ते बुरू ओधेंल राँथे सुदर्चाद समुन्द्रल ख्यान्या पाथ लिज़्या। ७पापल पारैज़्याव पाँराए जूनी आव मानुवालाई थैए माँतकन ज़ लिज़्या। निताव पाँर ते जुनी ब हुन्या ज़ लेर, खाली निताव पाँर पलेःज़्यावलाई थैए माँतकन ज़ लिज़्या।”

मिँलाई बलेःज़्याव खँ कुइ

(मर्कूस ९:४२-४८)

८“नखँए तादी ब नकुइए तादी ब माचावल ओपारैनिकिन च़मद ख्याके। नो नखँ नकुइए माजिप्तिन्या मेंःल ख्याव ओदोःज़्याव देखा बुरू अजम्बरी जुनील थूँदचासो पसिन्या पाथ लिज़्या। ९हो मिताव ज़ नमीए माचावल ओपारैनिकिन, नो नमीलाई कोलाःद ख्याके। नो नमीए नर्गलाव मेंःल ख्याव ओदोःज़्याव देखा बुरू परमेस्वरए ओराज्याल काना ताद पसिन्या पाथ लिज़्या। १०है जैद जे आव मिताव ज़िम्ज़ारालाई सुए ज़ तारासोच्यो। नोरालाई समारिज़्याव परमेस्वरए ओचाकज्यार एकतार ज़ स्वर्गताव परमेस्वर डाबाबुए ओड़ाक ज़ लिज़्यार,” है यादोक्यो।

डोइव बेधाए ओघर्ती

(लूका १५:३-७)

११ [“है जैद डा मिँ मिन्सिद हुवए माव डोइवरालाई सापद परमेस्वरए ल्योदा लाँन्याए जूँनी डाहुव ज़।] १२ जे कै जेलिज़्या? तोबोए ओबेधार तसय यालिकिन ननी तोबो फातिद ओडोइकिन नो उनान्सयरालाई बनल ज़ ख्यानैद नो डोइवलाई खिम्नाज़्याखेहो सानी। १३ डा साचो है डादाचिज़्या, नोलाई ओदैंकिन नो माडोइव उनान्सयरकिन नो तोबोए ल्योदा भन उयुँ होलाँ ताद रेंज़्या। १४ हो मिताव ज़ स्वर्गताव जेबाबुए ब इताव ज़िम्ज़ा तादी ब ‘तँदा बाद ताडोइक’ लिद उयुँ थू जैज़्याव।”

मादान्या दाज़्याव नै

१५ “तोबो ननैए मादान्या ओदोज़्याव नरँ:किन डादा नोलाई अलगज़ा ओखत सतैदियो। नोए नपाँ थैद ओभैं:किन नोलाई नबाँचैव मिताव ज़ ताके। १६ फरी नोए नपाँ थैव ओमाभैं:किन छुतर ब तोबो नेब्लो बाद सम्जैव ताके। धर्मसास्त्रल ब नोए उजूँनी इताव सर्सिउ लिज़्या, ‘छुतए ओडैताव पाँ नेब्लो सोम्लोए यासाची

ओखैकिन नो पाँ ज़ थ०रिउ ताज़्या।’ १७ नोए नोराए यापाँ ब ओमाभैं:किन नोलाई परमेस्वरए उमिनताव भरिराए ड़ाक ज़ है दाव ताके। नोराए यापाँ ब ओमाभैं:किन नो मिँलाई परमेस्वरकिन तँदाडावरासकाव सोनो सिर्मा स्यो:ज़्यावरासकाव गनिउ ताके। १८ है जैद डा जेलाई साचो है डादाचिज़्या, जे आव मानुवात जो जेथ:रैज़्या, स्वर्गत ब हो ज़ थ०रिन्या ले। फरी, आव मानुवात जो येन मादान्या जेथ:रैज़्या, स्वर्गत मनी हिताव ज़ थ०रिन्या ले। १९ फरी डा जेलाई है डादाचिज़्या, आव मानुवात नेब्लोए वाज़ तयुँ जैद काताराए जूँनी जेपोँखारिकिन, नो जेपाँ स्वर्गताव डाबाबुए सयो:दयान्या ले। २० है जैद जोक तादी ब डामिनत नेब्लोकिन यादा जेदुप्सिकिन डा ब जेस ज़ डातारिज़्या।”

ओनैलाई उयुँ मानाज़्याव

२१ नकिन पत्रुस येसुए ल्योक बाद, “प्रभु, तोबोए डाउपत मादान्या ओदोकिन, नोलाई डा खापाला रास्न्या, सात पाला सैं खापाला?” है ओदोक ते, २२ येसुए, “डा नँलाई सात पाला वाज़ है डामादीए। नोकिन भन सत्तरी दोबोर सात पाला रासो ताके है डादींज़्या।

२३“है जैद स्वर्गताव राज्या तोबो राजाए ओनोकोररास हिसाप ओसखैज्याव मिताव लिज्या। २४नो राजाए निताव हिसाप ओसखैज्याक तोबोए ओलाँव दस हजार सुनए सिक्कालाव तुम्सुक पुलुस्के दी। नोए उरिन ओमाफो·धुवए राजाए ओयेन दाज्यावराए ओललाई ज़ राजाए ल्योक रैकेर दी। २५राजाए नोरालाई, ‘आवलाई ओज्या ओज़ारास सोनो ओलसकाव लिज्याव भरी यो·द तादी ब जुनी ब सयो·द रैचिके,’ है यादोक्यो दी। २६नो नोकोरए आव थैद राजाए उखँत फुलुप्सिद, ‘जेरो प्रभु, डालाई नयुँ ओनाक, छ्यावा पै कीनाके। तछा जुनी ब डाफो·या ज़,’ है ओदोक ते, २७नो राजाए उयुँ नाद उतुम्सुक चीदचाद अइज़ रास्क्यो दी। २८नो नोकोर ते भन ननी पुलुस्द बाद, ओलस येन दाज्याव तोबो ओनैए ल्योक तसय चाँदीए सिक्का ओकाछ थाँनाक्यो दी। नोलाई ओधेनी क्योःद, ‘डाकाछ नमाफो·रिज्या?’ है ओदोक ते, २९नो ओनै उखँत फुलुप्सिद, ‘जेरो डानै, डालाई नयुँ ओनाक। छ्यावा पै कीनाके, तछा प्राइँ ज़ डायॉ,’ है ओदोक ते, ३०माभैःद, ‘हुकी नमासयो·वा पै भयालखानाल ल्यो ताके’ लिद भयालखानाल भाःक्यो दी।

३१“ओनैलाई नै ओजैव राजाए ओयेन दाज्यावराए रँःद यायुँ बनै नाद राजाए ल्योक पैनाकेर दी। ३२नो पाँ थैद राजाए नो ओरासो नोकोरलाई खुल्द, ‘ए हरामी, नँ डास बिन्ती नदोक नडैताव रिन भरी ख्याद डाईके। ३३डा किताव नँलाई डायुँ नाद डारास्निउ, नँ कै जैद नो नँस येन दोज्याव ननैलाई नयुँ नाद नमारासो?’ है दाद, ३४नो राजा रसिद ओरासो रिन भरी फरी ब सुघुर्द प्राइँ ओमाफो·वा पै भयालखानालाव हाकिमए उकुइत सूपिक्यो दी। ३५है जैद डा जेलाई साचो है डादाचिज्या, हो मिताव ज़ स्वर्गताव डाबाबुए मनी जे जेउपर्त मादान्या दोज्यावलाई जेयुँल नैद जेमारास्किन जेलाई मनी हिताव ज़ जैचिरिज्याव।”

१६ येसुए आव पाँर ओरासथैवत गालीलनी पुलुस्द यर्दन भै होफताव यहूदिया खन्दल बाके। २नल ब मिँर बनै माहोल्या ओल्योक याहुज्याव। नो हुवरानी याजोरो हुवरालाई यासगराँक्यो।

ज्यालाई मारास्न्या

(मर्कूस १०:२-१२)

३फरिसीराए येसुलाई जाँचिन्याए जूनी ओल्योक हुद, “जुनी तादी ब ज्यालाई रासो दैसिए सै मादैसिए?”

है यादोक ते, ४येसुए, “भाःड स्रिस्तील परमेस्वरए मिं ओजैक खेपा सोनो मेंमानी निजैक्यो लिन्या प्ररिद जेमाले? ५है जैद ज़ खेपाए ओबाबु ओआमालाई रास्द ओज्यास सिप ताद, नोनी तक्याँ ज़ ताज़्यानी। ६हाःकिन नोनी नेब्लो माःक, तक्याँल गनिसिज़्यानी। है जैद जोनिलाई परमेस्वरए जोरैद निनैव, होनिलाई मिंराए ताराभाःरक,” है ओरादोक ते, ७नोराए फरी, “हिताव ताकिन कै जैद मोसाए ओकानुनल रास्न्या कागत तोबो सर्किन रासो दैसिए लिन्या सर्सिउ उलिज़्याव?” है यादोक ते, ८येसुए, “जेदिउदी ल्योर जेतावए ज़ मोसाए निताव कानुन ओरायो, मानी डादाकिन ते हिताव ओमाल्यो। ९है जैद डा जेलाई है डादाचिज़्या, जोए ओज्या ओरेए ओसतत उलिज़्यावत ब नो ओज्यालाई रास्द छुतलाई ओरैकिन नोए जारी येन ज़ दोक्यो। [फरी जोए नो रास्सिउ मेंमालाई रैज़्याव, होए मनी जारी येन ज़ दोक्यो,]” है यादोक्यो।

१०हाःत ज़ उसिसराए, “निताव ज्यालाई रास्क पाप गेदोव उथरिकिन बुरू ज्या मादान्या पाथ लिज़्या,” है यादोक ते, ११येसुए, “बिनु ज्या,

बिनु रे प्राईं ते मालिधुर। परमेस्वरए जोलाई बिनु ज्या, बिनु रे लिधुन्या जैद नैव हो वाज़ लिधुइ। १२ख्वार जर्मननी ज़ सिडारू ताज़्यार, ख्वार फरी मिंराए सिडारू याराजैवए ज्या मादोर, ख्वार फरी या याखुसीनी ज़ स्वर्गताव राज्यालाव येन दान्याए जूनी ज्या मादोर। खाली निताव येन ते जोए सहिधुज़्याव, होए वाज़ ओदोवक।”

येसुए ल्योक हुज़्याव लुज़ार

(मर्कूस १०:१३-१६; लूका १८:१५-१७)

१३नकिन नलाव मिंराए जिम्ज़ा याज़ारालाई ‘येसुए उकुइ नैद असिक घरायोक’ लिद ओल्योक याराऱैकेर। नो रैज़्यावरालाई उसिसराए सिडार्द यारावैकेर। १४येसुए निताव रँःद उसिसरालाई, “नो जिम्ज़ा लुज़ारालाई तारावैच्यो, डाल्योदा हुव याराएचिके। स्वर्गताव राज्या नितावराए जूनी ज़ लिज़्या,” है दाद, १५नो लुज़ाराए याक्याँत उकुइ नैद असिक याद येसु ननी पुलुस्द बाके।

अजम्बरी जुनी खिम्ज़्याव धनी

(मर्कूस १०:१७-३१; लूका १८:१८-३०)

१६येसुए ल्योक तोबो धापाज़ाकाव मिं हुद, “अ गुर्बा, डा अजम्बरी



जुनी दैन्याए जूनी चाव येन किताव दान्या?" है ओदोक ते, १७येसुए, "डालाई काराव 'किताव चाव उलिङ्याव' है नदाँङ्याव? चाव तोबोका तोबो परमेस्वर वाज्ज लिङ्या। नँ अजम्बरी जुनील बान्या युं नदोकिन नो धर्मसास्त्रलाव सर्सिउ दान्या मादान्या येन दाव ताके," है ओदोक ते, १८"प्रभु, नो भरिनी डा काताकाव दान्या?" है ओदोक ते, येसुए, "मिँ मासैःन्या, अर्काए ओज्याए ल्योदा माबान्या, माकुन्या, धुत गोहाई मायान्या, १९बाबु आमाए ओमान नैदचान्या, सोनो नक्याँलाई किताव नसमारिङ्या, छुतलाई ब हिताव ज़ समाऱिन्या," है दोक्यो। २०नोए नो पाँर थैद, "आव भरी ते दाव ज़ डानैङ्या, फरी मायोःव काताकाव उलिङ्याव?" है ओदोक ते, २१येसुए "नँ साचो सयोःन्या ताकिन नँस लिङ्याव भरी योःद काता ज़ माल्योरालाई भाःद याएकेदा, नँ स्वर्गताव धन दैन्या नले। नो येन भरी दाद नँ डाछींत हुन्के," है ओदोक ते, २२नो धापाज़ाकावए नो पाँ थैद उयूर स्यासे सतेद ओल्द बाके। नोए ओधन सम्पती बनै कुधु ज़ ओल्योए मारास्थुक्यो।

२३नो ओबावत येसुए उसिसरालाई, "डा जेलाई साचो है डादाचिङ्या, धनी मिँ स्वर्गताव राज्याल पसिन्या बनै धो ताङ्या। २४फरी ब डा जेलाई है डादाचिङ्या, गपए उकुँल ऊँत उछिरिङ्यावकिन धनी मिँ परमेस्वरए ओराज्याल पसिन्या भन धो ताङ्या," है यादोक्यो। २५उसिसर आव पाँत अचम्ब ताद, "इताव ताकिन ते सुए ची अजम्बरी जुनी ओदैधुरिङ्याव?" है यादोक ते, २६येसुए, "मिँर यानी सु ज़ माबाँचिधुर, खाली परमेस्वरनी मातान्या काता ज़ माले," है यादोक्यो।

२७हाःत ज़ पत्रुसए, "गे ते प्राइँ ज़ ख्यानैद नछींत हुद गेले, गे काता दैन्या?" है ओदोक ते, २८येसुए, "डा जेलाई साचो है डादाचिङ्या, आव जुक तोसिद प्राइँ साःरो ओतावत डा मिँ मिन्सिउ बनै ज़गै मगैव डाराज्या डाचलैहुवत जे डाछींत हुद लिङ्यावराए बाह् थर इस्राएलीराए याडैतावर ताद यायेन फाल्दचान्या जेले। २९आव बेलाक जोए डाजूनी ओएँःर उफ़िंमर, ओदाज्यु भाइर, ओनाना बैनीर, ओबाबु ओआमार, ओज़ार रास्द याख्यानैङ्याव, होए आव उजिउत ज़ सय दोबोर ब



दैन्या ले, अजम्बरी जुनी ब दैन्या ले। ३० खाली रूवा रूवा डातावर छींत तारिज्यार, छींतावर डात तारिज्यार।”†

एँःल येन दाज्यावर

२० “है जैद स्वर्गताव राज्या तोबो एँःए ओर्गे स्यासो लिज्या। नो मिँ छकाल्न्या घग ज़ ओएँःल येन दान्या मिँर याखिम-नाज्याव। २ नोरास तला भरिकाव जेला यान्या कबल दाद ओयेन दाना यापरीक्यो दी। ३ नौ बजेवाक फरी नो एँःए ओर्गे बजार जीदा ओबाक यायेन माल्योरालाई रँःद, ४ नोरालाई, ‘जे अइज़ जेलिज्याव देखा डाएँःल येन दोनाचिके, जेजेला डायाच्या,’ है ओरादोक ते, नोर बाद येन दोनाकेर दी। ५ नो एँःए ओर्गे फरी बाह बजेवाक तखेप, तीन बजेवाक तखेप फरी ब बाहोज्यार जैद यापरीक्यो दी। ६ पाँच बजेवाक फरी ब नो एँःए ओर्गेए तोबोक अइज़ च्याँःसिद लिज्यावरालाई रँःद, ‘जे काराव बिनु येन च्याँःसिद जेलिज्याव?’ है ओरादोक ते, ७ नोराए, ‘गेलाई सुए ज़

येन मायासिर,’ है यादोक ते, नोरालाई मनी ओयेन दाना यापरीक्यो दी।

८ “नम ओभ्यानाक नो एँःए ओर्गेए नो येन दोज्यावरए याडैतावलाई खुल्द, ‘नो डायेन दाज्यावरालाई दुप्द याजेला भाःद याएके, प्राइँरानी छींनी हुवरालाई प्राइँरानी डात याएयो,’ है ओदोक ते, नोए नो येन दाज्यावरालाई खुल्द, ९ पाँच बजे हुवरालाई डात याएक्यो। नोराए तछाकाव याजेला दैकेर दी। १० नो छकाल्न्या हुवराए निताव रँःद ‘नोराकिन गे ते कुधु ज़ गेदैया,’ है यालिज्याव। खाली छींनी ते या ब हाःज़ दैकेर दी। ११ नै ओतावए नोर एँःए ओर्गेए ल्योक बाद, १२ ‘नो प्राइँरानी छींनी हुवर तघन्ता वाज़ येन दोकेर, नोर कै जैद गे तला भरी घाम सोता सोता ताद दावरास सम सम नजैसिउ?’ लिद गन गन दोकेर दी। १३ है जैद नो एँःए ओर्गेए तोबोलाई, ‘डानैँ, नँस छकाल्न्या ज़ तला भरिकाव जेलाल गिन्कबलिसिउ माःक रो? डा नउपर्त मादान्या डामादोए। १४ नजेला तीद बानिके। आव छींनी हुवरालाई मनी नँसकाव जुँ ज़ याव डापैँज्या। १५ पैसा

† १६:३० छुत बुभिन्या — रूवा रूवा यामिन थासोर जिम्ज़ा थोरिन्या लेर, जिम्ज़ार घ्योःव थोरिन्या लेर।

२०:८ लेबी १६:१३; ब्य २४:१५

डामीं ज़, डापैसा जोलाई यान्या डायुँ लिज़्या, होलाई यान्या ओमाताज़्याव रो? डायुँ ओगराँव काराव नमी उतूज़्याव?’ है दोक्यो दी।

१६“हो मित्ताव ज़ रूवा रूवा छींतावर डात तारिज़्यार, डातावर छींत तारिज़्यार।”

येसु उसिन्याए जूनी फरी ओपाँव

(मर्कूस १०:३२-३४; लूका १८:३१-३४)

१७नकिन येसु यरूसलेमदा ओबा-
ज़्याक बाह्व जना उसिसरालाई याबातड खुल्द, १८“गे यरूसलेमदा गेपुलुस्नाज़्या। नल गेकेसोत डा मिँ मिन्सिउलाई मुख्या पुजारीर सोनो सास्त्रीराए याकुइत सँपिन्या ज़ लेर। नोराए डालाई सैःन्या ज़ थःरैद, १९रोमी सरकारए उकुइत याभाःनावत नोराए फरी उल्ली गिल्ली दाद, रीःद, कुसत तडैद सैःनारिज़्यार। हैदी ब सोलात सिउनी सैसिद सोन्या डाले,” है यादोक्यो।

याकूब सोनो यूहन्नानी निआमाए ओपाँ

(मर्कूस १०:३५-४५)

२०नकिन जब्दियाए ओज़ानी याकूब सोनो यूहन्नानी निआमास येसुए ल्योक हुद, निआमाए धो दाद, “जेरो प्रभु,” है ओदोक ते, २१येसुए,

“काता दादयान्या नपैज़्याव?” है ओदोक ते, नो मेंमाए, “नराज्याल आव डाज़ानिलाई तोबोलाई नवोर्दा, तोबोलाई नदाबज्यादा चुसिन्या निजैयो,” है ओदोक ते, २२येसुए, “नँ नज़ारास आव जेन्निज़्यावए जूनी जेमासैए। डा जाँवाक धो सहिउ दुखर डासहिरिज़्याव नोनी मासहिधुरिज़्यानी?” है ओरादोक ते, नोनी, “गिन्सहिधुया ज़,” है दोकिनी। २३हाःत ज़ येसुए, “हैज़, डा डादैरिज़्याव धो सहिउ दुखर जिन मनी दैन्या ज़ जिन्ले, खाली डावोर्दा डादाबज्यादा चुसिउ यान्या ते डा डाकुइत माले। नित्ताव दैन्या स्वर्गताव डाबाबुए जोलाई एज़्याव, होए उजूनी वाज़ लिज़्या,” है निदोक्यो। २४उपुर्काव दस जना उसिसराए नो पाँ थैद नोनिलाई रँःद यारिस चोके।

२५नाःत ज़ येसुए उसिस भरिरालाई ओल्योदा खुल्द, “जे ज़ जेसैज़्या-खेहो, आव मानुवाताव याघेप्पार याधूँलावराए डैत बनै अखत्यासोर ताद हाप हाप ख्याज़्यार। २६जे जेल ते नित्ताव जैसिन्या माताए। है जैद जेनी जो स्नेर जैसिउ जेपैज़्या, हो प्राइँए यासेवा दान्या ओजैसिक। २७सोनो जेनी जो घेप्पा जैसिउ जेपैज़्या, हो प्राइँए याबाँदा ओजैसिक। २८डा मिँ

मिन्सिउ ब 'डासेवा घदोरक' लिद डाहुव माःक, कुधुलाई बाँचैन्याए जूनी डाजिउ भाःद यासेवा डादोहुव ची," है यादोक्यो।

येसुए निमी मारैःवनिलाई रँःधुन्या
उनिजैव

(मर्कूस १०:४६-५२; लूका १८:३५-४३)

२६येसु उसिसरास यरीहो सहरनी पुलुस्द याबाज़्याक मिँर ब बनै माहोल्या यास ज़ याबाज़्याव। ३०येमक नेब्लो निमी मारैःवनी चुसिद निलिज़्याव। नोनी 'येसु आलाव घ्याँ हुज़्या दी' लिन्या थैद, बनै चोइस, "अ दाऊदए ओथोलाव प्रभु, गिनलाई नयुँ ओनाक," है लिद निकिज़्याक, ३१नो माहोल्याराए 'भयाउँ तालिचिन' लिद यारासिडाकैर। नोनी भन ज़ चोइस क्रिद, "अ दाऊदए ओथोलाव प्रभु, गिनलाई नयुँ ओनाक," है निलिक ते, ३२येसु नक च्याँःसिद नो निमी मारैःवनिलाई ओल्योक खुल्द, "डा जिनजूनी काता दादयान्या?" है अनिदोक ते, ३३"प्रभु, गिन रँःधुन्या गिन्ताक," है निदोक ते, ३४येसुए उयुँ नाद निमीत छाप्द उनियो प्राइँना ज़ रँःधुन्या ताद उछींत बाकिनी।

येसुलाई परमेस्वरए उमिनताव राजा
याजैव

(मर्कूस ११:१-११; लूका १६:२८-४०;

यूहन्ना १२:१२-१६)

२१ येसु उसिसरास यरूसलेम छयोकाव जैतून दाँदाकिन जाँ होकसैकाव बेथफागे नाखार याकेस्नावत येसुए नेब्लो उसिसनिलाई, २"जिन आव गोड़ाकाव नाखारल बाचिन्केदा, नल तोबोक गधाहानी ज़ा-मा सुर्सिउनी दैन्या जिन्ले। नोनिलाई पला-द यारारैचिन्के। ३सुवाराए, 'काराव पला-द जिन्रालाँज़्याव?' है यादाचिन्किन, 'गिनप्रभुलाई चाहिज़्या,' है जिन्रादोकिन नोराए हतप्त ज़ परीं-दयान्या लेर," है लिद निपरींक्यो। ४नो पाँ भरी अगमबक्ताए ओसरो पाँ सयो-न्याए जूनी ताके। नो सर्सिउ आव ज़,

५"सियोनए ओज़ालाई[†] है दोक्यो, 'चिऊके, नराजा काता ज़ माल्यो मिताव जैसिद, गधाहाए ओज़ा बछेरालाई चेपद जेल्योक हुज़्या।' "

६है जैद नो नेब्लो उसिसनी येसुए है अनिदोव मिताव ज़ नाखारल बाद,

[†]२१:५ यूह १२:१५ चिऊन्या।

२१:५ जक ६:६



७नो गधाहानिलाई दैद येसुए ल्योक रैद उसिसराए तोबो गधाहाए ओतर्त याक्वार भाःदद्याद येसुलाई चेपो परींकेर। ८नकाव लिङ्याव माहोल्या-राए याक्वार येमल तैदिकेर। ख्वाराए फरी नजीलाव स्यावलार रैद येमल तैदद्याद, ९नो माहोल्यार ख्वा येसुए ओङ्गात ख्वा उछींत जैसिद अइ लिद क्रिए क्रिए बाकेर,

“होसन्ना! दाऊदए ओथोलाव
येसुलाई दाइनो दाइनो ओताक।
परमेस्वरए उमिनत हुव राजा
धन्याकाव ओताक,
स्वर्गताव परमेस्वरए उमिन
बनै ओघ्योःक।”

१०नोर यरूसलेमल याकेसोत नो सहरलाव मिंराए ‘आव सु ओताव?’ लिद काला मुलु ताकेर। ११ओलस हुङ्याव माहोल्याराए, “आव गालील-लाव नासरतनी हुव अगमबक्ता येसु ज्ञ,” है यारादोकेर।

येसुए बेपारीरालाई ध्यान फिमनी
ओरापले-व

(मर्कूस ११:१५-१९; लूका १९:४५-४८;
यूहन्ना २:१३-२२)

१२नकिन येसु ध्यान फिमल पसिद नलाव लंःङ्यावर योःङ्यावरालाई

पले-द पैसा तोङ्यावराए यातेबलर पल्लैदद्याद, कुइतम योःङ्यावराए याकुर्चीर ब ख्यादद्याद, १३“धर्म-सास्त्रल परमेस्वरए ओपाँ इताव सर्सिउ लिङ्या, ‘डा डाफिम पोंखारिन्या फिम जैसिउ लिङ्या।’ जे ते भन आवलाई चोरराए पुप मिताव जैद जेने,” है लिद याखेपैक्यो।

१४नकिन नलाव काना दूँदार ध्यान फिमल येसुए ल्योक याहुक नोरालाई यासगराँक्यो। १५येसुए निताव अचम्बलाव येनर ओदोव रँःद, सोनो ध्यान फिमलाव लुज्जाराए ‘होसन्ना! दाऊदए ओथोलाव येसुलाई दाइनो दाइनो ओताक’ लिद याक्लिङ्याव थैद नलाव मुख्या पुजारीर सोनो सास्त्रीर यारिस चोद, १६येसुलाई, “आवराए याक्लिङ्याव नँ ज्ञ नथैङ्याखेहो, काराव त्रिम दाव नमारापरींङ्याव?” है यादोक ते, येसुए, “हैज्ञ, डा थैव ज्ञ डालिङ्या। धर्मसास्त्रलाव सर्सिउ,

‘अ प्रभु, नँ नमिन सघ्योःन्या
लुज्जार सोनो नुईं ओङ्याव
भाउज्जाराए यायाःनी ज्ञ
जैद ननै’

लिन्या जेमापरिए रो?” है दाद, १७नोरालाई ख्यानैद सहरनी पुलुस्द बेथानिया नाखारल बासिनाके।



ओसै माल्यो नेभारा सीं

(मर्कूस ११:१२-१४, २०-२४)

१८ हो परा:ती छकाल्न्या फरी यरूसलेमदा ओल्द ओबाज़्याक ओकरेए, १९ येम छचोक ओख्यार लपलपौ तोबो नेभारा सीं रँ:द 'ओसैर ले सै' लिद उचिऊनाक ते ओसै तोबो ब मादैक्यो। ओख्यार वाज़ रँ:द नो सींलाई, "आकिनी नसै काता ज़ ताताक," है ओदोव प्राइँना ज़ नो सीं थँके। २० निताव रँ:द उसिसर अचम्ब ताद, "आव सीं कै जैद बेहार ज़ उथँव?" है लिकेर। २१ येसुए फरी, "डा जेलाई साचो है डादाचिज़्या, युँ सुहुप्द तयुँ जैकिन आव नेभारा सींलाई डाजैव मिताव वाज़ मा:क, तोबो हाँलाई 'नँ नतिन भोस्द समुन्द्रल ख्यासिन्के,' है दाकिन, नो हैज़ तान्या ले। २२ है जैद जे जोत मनी जेयुँ हुप्द जेपोंखारिकिन नो दैन्या ज़ जेले।"

येसुए ओहक सोनो यूहन्नाए ओहक

(मर्कूस ११:२७-३३; लूका २०:१-८)

२३ येसुए ध्यान फ़िमल ओपाँ ओरोसथैज़्याक नलाव मुख्या पुजारीर सोनो यहूदीराए यासेरर हुद येसुलाई, "आव नदोज़्याव येनर नँलाई सुए है उदीव, सुए हक उईव?"

है यादोक ते, २४ येसुए, "डा ब जेलाई तोबो है डादाचिदा, नोए ओजवाप जेयाँकिन डा ब आव येन दान्या हक सुए ओयाँव है डादाचिया," है दाद, २५ "रील सछैँज़्याव यूहन्नाए ओयेन परमेस्वरए ल्योनी ताव सैँ मिँराए ल्योनी ताव?" है ओरादोक ते, नोर या याल, " 'यूहन्नाए ओयेन परमेस्वरनी ताव' है गेदचा गेलिकिन, 'हुकी काराव यूहन्नाए ओपाँ जेमाभै:व?' है दान्या ले। २६ फरी 'मिँनी' है गेदचा गेलिकिन मिँराए ल्योनी ओछ्यास लिज़्या। मिँ भरिए यूहन्नालाई अगमबक्ता ज़ है लिद थरैद नैर," है लिद, २७ नोराए येसुलाई, "गेमासैँए," है दोकेर। हा:त ज़ येसुए मनी, "हो ची ताकिन्दा डालाई आव येन दान्या हक सुए ओयाँव डा ब है डामादाच्यो।"

दुई भाइनी निपाँ

२८ "जे आव पाँलाई फाल्चिके — तोबोए ओज़ानी नेब्लो निल्यो दी। नो निबाबु जेथाए ओल्योक बाद, 'अ डाज़ा, आछिम नँ डाएँ:ल येन दानादचाव ताके,' है ओदोक ते, २९ 'डा डामाबा, बाबु,' है दोक्यो दी। खाली छींनी ते उयुँ फकैद बाके दी। ३० हिताव ज़ फरी नो कान्छा ओज़ालाई है ओदोनाक, 'ताए बाबु, डा डाबाया,' है ते दोक्यो दी। खाली

छींनी ते माबाके दी। ३१ है जैद नो नेब्लोनी काताकावए निबाबुए ओपाँ दोन्या?” है ओरादोक ते, “डामाबा है लिद बाव ज़ ताखेहो,” है दोकेर। नाःत ज़ येसुए, “डा जेलाई साचो है डादाचिज़्या, हिताव ज़ सिर्मा स्योःज़्याव पापीर स्रो नो पातर्नी मेंमार जेकिन डादा परमेस्वरए ओराज्याल बान्या लेर। ३२ यूहन्नाए जेल्योक धर्मलाव येम सतैना हुके, जे ते नोए ओपाँ जेमाभैःके। भन सिर्मा स्योःज़्याव पापीर स्रो नो पातर्नी मेंमाराए नोए ओपाँ भैःकेर। जे निताव रँःद ब जेरुँ जेमाफकैए, भैःन्या ब जेमाभैःए।”

अधिया कमैज़्यावराए घर्ती

(मर्कस १२:१-१२; लूका २०:६-१६)

३३ “फरी आव ब तोबो थैचिके — तोबो धनीए ओएँ: भरिल जोम्परसै भाःद प्राइँनी भार्नाए धिरिद, जोम्परसै पीन्या कोलो ब तोबो भाःद, मिँ लिन्या खोपोरा ब तोबो जैद, नो एँ:लाई अधियाल याद ओल तोबो तादा देसड लिनाके दी। ३४ नलाव जोम्परसैर किन्या बेला ओतावत ओयेन दाज़्यावरालाई उजुँ भरी चानाव यापरीक्यो दी। ३५ नो अधिया कमैज़्यावराए भन नोरालाई क्योःद

ख्वारालाई याराप्रोकेर दी, ख्वारालाई लुँ लुराए याराभैःकेर दी, ख्वारालाई यारासैःकेर दी। ३६ फरी छींनी जाँ माहोल्या ओयेन दाज़्यावर ओरापरीक्यो होरालाई मनी हैज़ याराजैकेर दी।

३७ “प्राइँरानी छींत ओज़ालाई ‘आवलाई ताकिन ओमान नैदिर सै’ लिद नोलाई परीक्यो दी। ३८ खाली नो अधिया कमैज़्यावराए ओज़ा उहुज़्याव रँःद या या पाँसिद, ‘आव ते एँ: दैन्या मिँ ची। नोलाई सैःद आव एँ: गेमी ज़ गेजैया’ लिद, ३९ नोलाई क्योःद नो एँ:नी पाखाड लाँद सैःकेर दी।”

४० नकिन येसुए नो मुख्या पुजारीर स्रो नो यहूदीराए यासेररालाई, “नो एँ:ए ओर्गेए अधिया कमैज़्यावरालाई कै याजैवके, है दाँचिके,” है ओरादोक ते, ४१ नोराए, “निताव याफ्याःहुवरालाई सफ्याःद नो एँ: बेला बेलाक ओल उजुँ यान्यारालाई यान्या ले,” है दोकेर। ४२ हाःत ज़ येसुए फरी, “जे आव धर्मसास्त्रलाव पाँ जेपरिखेहो,

‘भुलीराए कान्ल ज़ माज़्यासे लिद याख्याव लुँ

नो ज़ भन भुयारलाव लुँ ताके।

आव ओल परमेस्वरनी ताव

पाँर ज़,

इताव रँःद गे अचम्ब गेताज़्या।”

४३ है जैद डा जेलाई है डादाचिज़्या, परमेस्वरए ओराज्या जेलाई नैद उगुन मामें:द ओयेन दाज़्यावरालाई यान्या ले। ४४ फरी जो मिं नो भुयॉरलाव लुंत पाज़्या ओल ज़ कुतु कुतु तान्या ले। नो लुं फरी ओतर्त उहुकिन भन नप नप ज़ तान्या ले।”

४५ नो मुख्या पुजारीर सोनो फरिसीराए येसुए ओपाँ थैद, “आव पाँ भरी ते गेडैत भा:द ची पाँके,” है लिद, ४६ येसुलाई क्यो:व पैकेर। खाली ओलस लिज़्याव माहोल्यारालाई रँ:द छे:केर, काराव ल्यो ताकिन नो माहोल्याराए येसुलाई अगमबक्ता ज़ है यादोज़्याव।

राजाए ओभत्यार

(लूका १४:१५-२४)

२२ येसुए नोर यारसिउ रँ:द अइ लिद घर्ती तोबो भा:द याएक्यो, २ “स्वर्गताव राज्या ते तोबो राजा स्यासो लिज़्या। नोए खेपा ओज़ाए उबिह्याए जूनी भत्यार जैद, ३ ओनोकोररालाई नो भत्यारल हुन्या सोर ओरायोरालाई खुल्नाव यापरींक्यो दी। नो सोर दैवर भन हुव माभै:केर दी। ४ है जैद फरी ब छुत ओनोकोररालाई खुल्द, “जे नो सोर दैवराए ल्योक फरी ब बाद, ‘राजाए जेजूनी सोइव सोइव मारर सै:द ज़्याव

भरी जैधुक्यो दी, जे काचाबुल ज़ बान्या दी,’ है यारादोनाचिके,’ लिद यापरींक्यो दी। ५ नोर भन सोर माथैव मिताव जैसिद यायेन मारास्द रूवार याएँ:दा, रूवार बेपार दाना बाकेर दी। ६ रूवाराए भन नो किना बाव ओनोकोररालाई क्यो:द बीज्यात जैद यारासै:केर दी।

७ “छीनी नो राजाए नो भरी थैद उरिस चोद उसिपाईर परींद नो सै:ज्यावरालाई खदम जैद यानाखार-लाई ब में: लैद याराएकेर दी। ८ नकिन नो राजाए ओनोकोररालाई खुल्द, ‘भत्यार भरी जैसिधुके, नो सोर दैवर भत्यार ज़्यान्या स्यासोर माताकेर। ९ है जैद जे येम जीदा बाद जो जोर जेरादैज़्या, हो होर ज़ भत्यारल यारारैच्यो,’ है दाद यापरींक्यो दी। १० है जैद नो ओनोकोरर येम जीदा बाद चाव माचाव यारादैव भरी दुप्द भत्यारल यारारैकेर दी। नोर राजाए उफिमल तसी ज़ ब्याल्केर दी।

११ “नकिन राजा ओपाहुनारास दैसिना हुके दी। नल तोबोलाई बिह्यालाव क्वा माक्वाइसिउ रँ:द, १२ राजाए नोलाई, ‘डानै, बिह्यालाव क्वा माक्वाइसिद कै जैद आल नपसिहुव?’ है ओदोक ते, नो मिं लोलोतो:व ज़ ताके दी। १३ हा:त ज़ नो राजाए ओनोकोररालाई खुल्द,

‘आवलाई उखँ उकुइ किद लाँःकाव चुम चुमोल ख्यानाचिके। नल ओहार डर डर कैद चिर चिर किद गघर्क।’ ”

१४ येसुए नो घर्ती नत ज़ तुपैद, “हिताव ज़ खुल्सिउर कुधु ज़ लिज़्यार, छाँतिसिउर ते छ्या ज़ लिज़्यार,” है यादोक्यो।

माहाराजालाई सिर्मा यान्या सैं

मायान्या

(मर्कूस १२:१३-१७; लूका २०:१६-२६)

१५ नो पाँर थैद फरिसीराए, “येसुए ओपाँ कान्नी क्योःद गेएके?” लिद गुमुस्ता दाद, १६ यासिसर सोनो हेरोद राजासकावरालाई येसुए ल्योक यारापरींकेर। नोर ओल्योक बाद, “गुर्बा, नँ गेस नपाँज्याव भरी साचो वाज़ लिज़्या। परमेस्वरए ल्योदा बान्या येम ब साचोस नपैसिज़्या। मिँ रँःद ब नमादोए, सुए ल्योदा ब नमाजैसिए। १७ है जैद गेलाई तोबो पाँ है दाव ताके, माहाराजालाई गे सिर्मा यान्या सैं मायान्या?” है यादोक ते, १८ येसुए नोराए याचाल सैंद, “ए कैफतीर, डालाई काराव जेजाँचिनाज्याव? १९ सिर्मा फोःन्या पैसा डालाई तोबो सतेंदचाँचिके,” है ओरादोक ते, पैसा रैदिके। २० येसुए फरी, “आत सुए

उसुरूप, सुए उमिन उलिज़्याव?” है ओरादोक ते, २१ “माहाराजाए उमीं ज़,” है दोकेर। नकिन येसुए, “हो ची ताकिन्दा माहाराजाए उमीं भरी माहाराजालाई ज़ एच्यो, परमेस्वरए उमीं भरी परमेस्वरलाई ज़ एच्यो,” है ओरादोक ते, २२ नोर अचम्ब ताद नोलाई रास्द बाकेर।

सदुकीराए यापाँ

(मर्कूस १२:१८-२७; लूका २०:२७-४०)

२३ नकिन हो छ्याम ज़ सदुकीर ब येसुए ल्योक तोबो पाँ है दोहुकेर। सदुकी है यारादोज्यावराए ‘सिउकिन सैंसिन्या माताए’ है यालिज़्याव। २४ है जैद नोराए, “गुर्बा, मोसाए ओकानुनल तोबो अइ लिद सर्सिउ लिज़्या, ‘तोबोए ज्या दाद ज़ार मादैद उसिकिन, ओभाइए ओदाज्युए ओथोर माफ्याःन्याए जूनी ओमारूमलाई ओरैवक।’ २५ किताव गेस तोबोए ओज़ार सात भाइ याल्यो। यादाज्युए ज्या दाद ज़ार मादैद ज़ सिके। ओज़ार यामाल्योए ओज्या ओभाइलाई ख्यानैदिक्यो। २६ फरी होए उधूँलावए नो ओमारूमलाई रैद नो मनी ज़ार मादैद ज़ सिके। नकिन साइँला मनी हिताव ज़ ताके। नितावनी ज़

नो मेंमालाई सात भाइए ज़ रैकेर। नोर प्राइँ ज़ार मादैद ज़ सिकेर। २७ प्राइँरानी छीनी नो मेंमा ब सिके। २८ है जैद नो मेंमा सात भाइए याज्या ओतावए अजम्बरी जुनील काताकावए याज्या तान्या?” है लिकेर।

२९ हाःत ज़ येसुए, “जे धर्मसास्त्रलाव पाँ मातीद परमेस्वरए ओसक्ती ब जेमाथरैधुवए ज़ चबनै बिरैद जेनै। ३० अजम्बरी जुनील सुए ज़ ज्या ब मादोर, रे ब मादोर। प्राइँ ज़ स्वर्गताव चाकन्या स्यासोर ताज़्यार। ३१ है जैद जे ‘सिउकिन सैसिन्या माताए’ है ल्यो पैज्यावर आव धर्मसास्त्रलाव परमेस्वरए ओपाँव पाँ थैचिके, ३२ ‘डा अब्राहामए ओपरमेस्वर, इसहाकए ओपरमेस्वर सोनो याकूबए ओपरमेस्वर ज़।’ है जैद मोरोराए यापरमेस्वर माःक, जींदो तावराए यापरमेस्वर ची,” है लिद यासथैक्यो। ३३ नक लिज़्याव माहोल्यार येसुए ओपाँ थैद अचम्ब ताकेर।

प्राइँरानी दान्या येन

(मर्कूस १२:२८-३४; लूका १०:२५-२८)

३४ येसुए सदुकीरालाई थाम थुम ओराख्याव थैद नक लिज़्याव फरिसीर दुप्सिद, ३५ कानुनलाव

तोबो यागुर्बालाई येसुलाई जाँचिना परींकेर। नोए येसुलाई, ३६ “गुर्बा, कानुन भरिरानी प्राइँरानी दान्या काताकाव उलिज़्याव?” है ओदोक ते, ३७ येसुए, “‘जेयुँलाई आदा होदा मादुलैद, जेर्सा मामोंद, जेप्रभु परमेस्वरए ल्योदा युँ थू जैद ओललाई वाज़ मया दान्या।’ ३८ प्राइँरानी ज़ात दान्या येन नो ज़। ३९ होए उधूँलाव येन ब हो मिताव ज़, ‘जेक्याँलाई किताव जेसमारिज़्या, छुतलाई ब हिताव ज़ जेसमारिन्या।’ ४० मोसाए ओकानुन भरी सोनो अगमबक्ताराए यासरो भरी ब आव नेब्लोत थोम्सिज़्या,” है दोक्यो।

ख्रीस दाऊद राजाकिन घेप्पा लिज़्या

(मर्कूस १२:३५-३७; लूका २०:४१-४४)

४१ नकिन नो दुप्सिद लिज़्याव फरिसीरालाई येसुए, “जे डालाई है दाँचिके, ४२ ख्रीस सुए ओथोलाव ओताज़्याव है जेलिज़्या?” है ओरादोक ते, “दाऊदए ओथोलाव ज़,” है दोकेर। ४३ येसुए फरी, “दाऊदए ओथोलाव वाज़ ओताकिन कै जैद धर्मसास्त्रल ओल दाऊदए मनी परमेस्वरए उपुरूसनी ओपाँक

ख्रीसलाई 'डाप्रभु ज़' है ओदोज़्याव?
नो धर्मसास्त्रलाव ओपाँव आव ज़,

४४ 'परमेस्वरए डाप्रभुलाई,
'नसुतुररालाई नखँ धूँल
भाःद डामाईवा पै,
डावोर्दा चुसिद लिन्के,
है दोक्यो।'

४५ है जैद ओल दाऊदए ब ख्रीसलाई
'डाप्रभु ज़' है ओदोकिन नो कै जैद
दाऊदए ओथोल वाज़ उगनिसि-
ज़्याव?" है ओरादोक ते, ४६ येसुस सु
ज़ मापाँधुकेर। हो छ्यामकिन ज़ सुए
ज़ येसुस पाँन्या आँत मादोकेर।

सास्त्रीर स़ोनो फरिसीरालाई थैए
माँतकन

(मर्कूस १२:३८-४०; लूका ११:३६-५२;
१३:३४-३५; २०:४५-४७)

२३ नकिन येसुए उसिसर
स़ोनो नल लिज़्याव
माहोल्यारालाई अइ लिद यासथैक्यो,
२ "सास्त्रीर स़ोनो फरिसीराए मोसाए
ओकानुन पैन्या हक दैद नैर। ३ है जैद
नोराए है यादाचिज़्याव मिताव जेदोदी
ब थिक ज़, खाली नोराए यादोज़्याव
मिताव येन ते तादोच्यो। नोराए यायाःए
वाज़ दोज़्यार, याकुइए ते मादोर। ४ नोर
सुए ज़ यामासयोःधुज़्याव कानुनर जैद

छुतरालाई वाज़ दाव यारापरींज़्यार,
या ताकितर तके ओछचो ब माछुर।

५ नोराए यादोज़्याव भरी ते मिँराए ड़ाक
सतैँन्या वाज़ लिज़्या। नोर परमेस्वरए
ओकानुन सर्सिउ पत्रीलाई घेप्पा जैद
याचाँदीत स़ोनो यापाखोरात पोःद
बारिज़्यार। याक्वारात ब भुम्कार ताःद
बारिज़्यार। ६ नोर सःद घ्योःव घ्योःव
भत्यारराल स़ोनो धर्मसास्त्र फ़िमराल
प्राइँराए रँःन्या पोक चुसिउ पैँज़्यार।
७ बजार जीदा ब 'मिँराए गुर्बा लिद धो
घदासिरक' लिन्या युँ दाद बारिज़्यार।

८ "जे ते फरी 'प्राइँए गुर्बा है
घदासिरक' लिन्यार ताजैसिच्यो। जे
जेगुर्बा ते तोबो वाज़ लिज़्या, जे ते
दाज्यु भाइर ची। ९ जे आव मानुवाताव
मिँरालाई ब कोभालाई बाबु है
तारादोच्यो। जे जेबाबु ते स्वर्गत तोबो
वाज़ लिज़्या। १० फरी जे सःद प्राइँए
याडैताव मिताव ब ताजैसिच्यो। जे
जेडैत तोबो वाज़ लिज़्या, हो ख्रीस ज़।
११ है जैद जे जेल ते जो घेप्पा जेताज़्या,
हो प्राइँए यासेवा दान्या ओजैसिक।
१२ जो ओलनी सघ्योःसिज़्या, हो
ज़िमिज़्या। फरी जो ओलनी सज़िम-
सिज़्या, हो घ्योःरिज़्या।"

१३ "जे कैफती सास्त्रीर स़ोनो
फरिसीरालाई थैए माँतकन ज़ लिज़्या।

जे स्वर्गताव राज्याल बाज़्यावरालाई जेरावैज्या। नो राज्याल जे ते पसिउ जेमाभैःके, भन पसिउ पैज्यावरालाई ब पसिउ जेमाराए।

१४ [“फरी ब सास्त्रीर सोनो फरिसी-रालाई थैए माँतकन ज़ लिज़्या। जे कैफतीर राँदी मेंमारालाई तँनी छाम छुम जेराख्याज़्या, मिँराए ड़ाक वाज़ बनै चाव चाव पोंखारिउ जेजैसिज़्या। जे ते प्राइँरानी घ्योःव सजा ज़ जेदैरिज़्या।]

१५ “जे कैफती सास्त्रीर सोनो फरिसीरालाई थैए माँतकन ज़ लिज़्या। जे तोबोलाई जेचलनल रैन्याए जूँनी समुन्द्र तरिद जेराखिम्नाज़्या, भैःव भैःव गोंर ब कातिद जेराखिम्नाज़्या। तोबोलाई जेदैकिन जेकिन भन ज़ नोलाई नर्गए ओथोलाव जेजैज़्या।

१६ “जे उमी पा॰वए येम पैन्या ओजैसिज़्याव मितावर जेलिज़्या। जे अनाकलाव कानुनर जैद, ‘ध्यान भिम छुद किज्या भाःसिउ, नो किज्या माथ॰रिए,’ है जेलिज़्या। ‘ध्यान भिमलाव सुनलाई छुद भाःकिन वाज़ थ॰रिज़्या,’ है जेलिज़्या। १७ जे किताव जेमी मारैःव भाँकात्यार जेल्यो, कै जैद नो सुनलाई चोखैज़्याव ध्यान भिमकिन नलाव लिज़्याव सुन घेप्पा ओताज़्याव? १८ जे फरी, ‘थानलाई छुद किज्या



(२३:५)

भाःसिउ, नो ब माथ॰रिए। नो थानल लिज़्यावलाई छुद भाःकिन वाज़ किज्या थ॰रिज़्या,’ है जेलिज़्या। १९ जे किताव जेमी मारैःवर जेल्यो, कै जैद नो चरैःसिउलाई चोखैज़्याव थानकिन नलाव चरैःसिउ ओघ्योःज़्याव? २० है जैद किज्या भाःज़्याव मिँए थानलाई छुद किज्या ओभाःकिन नलाव लिज़्याव भरी ब माहुइ रो? २१ हो मिताव ज़ ध्यान भिमलाई छुद भाःकिन नलाव लिज़्याव भरी ब हुज़्या। नलाव लिज़्याव परमेस्वर ब हुज़्या। २२ फरी नमलाई छुद किज्या भाःकिन परमेस्वरए उसिंहासनलाई छुद ओभाःव मिताव ब लिज़्या, ओल



परमेस्वरए उमिन ज़ छुद ओभाःव
मिताव ब लिङ्या।

२३“जे कैफती सास्त्रीर सोनो
फरिसीरालाई थैए माँतकन ज़ लिङ्या।
जे तके दँ जरार घोद दस भा जैद तभा
भितील भाःन्या येन ते जेमाबिरैए।
भन प्राइँरानी ओचाहित ल्यो
कानुनलाव सर्सिउ पाँ, सतस दान्या,
सतत लिन्या, छुतए ल्योदा युँ नान्या,
नो भरी ते जेरास्के। जे ते भन नो
ओचाहित ल्योलाई ब रासो मापरिन्या।
२४जे किताव भाँकात्यार जेल्यो, तोबो
ओभार भाँती ल्यो मिँए ऊँतलाई गाल्द,
तकेजा रूइलाई उरँःक उयुँ माजाम्द
हाइद ख्याज्याव मिँ स्यासोर जेलिङ्या।

२५“जे कैफती सास्त्रीर सोनो
फरिसीरालाई थैए माँतकन ज़ लिङ्या।
जे ताथीर खुरीर जेराचोखोइङ्याव
नो पाखाताव वाज़ लिङ्या। जेयुँल ते
लोभ सोनो जोत ब युँ मानैधुन्या वाज़
लिङ्या। २६जे भाँकात्या फरिसीर,
डादा जेयुँलाई सछैँचिकेदा, पाखाताव
जेक्याँ ब चोखो ज़ तान्या ले।

२७“जे कैफती सास्त्रीर सोनो
फरिसीरालाई थैए माँतकन ज़
लिङ्या। जे सरा थीसिउ मथ स्यासोर
जेलिङ्या। नो मथ पाखानी बनै चाव
पोरो-व रँःङ्या, उजीँल ते चिची

सी डरो मिँराए रूसर वाज़ लिङ्या।
२८हिताव ज़ जे मनी मिँराए डाक बनै
चाव धर्मी मिताव जेजैसिङ्या, जेयुँल
ते कैफत सोनो अधर्म वाज़ लिङ्या।

२९“जे निताव कैफती सास्त्रीर सोनो
फरिसीरालाई थैए माँतकन ज़ लिङ्या।
अगमबक्ताराए याखादरर जेराबनैङ्या,
यामिनताव नैर ब स्यासी जैद, ३०‘गे
गेसाखा पुर्खाराए याबेलाक यास
गेल्यो ताकिन इताव अगमबक्तारालाई
सैःन्या गेमाल्यो,’ है जेलिङ्या। ३१है
जैद ननी ज़, ‘अगमबक्तारालाई
सैःङ्यावराए याथोर गे ज़ गेल्यो’
लिन्या जे ज़ जेथःरैङ्या। ३२है जैद जे
मनी जेसाखा पुर्खाराए यादोङ्याव येन
घसयोःच्यो।

३३“ए घुलर, घुलए ओथोर! जे
नर्गलाव सजानी कै जैद उस्किउ जेदैरि-
ङ्याव? ३४डा जेल्योदा अगमबक्तर,
याबुद्धी ल्योर, सोनो ओल्योदा बान्या
येम पैङ्यावर परीँद डायचिरिङ्या।
जे नोरानी ख्वारालाई जेरासैःरिङ्या,
ख्वारालाई क्रुसत जेरातङ्गैरिङ्या,
ख्वारालाई धर्मसास्त्र भिम भिमल
जेरापोरिङ्या, ख्वारालाई सहर सहरदा
जेराखेपैरिङ्या। ३५है जैद यारासैःव
धर्मी भरी नो ओदाज्युए ओसैःव
हाबिलए ओपालाकिन नो थान सोनो



ध्यान भिमनी निखालाव जेसैःव बेरेक्याहए ओजा जकरिया पैकावराए याभी जेलाई ज़ लागिस्त्रिज़्या। ३६जेलाई साचो है डादाचिज़्या, आव भरी आव बेलाकाव मिंराए ड़ैत ज़ फुलुप्सिरिज़्या।”

३७“ए यरूसलेमलाव मिंर, कै ज़ैद अगमबक्ता भरिरालाई जेरासैःज़्याव, जेल्योक परींसिउरालाई ब लुं लुंए जेराभेःज़्याव? बामाए ओचर्ल्यानीर ओकर धूँल ओरादुप्ज़्याव मिताव, डा ब जेलाई कुधु पाला ज़ डाल्योदा पाथस दुपो डापैके, खाली जे ते जेमाभैःके। ३८है ज़ैद जेभिम रितो ज़ तारिज़्या। ३९डा जेलाई है डादाचिज़्या, आकिन ते ‘परमेस्वरए उमिनताव हुज़्याव धन्याकाव ओताक’ है जेमादाँवा पै डालाई फरी रैःन्या जेमाले।”

खेम्न्या बेलाकाव सरेसर

(मर्कूस १३:१-२३; लूका २१:५-२४)

२४ नकिन येसु ध्यान भिमनी पुलुस्द ओबाज़्याक उसिसराए, “गुर्बा, आव ध्यान भिम काता आः चाव जैसिउ उलिज़्याव,” है यादोक ते, २येसुए, “हैज़, आव भरी चिऊचिके। खाली डा जेलाई साचो

है डादाचिज़्या, छीनी तछा आव भरी तैःद लुंए तर्त लुं ब रहिन्या माले,” है यादोक्यो।

३नकिन जाँवाक येसु जैतून दाँदात चुसिद उलिज़्याक उसिसर याबातड अलगज़ा ओल्योक बाद, “आव नपाँ भरी खर्क ओतारिज़्याव, नँ हुन्या बेला सोनो आव जुक खेम्न्या बेलाकाव सरेस किताव ओतारिज़्याव? गेलाई है दासिके,” है यादोक ते, ४येसुए, “जेलाई सुवाराए भुकैचिन्त्या, जे सैसिद जोगोइसिद लिच्यो। ५मिंर डा डामिन कुद ‘डा ज़ ख्रीस’ है लिद कुधु ज़ हुद कुधुलाई याराभुकैरिज़्यार। ६सोनो ‘आड लरैँ ताज़्या, होड लरैँ ताज़्या’ है यालिज़्याव जेथैक जे ताछेच्यो। आव जुनी ब ताव ज़ परिए, खाली नो खेम्न्या बेला माःक। ७नोकिन डादा जात जात, राज्या राज्या लरैँ दान्या लेर। पो पोल भोंचालोर अनिकालर ब तारिज़्या। ८आव भरी मेंमाए ज़ा दैन्या बेलाक ओघर्लिज़्याव मिताव सुरूलाव दुख वाज़ लिज़्या।

९“नो बेलाक जेलाई मनी जेखिरी पसिद सूपिद सैःचिरिज़्यार। जे डामिनतावर जेतावए प्राइँ जातलाव मिंराए सोचिरिज़्यार। १०नो बेलाक



कुधुए ज़ यायुँ क़्याद डालाई रास्नारिज़्यार। नोर रूवा रूवार या याल ब सोसिद धोका यासिरिज़्यार। ११ फरी कुधुए ज़ आव डापाँ बले-द तँदा पैन्यार जैसिद कुधुलाई ज़ याराबले-रिज़्यार। १२ आव मानुवात अधर्मलाव येन बनै ज़ उमचिउए कुधु मिँराए यामया खेस्त्रिज़्या। १३ खाली जो आव दुखर ओमाखेमा पै थ०रिज़्या, होए ज़ अजम्बरी जुनी दैन्या ले। १४ परमेस्वरए ओराज्यालाव आव चाव था संसार भरिलाव काना कुनीडाव प्राइँ जातलाव मिँराए थैद परमेस्वरए ओसाची यादैवत, बल्ल आव जुक ब खेम्न्या ले।

१५ “है जैद आव ब सैच्यो, जे दानिएल अगमबक्ताए ओसरो मिताव नो ध्यान फ़िमलाव चोखो पोल तोबो फुरी हुद नुल्पा नुल्मा ओजैहुव जेरैःक, १६ हो बेलाक यहूदियाल लिज़्यावर गों जीदा ओधोःरक। १७ थालात लिज़्यावर ब याफ़िमलाव याआल मालर ताचानारक। १८ एँःल लिज़्यावर मनी याक्वार च़ाना याफ़िमदा ताबारक। १९ नो बेलाक याफूल याज़ा ल्योर स़ोनो नुइँ सवैज़्याव आमार युँ नावज़ार। २० खाली धोःन्या बेला ज़्युँःव साहाक स़ोनो नासिन्या

छचाम ताताक लिद परमेस्वरलाई पोंखारिच्यो। २१ हो बेलाकाव दुख बनै धो सहिउ तारिज़्या। निताव दुख आव संसार सुरू ओतावकिन आःपै माहुताए, निताव दुख नोकिन छीनी ब तान्या माले। २२ निताव बेला तावका ताव ज़ उलिकिन सु ज़ रहिन्या मालेर। खाली ओल परमेस्वरए छाँतिद ओरानैज़्याव उमीराए जूनी नो बेला सुतुईदचान्या ले।

२३ “नो बेलाक जेलाई सुवाराए, ‘ख्रीस आड हुद ले, होड हुद ले,’ है यादाचिकिन नोरालाई तारापतिच्यो। २४ रूवार डा डामिन कुद ख्रीस जैसिद हुन्या लेर, रूवार परमेस्वरए उपुरूसनी पाँव जैसिद हुन्या लेर। नोराए अचम्ब अचम्बलाव सरेसर येनर जैद कुधुलाई भुकैन्या लेर। परमेस्वरए ओराछाँतिउरालाई मनी भुकैन्या छचास लिज़्या। २५ है जैद आव पाँर जेलाई ड़ादा ज़ है दाद डानैचिए। २६ मिँराए जेलाई, ‘ख्रीस फलाना बनल हुद ले,’ है यादाचिक होदा ताबाच्यो, फरी ‘फ़िम जींल लिज़्या,’ है यादाचिकिन नोराए यापाँ ब तापतिच्यो। २७ डा मिँ मिन्सिउ डाहुन्या छचाम किताव पुर्बड बिजुली उमिल्लिकक पछयुँड पै ज़गै जैज़्याव,



हिताव ज़ डा मनी प्राइँए रँःन्याक मी चिकलामत ज़ हुन्या डाले। २८किताव खरल ओताक वाज़ का गिदर हुज़्यार, हिताव ज़ तान्या ले।”

ख्रीस फरी उहुन्या छ्याम

(मर्कूस १३:२४-२७; लूका २१:२५-२८)

२६“हो बेलाकाव दुख ओखेमोत निमी ब चुम चुमो तारिज़्या, स्यावैए ओज़गै ब मारिज़्या, सोरोर ब नमतिन तेरिज़्यार, नमताव भरी ब यासतर म्माद थोनोःसिन्या लेर। ३०नाःत ज़ मिँ मिन्सिउ डाहुन्या सरेस नमत रँःरिज़्या। बनै ज़गै मगैव ड़ासक्तीरास बादलरास स्वर्गनी डाहुज़्याव आव मानुवाताव प्राइँ जातलाव मिँराए रँःद नोर यारुँर स्यासे सतेन्या लेर। ३१नाःत ज़ तोबो भोंकरए ओर्गात स्वर्गताव डाचाकज्यार ड़ारापरीवत नोराए नाम नमलाव प्राइँ काना कुनीलाव छाँतिद ड़ारानैज़्याव ड़ामींरालाई ड़ाल्योक यारादुप्पिज़्यार।”

नेभारा सींए ओसरेस

(मर्कूस १३:२८-३१; लूका २१:२९-३३)

३२“आव ब सैंच्यो, किताव नेभारा सीं ओमोम्नाक ‘उभ्याली उहुनाव ची

ओल्यो’ है जेलिज़्या, ३३हिताव ज़ नो है डादाचिउ पाँ भरी ओतानाज़्याव जेरँःक ‘ख्रीस उहुन्या बेला ओतानाव ची ओल्यो’ लिन्या सैंच्यो। ३४डा जेलाई साचो है डादाचिज़्या, आव भरी ओमातावा पै आव जुक खेमन्या माले। ३५आव नाम नम ते खेमन्या ले, डा डापाँ ते खर्क ज़ म्मान्या माले।”

ख्रीस उहुन्या बेला सुए ज़ मासैँर

(मर्कूस १३:३२-३७;

लूका १७:२६-३०, ३४-३६)

३६“नो छ्याम, नो बेला सुए ज़ मासैँर। स्वर्गताव चाकज्याराए ब मासैँर, परमेस्वरए ओज़ाए ब मासैँव, स्वर्गताव डाबाबुए वाज़ सैँज़्याव। ३७है जैद डा मिँ मिन्सिउ डाहुन्या बेला नोआए ओपालाकाव मिताव ज़ तारिज़्या। ३८नोआए ओपालाकाव मिँर ब रीए ओमारागदैवा पै ज़्याद ओद, ज्यार रेर ब दाव येन ज़ यादोज़्याव। नोआ री जहाजल ओमापसिवा पै नोर नो येन दाव ज़ यानैज़्याव। ३९रीए साम सुम ओमारागदैवा पै ‘इताव गेतारिज़्या’ लिन्या मासैँकेर। डा मिँ मिन्सिउ डाहुन्या छ्याम ब हिताव ज़ तारिज़्या। ४०नो बेलाक एँःल येन

२४:२९ यसै १३:१०; ३४:४; इज ३२:७; योए २:१०, ३१; ३:१५

२४:३० दान ७:१३; जक १२:१०-१४ २४:३७ उत ६:५-८ २४:३९ उत ७:६-२४

दाज्यावनिलाई तोबोलाई लाँरिज्याव, तोबोलाई ख्यानैरिज्याव। ४१हिताव ज़ फरी राँथे हे-ज्याव मेंमानिलाई तोबोलाई लाँरिज्याव, तोबोलाई ख्यानैरिज्याव।

४२“है जैद सैसिद लिच्यो, जेप्रभु आव छयाम हुरिज्या लिन्या जेमासैए। ४३आव ब सैच्यो, तोबो फ़िमए ओर्गेए ‘चोर आछिम रील आः बेलाक हुरिज्या’ लिन्या ओसैकिन नो सैसिद लिद उफ़िम पा-व माएखेहो। ४४हिताव ज़ जे मनी सैसिद लिच्यो, काराव ल्यो ताकिन डा मिँ मिन्सिउ मनी जेमासैद उमँःजानी ज़ डाहुरिज्या।”

सतस दाज्याव ओतह ल्यो नोकोर

(लूका १२:४१-४८)

४५“किताव तोबो धनी मिँए सतस दाज्याव ओतह ल्यो ओनोकोरलाई उफ़िमलाव येन भरी उकुइत याद ओयेन दाज्यावबरालाई थिक बेलाक ज़्यावर यान्या जैद ओख्यानैक, ४६नो नोकोरए सतस येन ओदोज्याव ओघरपतीए ओदैहुकिन नो नोकोर असिक दैव ज़ तान्या ले। ४७डा साचो है डादाचिज्या, नो ओघरपतीए प्राईं ज़ उकुइत यान्या ले। ४८फरी नो नोकोर माचाव ओताकिन, ‘डाघरपती हतप्त माहु,’ लिद, ४९ओलस येन दोज्यावबरालाई प्रोद, ओल ज़्याद ओद

मँःए मँःए ओबारिज्याक, ५०ओमासैद ओघरपतीए ओदैहुकिन, ५१नोलाई चम चम जैद कैफतीर ओराख्याज्याव पोल ख्यान्या ले। नल नलावरास याहार डर डर कैद चिर्लनी बिर्ल घन्या लेर।”

दस जना मुँदचाल्नीर

२५ “हाः बेलाक स्वर्गताव राज्याल पसिन्यार कितावर तारके लिक ते, दस जना मुँदचाल्नीर सु सु याबत्तीस ओज्या चाना हुज्याव ब्याहोल्यालाई कींद नैज्याव मितावर तारिज्यार। २नोर पाँच जना यासामा ल्योर, पाँच जना यासामा माल्यो मितावर लिज्यार। ३नो यासामा माल्यो पाँच जनाराए ते बत्ती वाज़ लाँकेर दी, बत्तील भाःन्या मास ते मालाँकेर दी। ४फरी नो यासामा ल्योराए ते बत्तील भाःन्या मास ब लाँद यानैज्याव दी। ५नो मुँदचाल्नीर ब्याहोल्या हुन्या धिलो ओतावए यामीर पातिद होक ज़ स्याँकेर दी।

६“आधा रील तोबोए, ‘दे सोचिके, ब्याहोल्या हुरिके, सु सु जेबत्ती तैःद ब्याहोल्यास दैसिनाचिके,’ है ओरादोक ते, ७प्राईं सोद याबत्तीर बनैद भाःसिकेर दी। ८नकिन नो यासामा माल्योराए यासामा ल्योरास, ‘गेलाई जेमास तुपुरू याव ताके, गे ते

गेबत्तीर सिरिकेर,' है यारादोक ते, ६नो यासामा ल्योराए, 'जेलाई गेयाचिकिन गेलाई ब थेंन्या माले। बुरू जे पसलदा लं:नाचिके,' है यारादोकेर दी। १०नोर लं:ना याबाव प्राइंना ज़ ब्याहोल्या केस्हुके दी। हा:त ज़ नो ब्याहोल्याए यासामा ल्योरास बिह्यालाव भत्यारल पसिद ग्राम गल्क्यो दी।

११“छींनी नो यासामा माल्योर मासर लं:द याहुवत ग्राम गल्सिउ रं:द ग्रामत कोतो कोतो जैद, 'प्रभु, गेलाई ग्राम फ़ैदचासिके,' है यादोक ते, १२ब्याहोल्याए नोरालाई, 'साचो है डादाचिज़्या, डा जेलाई डामासरेस्चिए,' है यादोक्यो दी।

१३“है जैद जे ब सैसिद लिच्यो। जे 'आव छ्याम, आव बेलाक तारिज़्या' लिन्या जेमासैए।”

सुन खेलैसिन्या घर्ती

(लूका १६:११-२७)

१४“फरी स्वर्गताव राज्या तोबो मिँए ओनोकोर भरिलाई खुल्द ओलसकाव लिज़्याव भरी नोराए यापासल भा:द तादा देसदा ओबाव मिताव ब लिज़्या। १५नो ओबान्या बेलाक सु सु यागहक रं:द तोबोलाई पाँच तोला सुन, तोबोलाई नेतोला, तोबोलाई तोतोला याद याख्यानैक्यो दी। १६नो ओबाव छींनी नो पाँच तोला दैवए

बेहार ज़ खेलैसिद ओया:त पाँच तोला हाइक्यो दी। १७हिताव ज़ फरी नो नेतोला दैवए मनी खेलैसिद ओया:त नेतोला हाइक्यो दी। १८नो तोतोला दैवए ते ओघरपतीए उसुनलाई नामल गादैद मोंद नैक्यो दी।

१९“कुधु छींनी नो याघरपती हुद, 'डारायो सुन कै जैज्या' लिद ओनोकोररालाई याखुल्क्यो दी। २०नो पाँच तोला दैव हुद, 'प्रभु, नयाँव पाँच तोला सुन खेलैसिद ओया:त पाँच तोला हाइद डानै,' है ओदोक ते, २१ओघरपतीए, 'स्याबास सतस दाज़्याव डानोकोर, डायुँलाव मिताव मिँ नलिज़्या। तकेज़ा येनलाई ब सतस नदोवए भन कुधु ज़ नकुइत जैद डाईरिज़्या। है जैद नयुँ होलाँ जैद ड़ास रेंनिके,' है दोक्यो दी।

२२“नकिन फरी नो नेतोला दैव हुद, 'प्रभु, नो नयाँव नेतोला सुन खेलैसिद फरी ओया:त नेतोला हाइद डानै,' है ओदोक ते, २३ओघरपतीए नोलाई मनी, 'स्याबास सतस दाज़्याव डानोकोर, डायुँलाव मिताव मिँ नलिज़्या। इताव तकेज़ा येनलाई सतस नदोवए भन कुधु ज़ नकुइत जैद डाईरिज़्या। नँ मनी नयुँ होलाँ जैद ड़ास रेंनिके,' है दोक्यो दी।

२४“प्राइंरानी छींत नो तोतोला दैव हुद, 'प्रभु, नँ बनै कर्रा नतावए नँ ते

नमाभाःव ब नसिम्झ्या, नमानैव ब नलाँज्या। २५ है जैद डाछ्याचेए नो नयाँव सुन नामल गादैद डानैके। किताव नयाँव हिताव ज़ लिज़्या, है ओदोक ते, २६ ओघरपतीए नोलाई, 'ए मीसी, कान्ल ज़ काम मालागिउ डानोकोर, डालाई निताव 'ओमाभाःव ब सिम्झ्याव, ओमानैव ब लाँज्याव' है नदाँज्याव ताकिन, २७ काराव नो सुन ब्याङ्कल नमाभाःव? नल नभाःव ताकिन डाहुवत ओब्याजस दैन्या डाल्यो,' है दाद, २८ नक लिज़्यावरालाई, 'नोलाई नो त्तोतोला नैद दस तोला ल्योलाई एचिके। २९ जोए ओदैवलाई चावस चलैज्याव, होलाई भन ज़ चाःसिद धोल पोगोल ज़ तारिज्या। जोए ओदैवलाई चावस माचलैव, होस छ्या छ्या लिज़्याव ब नैसिरिज्या। ३० नो काम मालागिउ डानोकोरलाई ते चुम चुमोल ख्याचिके। नल ओहार डर डर कैद धस धस गघर्क।' ”

मिँरालाई फाल्न्या छ्याम

३१ “तछा मिँ मिन्सिउ स्वर्गताव ओचाकज्यारास बनै ज़गै मगैवस हुद ओराज्या चलैरिज्याव। ३२ नो बेलाक प्राई देसलाव, प्राई जातलाव मिँरालाई ओल्योक दुप्द किताव बेधा गावलाए बेधा भरी तँदा बाकरा

भरी तँदा ओराजैज्याव, ३३ हिताव ज़ नो राज्या चलैज्यावए मनी नो बेलाक नोरालाई बेधा स्यासो भरी ओवोर्दा, बाकरा स्यासो भरी ओदाबज्यादा जैद, ३४ नो राजाए ओवोर्दाडावरालाई है दान्या ले, 'हुचिके डाबाबुए उयुँलाव मिताव मिँर। नाम नम ओतावकिनकाव जेमिनत नैद ओयाचिउ राज्या जेकुइत रैचिके। ३५ जे डाकरेव बेलाक डाकरे सैःद जेयाँके, री डाछोसो बेलाक डारीछो सैःद जेयाँके, डादुलिरिज्याक ब बासिउ जेयाँके, ३६ नाङ्ग्या डालिज्याक ब जेक्वाइनाके, डाजोरो उहुक ब जेसमारिनाके, भ्यालखानाल डालिज्याक ब जेचिऊहुनाके,' है ओरादोक ते, ३७ नो ओवोर्दाडाव धर्मीराए, 'अ प्रभु, खर्क करे नल्योदा नकरे सैःद गेईव, खर्क नरीछो सैःद गेईव, ३८ खर्क नदुलिरिज्याक बासिउ गेईव, खर्क नाङ्ग्या नल्योदा गेक्वाइनिउ? ३९ खर्क नजोरो उहुक गेसमारिनिउ, खर्क भ्यालखानाल नलिक गेचिऊहुनिउ?' है यादोक ते, ४० नो राजाए, 'जेलाई साचो है डादाचिज्या, डासकाव प्राईरानी जिम्ज़ा काता ज़ माल्योरालाई जेराचिऊव, नोरालाई माःक, डालाई जेचिऊनाव मिताव ज़ लिज़्या,' है दान्या ले।

४१ “नकिन फरी राजाए नो ओदाबज्यादाडावरालाई, 'ए

जेफ्याःहुवर, जे डानी पुलुस्द सैतान स्रोनी ओचाकज्याराए जूनी जैसिउ नर्गलाव चुयाप मातान्या मेंःल बाचिके। ४२डा डाकरेव बेलाक डाकरे सैःद जेमायाँके, री डाछोसो बेलाक डारीछो ब सैःद जेमायाँके, ४३डादुलिरिज्याक ब बासिउ जेमायाँके, नाडग्या डालिज्याक ब जेमाक्वाइनाके, डाजोरो उहुक स्रोनी भयालखानाल डालिज्याक ब जेमाचिऊनाके, है ओरादोक ते, ४४नो ओदाबज्यादाडाव पापीर, 'प्रभु, खर्क करे नल्यो गेरेंःनिउ, खर्क री नछोसो गेरेंःनिउ, खर्क नदुलिरिज्याव गेरेंःनिउ, खर्क नाडग्या नल्यो गेरेंःनिउ, खर्क नजोरो उहुव स्रोनी भयालखानाल नल्यो गेरेंःनिउदा गेमाचिऊनिउ?' है यादोक ते, ४५राजाए नोरालाई, 'डा जेलाई साचो है डादाचिज्या, जे डासकाव प्राइँरानी जिम्जा काता ज़ माल्योरालाई जेमाराचिऊवए, डालाई जेमाचिऊनाव मिताव ज़ लिज्या,' है दान्या ले।"

४६नकिन येसुए, "है जैद जे आव ब सैच्यो, नो ओदाबज्यादाडावर खर्क ज़ माउस्किधुन्या सजाल परिरिज्यार, नो ओवोर्दाडाव धर्मी भरी ते अजम्बरी जुनील बारिज्यार," है यादोक्यो।

येसुलाई सैःन्या गुमुस्ता

(मर्कूस १४:१-२; लूका २२:१-२;

यूहन्ना ११:४७-५३)

२६ येसुए आव पाँ भरी ओखेमोत उसिसरालाई है यादोक्यो, २"आछिमकिन नेलात निस्तार पर्व हुरिज्या। नो बेलाक ज़ डा मिँ मिनिसउलाई क़सत तङ्गैद सैःनारिज्यार," है यादोक्यो। ३येसुए है ओल्यो मिताव ज़ मुख्या पुजारीर स्रोनी यहूदीराए यासैरर तोबो कैयाफा यादोज्याव प्रधान पुजारीए उक्किमक दुप्सिद, ४येसुलाई भुकैद क्योःद सैःन्या गुमुस्ता दोकेर। ५खाली, "पर्व बेलाक माता, मिँर मचिन्या ओछ्यास लिज्या," है लिकेर।

येसुए ओडैत मास थीव मेंमा

(मर्कूस १४:३-६; यूहन्ना १२:१-८)

६हाः बेलाक येसु बेथानिया नाखारल तोबो सिमोन यादोज्याव कुरीए उक्किमक उलिज्याव। ७येसुए नो फ़िमक काँ उज्युज्याक तोबो मेंमाए बनै चाव जिम्जा लुँ जाल उसी डरो बनै ओएः ल्यो मास रैद येसुए ओडैत ओपोःस ज़ थीदिक्यो। ८येसुए उसिसराए नितार रँःद जाँ यारिस चोद, "आव मेंमाए काराव

ना: ओए: ल्यो म्मास खेर ओभा:ज्याव?
 ६बुरू नोलाई यो-द नो पैसाए काता ज़
 माल्योरालाई भा:द ओराएकिन तान्या
 ओल्यो,” है यालिज्याव। १०येसुए
 थैद, “काराव आव मेंमाए उर्युं के:द
 जेएज्याव? नोए ते डाजुंनी बनै चाव
 येन दोक्यो। ११काता ज़ माल्योर ते जेस
 एकतार ज़ लिज्यार, डा ते जेस एकतार
 लिन्या डामाले। १२आवए डाक्याँताव
 थीद ओयाँव म्मास, डा मासिद ज़
 गादैन्या छचामकावए जूनी डामोरोलाई
 थीद ओयाँव मिताव ज़ ताके। १३है
 जैद डा जेलाई साचो है डादाचिज्या,
 संसार भरिल जोड जोड आव चाव था
 यारासथैज्यार, होड होड आव मेंमाए
 ओदोव येन थास्द उमिन ब रहिन्या ले।”

येसुलाई धोका याज्याव इस्करियोत

(मर्कूस १४:१०-११; लूका २२:३-६)

१४नकिन बाह्न जना उसिसरानी
 यहूदा इस्करियोत मुख्या पुजारीराए
 ल्योक बाद, १५“डा येसुलाई जेकुइत
 पारैद डायचिकिन डालाई काता
 जेयाँके?” है ओरादोक ते, नोर खुसी
 ताद चाँदीए पैसा तीस गोता एकेर।
 १६हा:किन नोए येसुलाई धोका यान्या
 मौका खिम्क्यो।

माँदा भरेस ज़्यान्या पर्व

(मर्कूस १४:१२-१६; लूका २२:७-१३)

१७हा:त ज़ माँदा भरेस ज़्यान्या पर्व
 सुरू ओतावत उसंकताव छचाम
 येसुए उसिसर ओल्योक हुद, “नँ
 कै नलिज्या, आव पर्व मानिन्याए
 जूनी ज़्यावर काङ्क जैनान्या?” है
 यादोक ते, १८येसुए, “नो सहरल
 बाचिकेदा, नक तोबो मिसँ दैसिन्या
 जेले। नोलाई, ‘गेगुर्बाए है दीज्याव,
 ओल बान्या बेला ताद ले दी। है जैद
 गे उसिसरास आव पर्व नक्किमक
 मानिउ पैज्याव,’ है दोच्यो,” है दाद
 यापरीक्यो। १९येसुए है ओरादोव
 मिताव ज़ उसिसराए पर्वताव ज़्याव
 भरी जैकेर।

परमेस्वरए उमिनताव भत्यार

(मर्कूस १४:१७-२६; लूका २२:१४-२३;

यूहन्ना १३:२१-३०;

१ कोरिन्थी ११:२३-२५)

२०हो छचाम रिमक येसु बाह्न
 जना उसिसरास नो भिमल दुप्सिद
 ज़्यान्याए जूनी चुसिकेर। २१ज्यावर
 याज्युज्याक येसुए, “डा जेलाई साचो
 है डादाचिज्या, जेनी तोबोए डालाई
 धोका यान्या ले,” है ओरादोक ते,

२२ उसिसर यागहरास, “डा ते माता-खेहो सा, प्रभु,” है लिद पालास है दोकेर। २३ नाःत ज़ येसुए, “जोए डास भरेस चिपल छोइद ज्युज्याव, हो ज़। २४ डा मिं मिन्सिउए ते धर्मसास्त्रलाव सर्सिउ दुखर जुनी ब सयोःव ज़ परिए, खाली डालाई धोका याज्याव मिंलाई ते थैए माँतकन ज़ लिज्या। निताव मिं बुरू ओमाजर्मिकिन तान्या ओल्यो,” है ओरादोक ते, २५ नो धोका याव पैज्याव यहूदा ओल ज़ पर्सिद, “सैं डा ओताव, गुर्बा?” है ओदोक ते, येसुए, “हैज़, नँ ज़ है नलिके,” है दोक्यो।

२६ नकिन नो याज्युज्यावत ज़ येसुए उकुइत भरेस तोबो रैद, असिक निद नो भरेसलाई केःद, “हाँ, आव ज्युचिके। आव डाक्यौं ज़,” है दाद भाःद याएक्यो। २७ हो मिताव ज़ फरी खुरी उकुइत रैद धन्याबाद चरैःद, “जे प्राइँए आव खुरीनी ज़ ओचिके,” है लिद नोरालाई याद, २८ “आव जेओज्याव कुधु मिंराए पाप क्याल्दचान्याए जूनी डासोभोरिज्याव डाभी ज़। आनी ज़ परमेस्वरए जेस साःरो बाचा नैदचाचिरिज्याव। २९ डा जेलाई है डादाचिज्या, डा स्वर्गताव डाबाबुए ओराज्याल जेस सिप गेमातावा पै आव भत्यारलाव दाखमदच आछिमकिन

ओन्या डामाले,” है यादोक्यो। ३० नकिन भजन तोबो गैद ननी पुलुस्द जैतून दाँदादा बाकेर।

पत्रुसए ओय्रेन येसुए डादा ज़ है ओदोव

(मर्कूस १४:२७-३१; लूका २२:३१-३४; यूहन्ना १३:३६-३८)

३१ नक याकेसोत येसुए उसिस-रालाई, “जे आछिम रील ज़ डालाई प्राइँए रास्न्या जेले। धर्मसास्त्रल इताव सर्सिउ लिज्या,

‘बेधाराए यार्गे गावलालाई
प्रोद डसैःवत,
बेधार चितराँ पुतराँ तारिज्यार।’

३२ हैदी ब सिउनी सैसिद जेडादा ज़ गालीलल डाबारिज्या,” है यादोक्यो। ३३ हाःत ज़ पत्रुसए, “उपुर्कावराए प्राइँए यारास्निदी ब डा ते नँलाई खर्क ज़ रास्न्या डामाले,” है ओदोक ते, ३४ येसुए, “डा नँलाई साचो है डादींज्या, आछिम रील ज़ भाल्या ओमाकोद डालाई सोंखेप ‘डामासरेसे’ है दान्या नले,” है ओदोक ते, ३५ पत्रुसए फरी, “माःक, डा नँस सिन्या ओतादी ब डा नँलाई डामासरेसे है लिन्या डामाले,” है दोक्यो। उपुर्कावराए मनी हैज़ लिकेर।

येसुए गेतसमनील ओपोंखारिउ

(मर्कूस १४:३२-४२; लूका २२:३६-४६)

३६ नकिन येसु उसिसरास गेतसमनी यादोज्याव बगैचाल बाद उसिसरालाई, “डा जाँ होकसैकावक बाद डापोंखारिवा पै जे आक ज़ लिच्यो,” है दाद, ३७ पत्रुस सोनो जब्दियाए ओज़ानी याकूब सोनो यूहन्नारालाई ओलस यालाँक्यो। हाःत ज़ येसु उयुँर स्यासे सतेद धो थाइव तानाद, ३८ नो सोम्लोरालाई, “डायुँर स्यासे तेद सिवा सिवा ताद डाले। जे आक ज़ लिद डास सैसिद लिचिके,” है दाद, ३९ नोराकिन छ्यावा होकसै बाद नामक फुलुप्सिद अइ लिद पोंखारिक्यो, “अ बाबु, आव डाक्याँत हुरिज़्याव धो सहिउ दुखर भर्सकी वैदयाँके। खाली डा डायुँ माःक, नँ नयुँ ओताकिन वाज़,” है लिद, ४० नो सोम्लोराए ल्योक उहुवत नोर इल्द यालिज़्याव दैहुद पत्रुसलाई, “जे कै जैद डास तघन्ता पै ब जेमालिधुज़्याव? ४१ सैसिद पोंखारिचिके, मानी दुखराल जेमाथोरिधुया। जेयुँ ते दान्या ज़ पैज्याव, खाली पाखाताव जेक्याँए ते मासहिधुन्या ओछ्यास लिज़्या,” है दोक्यो।

४२ नकिन येसु फरी ब डादाडाव ओपोंखारिज़्याव पोक बाद अइ लिद पोंखारिक्यो, “डाबाबु, आव डाक्याँत हुरिज़्याव धो सहिउ दुखर डा मासहिद ज़ मातान्या ओल्यो ताकिन, है नलिज़्याव मिताव ज़ ओताक,” है लिद, ४३ नो सोम्लोराए ल्योक उहुक फरी इल्द यालिज़्याव ज़ यादैक्यो। नोराए यामीर बनै पातिद मासहिधुकेर।

४४ है जैद नोरालाई ख्यानैद फरी ब डादाडाव पोक बाद डादाकिनकाव मिताव ज़ पोंखारिक्यो। ४५ नकिन फरी नो सोम्लोराए याल्योक हुद, “आःपै जेमीर मायोःताए रो? अब ते डा मिँ मिन्सिउ पापीराए कुइत सँपिसिन्या बेला हुके। ४६ च्याँःसिचिके, गेबा। डालाई धोका याज़्याव मिँ नक ज़ हुद ले,” है यादोक्वो।

येसुलाई याक्योःहुव

(मर्कूस १४:४३-५०; लूका २२:४७-५३;

यूहन्ना १८:३-१२)

४७ येसु ओपाँज्याक ज़ नो बाह जना उसिसरानिकाव यहूदा इस्करियोत बनै माहोल्या मिँरास तरवालीर खोंतार रैद हुकेर। नोर मुख्या पुजारीर सोनो यहूदीराए यासेरराए ल्योनी हुवर याल्यो। ४८ नो इस्करियोतए

डादा ज़ नो क्योःना हुज़्यावरालाई, “डा जोलाई माईं डादोए, होलाई ज़ क्योःच्यो,” लिद सरैस याद ओरानैज़्याव। ४९ है जैद बगैचाल याकेसो प्राईंना इस्करियोत येसुए ल्योक बाद, “जेरो गुर्बा,” लिद माईं दोक्यो। ५० हाःत ज़ येसुए, “अ डानैं, डाक्याँत नदान्या दोके,” है ओदोव प्राईंना ज़ नो माहोल्थार हुद येसुलाई ताप तप क्योःकेर।

५१ हाःत ज़ येसुसकाव तोबोए ओतरवाली हाइद प्रधान पुजारीए ओनोकोरलाई तँनिकाव ओर्ना पल्द सतेदिक्यो। ५२ येसुए निताव रँःद, “नतरवाली उसिपल भाःके। तरवाली चलैज़्यावर तरवालीनी ज़ सिरिज़्यार। ५३ डा डाबाबु परमेस्वरस डान्निकिन बाह पलतन ओचाकज्यार तादी ब डालाई परींद्यान्या ले, नो जेमासैँए रो? ५४ खाली निताव डान्निकिन आव डाक्याँत ताव परिन्थ्या धर्मसास्त्रलाव सर्सिउ पाँर कातानी ओयोःरिज़्याव?”

५५ नकिन येसुए नो क्योःना हुव माहोल्थारालाई, “काराव डालाई दाँकालाई मिताव तरवालीर खोंतार दाद जेक्योःहुनाव? डा जेलाई दिनकाव ज़ ध्यान फ़िमल परमेस्वरए ओपाँ ड़ासथैचिक जेमाक्योःनाके। ५६ खाली अगमबक्ताराए धर्मसास्त्रल

यासरो मिताव सयोःन्याए जूनी ची इताव ताके,” है ओरादोव प्राईंना उसिस भरी येसुलाई रास्द चितराँ पुतराँ धोःकेर।

येसुलाई घ्योःव कचरील यालाँव

(मर्कूस १४:५३-६५;

लूका २२:५४-५५, ६३-७१;

यूहन्ना १८:१३-१४, १६-२४)

५७ नकिन नो क्योःना हुवराए येसुलाई प्रधान पुजारी कैयाफाए ल्योक लाँकेर। नक सास्त्रीर स्रोनो यहूदीराए यासैरर दुप्सिद यालिज़्याव। ५८ नो बेलोक पत्रुस जाँ तादाड याछीं याछीं हुद नो प्रधान पुजारीए ओचतराक ज़ हुद ‘येसुलाई कै याजैज़्याव ब्याँ?’ लिद पाल्याराए छ्योक ज़ चुसिके। ५९ नो फ़िमल मुख्या पुजारीर स्रोनो घ्योःव कचरीलाव सैर भरिए येसुए ओडैँत माचाहिउ पाँर भाःद सैःन्या कर याखिम्ज़्याव। ६० धुत गोहाई पाँन्यार कुधु ज़ ताकेर, खाली कर ते कान्त ज़ मादैकेर।

बल्ल प्राईंरानी छींनी नेब्लो हुद, ६१ “आवए, ‘परमेस्वरए ओध्यान फ़िमलाई तैःद फरी स्रोलात हिताव ज़ डाजैरिज़्या,’ है ओल्यो गिन ज़ गिन्थैके,” है निरादोव प्राईंना ज़,



६२ प्रधान पुजारी च्याँ:सिद येसुलाई,
“नँ नपाँ काता ज़ ओमालिज़्याव
रो? आवनी नडैत भा:द निर्ईव पाँ
किताव उलिज़्याव?” है ओदोक
ते, ६३ येसुए घाइ ज़ मादोक्यो। फरी
प्रधान पुजारीए, “जींदो परमेस्वरए
उमिननी है डादींज़्या, नँ गेलाई है
दासिके, नँ परमेस्वरए ओज़ा ख्रीस
सैं मा:क?” है ओदोक ते, ६४ येसुए,
“नँ है नलिज़्याव मिताव डा साचो
हो ज़। तछा डा मिँ मिन्सिउलाई
माहान परमेस्वरए ओवोर्दा चुसिद
डालिज़्याव ब रँ:न्या जेले, स़ोनो
स्वर्गतिन बादलरास डाहुज़्याव ब
रँ:न्या जेले,” है यादोक्यो।

६५ हो प्राइँना ज़ प्रधान पुजारीए
उरिसए ओक्वार चीए चीए, “जे ज़
जेथैके, आवए परमेस्वरए उमिन
ओबले-ज़्याव। छुत गोहाई काता
ओचाहिउ? ६६ जे कै जेलिज़्या?”
है ओरादोक ते, नोराए प्राइँए,
“आवलाई सै:न्या ज़,” है लिद,
६७ ख्वाराए मुत्काए प्रोकेर, ख्वाराए
लप्ताए प्रोकेर, ख्वाराए त्रिल्केर।
६८ नै जैज़्यावराए फरी, “नँ साचो
ख्रीस ताकिन, गेलाई है दासिके,
नँलाई प्रोज़्याव सु?” है लिद
बरे-केर।

पत्रुसए ‘येसुलाई डामासरेसे’ है ओरादोव

(मर्कुस १४:६६-७२; लूका २२:५६-६२;
यूहन्ना १८:१५-१८, २५-२७)

६६ येसुलाई नै याजैज़्याक पत्रुस
चतराक ज़ चुसिद उलिज़्याव। नो
बेलाक ज़ तोबो नलाव येन दाज़्याव
मेंमा हुद पत्रुसलाई, “नँ मनी
गालीललाव येसुस नल्यो सानी,” है
ओदोक ते, ७० पत्रुसए प्राइँए याड़ाक,
“नँ काता नपाँज़्याव इताव, डा ते
डामासैए,” है दाद, ७१ साँबिलाक
उचुसिनाक फरी छुत तोबो येन
दाज़्याव मेंमा हुद नक लिज़्यावरालाई
है यादोक्यो, “आव मिँ ते नासरतलाव
येसुसकाव ज़,” है ओरादोक ते,
७२ पत्रुसए किज्या भा:द, “डा नो है
नलिज़्यावलाई सरेस ज़ डामासरेसे,”
है दोक्यो। ७३ फरी छ्यावाक नक
लिज़्यावर पत्रुसए ल्योक हुद, “नँ
साचो उसिसरासकाव ज़, नपाँनी ज़
गेसरेस्निज़्या,” है यादोक ते, ७४ पत्रुस
बनै थल्सिद किज्या भा:द, “डा नो
मिँलाई सरेस ज़ डामासरेसे,” है
ओरादोव प्राइँना ज़ भाल्या कोके।
७५ ना:त ज़ डादा येसुए पत्रुसलाई,
“भाल्या ओमाकोद ज़ डालाई सोंखेप



‘डामासरेसे’ है लिन्या नले,” है ओदोव पाँ ब चेतैक्यो। नो चेतैद पत्रुस लाँःक पुलुस्द धस धस घर्के।

येसुलाई रोमी सरकारए ल्योदा यासूँपिउ

(मर्कूस १५:१; लूका २३:१-२;
यूहन्ना १८:२८-३२)

२७ छकाल्न्या घग ज़ मुख्या पुजारीर स्रोनो यहूदीराए यास्रेरराए येसुलाई सैःन्याए जूँनी सल्ला दोकेर। २येसुलाई किद रोमी सरकारलाव पिलातसए ल्योक लाँद सँपिकेर।

इस्करियोत भुन्दैसिद ओसैःसिउ

(ओसाचीर १:१८-१९)

३नाःत ज़ येसुलाई धोका याज़्याव यहूदा इस्करियोतए येसुलाई सैःन्या ज़ याथःरैव रँःद, ‘डा ते मादान्या येन ची डादोव ओल्यो’ लिद उयुँर माचाव दाद मुख्या पुजारीर स्रोनो यहूदीराए यास्रेरराए ल्योक बाद नो यायो तीस गोता चाँदीए पैसा यालाई ज़ सोवोल्दद्याद, ४“डा ते कान्त ज़ ओखत माल्योलाई अन्नाकल ज़ धोका याद मादान्या ची डादोव ओल्यो,” है ओरादोक ते, नोराए, “जो तादी ब

ताधुके, गेलाई घाइ तादासियो,” है यादोव प्राइँना ज़, ५इस्करियोतए नो यायो चाँदीए पैसा याड़ाक ज़ ध्यान फ़िमल ओदोइद ख्यानैद ननी पुलुस्द बाद ओल ज़ भुन्दैसिद सैःसिके।

६मुख्या पुजारीराए ते नो ओख्याव पैसार तीद, “आव ते भ्नीए ओएःलाव पैसा ची, ध्यान फ़िमलाव भितील थोम्न्या माताए,” लिद, ७या याल सल्ला दाद नो पैसाए तादा तादानी हुव मिँरालाई यासिक गादैन्याए जूँनी तोबो कुमाल्याए ओएँः लँःकेर। ८है जैद हो छचामकिन ज़ नो एँःए उमिन ‘भ्नीए एँः’ ताके। ९आनी ज़ यर्मिया अगमबक्ताए ओसरो मिताव योःके। नोए ओसरो आव ज़,

‘इसाएलीए ओथोराए नोए

ओक्याँताव यामुलिउ ओएः

चाँदीए पैसा तीस गोताए

१०परमेस्वरए है ओल्यो मितावनी ज़ कुमाल्याए ओएँः लँःन्या लेर।’

रोमी सरकारलाव पिलातस

(मर्कूस १५:२-१५; लूका २३:३-५, १३-२५;
यूहन्ना १८:३३-१९:१६)

११नाःत ज़ येसुलाई रोमी सरकार-लाव पिलातसए ओड़ाक यासच्याँक पिलातसए येसुलाई, “नँ साचो



यहूदीराए याराजा ज़ रो?” है ओदोक ते, येसुए, “नँ ज़ नथःरैनाके सानी,” है दोक्यो। १२नाःत ज़ मुख्या पुजारीर सोनो यहूदीराए यास्रेरराए येसुलाई खत यालैज़्यावत ब येसुए घाइ ज़ मारादोक्यो। १३निताव थैद पिलातसए येसुलाई, “काता नाः कुधु पाँर नडैत भाःद याईज़्याव नमाथैए रो?” है ओदोक ते, १४भन ज़ घाइ मालिद तोबो ब मापाँके। निताव रँःद पिलातस बक्क ताके।

१५नोए सालकाव तखेप निस्तार पर्वत यहूदीराए जो कैदीलाई ‘रास्दचासिके’ है लिज़्यार, होलाई ज़ रास्द ओराएज़्याव। १६नो बेलाक तोबो बारब्बा यादोज़्याव बनै उमिन थासो कैदी भयालखानाल उलिज़्याव। १७है जैद माहोल्यार यादुप्सिज़्याक पिलातसए, “भयालखानाल लिज़्याव बारब्बालाई रास्न्या सैं ख्रीस यादोज़्याव येसुलाई रास्दचान्या? जे ज़ है लिचिके,” है यादोक्यो।


१८ओल पिलातसए ते ‘आवराए येसुलाई अनाकल ज़ यामी तूद सूँपिद नैनार’ लिन्या सैंद ओनैज़्याव। १९फाल्न्याए जूँनी उचुसिउत पिलातसए ओज्याए येसुए उजूँनी अइ लिद तोबो था परींक्यो,

“नो सैःव यापैज़्याव धर्मी मिँए उउपर्त नँ मादान्या तादोयो। आछ्या रीलाव डामँल आव मिँए उजूँनी डायुँर स्यासे तेद बनै धो थाइव डाताके,” है लिद परींक्यो। २०मुख्या पुजारीर सोनो यहूदीराए यास्रेरराए ते भन मिँरालाई प्राइँ याल्योदा जैद नो भयालखानाल लिज़्याव बारब्बालाई रास्द येसुलाई सैःन्या है लिच्यो है दाद यारानैज़्याव।

२१पिलातसए फरी, “नोनी काताकावलाई रास्दचान्या?” है ओरादोक ते, “बारब्बालाई रास्दचासिके,” है दोकेर। २२पिलातसए, “हुकी नो ख्रीस यादोज़्याव येसुलाई डा कै जैन्या की?” है ओरादोक ते, नोराए प्राइँए तपाँ जैद, “क्रुसत तङ्गैद सैःन्या,” है दोकेर। २३पिलातसए फरी, “काराव? आवए मादान्या काता दाद ओनैज़्याव?” है ओरादोक ते, नोर भन ज़ मचिद, “क्रुसत तङ्गैद सैःन्या,” है लिद बनै ज़ क्रिकेर।

२४नाःत ज़ पिलातसए, आवरालाई ते कै जैद ब माताके, भन ज़ मचिरिकेर लिद री रैद नोराए याङ्क उकुइर हुसिद, “दे चिकुनाचिके, आव येननी डाछेसिके। आवए उभी डालाई तालागिस्क, जेलाई ज़ ओलागिस्क,” है ओरादोक ते, २५नो माहोल्याराए,





“नोए उभी ओलागिस्किन गे गेक्याँत सोनो गेजाराए क्याँत ज़ ओलागिस्क,” है याल्यो प्राईना ज़, २६पिलातसए बारब्बालाई रास्दद्याद येसुलाई रीःद, क्रुसत तङ्गैद सैःन्याए जूनी सिपाई-रालाई ज़ यासूँपिक्यो।

सिपाईराए येसुलाई यागिल्लैव

(मर्कूस १५:१६-२०; यूहन्ना १९:२-३)

२७नकिन पिलातसए उसिपाईराए येसुलाई दरबार जील लाँद रोमी

पलतन भरी यारादुप्केर। २८नोराए येसुए ओक्वार सिउःदद्याद राजाराए याक्वाइसिज़्याव मिताव घ्यामो क्वा जास्द, २९जुए मुकुत तोबो रूंद ओडैत जास्द वोर्फताव उकुइत भाताए भुइ तोबो सक्योःद ओड्वाक याघूँदानी तिकिसिद, “ए यहूदीराए याराजा, जय जय ओताक,” है लिद बरेःद, ३०तिल्द, उकुइताव भाताए भुइए ज़ ओडैत प्रोदिकेर। ३१गिल्लैद गिल्लैद चिम यादोवत नो घ्यामो क्वा सिउःदद्याद ड़ादाडाव ओक्वार ज़ जास्द क्रुसत तङ्गैना लाँकेर।

येसुलाई क्रुसत यातङ्गैव

(मर्कूस १५:२१-३२; लूका २३:२६-४३;

यूहन्ना १९:१७-२७)

३२येसुलाई सैःना यालाँज्याक येमक तोबो कुरेनीलाव सिमोन यादोज्यावस यादैसिक नोलाई येसुए ओलाँज्याव क्रुस सुघुर्द, ३३गलगथा यादोज्यावक केस्केर। नो पोए उमिन ‘खप्पज्या पो’ है ब यादोज्याव। ३४नक येसुलाई काव वासः भाःसिउ दाखमदच सवैकेर। येसुए दार्द ओव माभैःके। ३५येसुलाई क्रुसत तङ्गैद ओक्वारात गोला भाःद भाःद, ३६नक ज़ चुसिद येसुलाई गुद



नैकेर। ३७ ओललाई तङ्गैद यानैज्याव क्रुसए ओडैत,

“आव यहूदीराए याराजा येसु ज़” है लिद तोबो फल्यात ओखत सर्द चकेर। ३८ हो छयाम नेब्लो चोरनिलाई मनी, तोबोलाई ओवोर्दा तोबोलाई ओदाबज्यादा जैद क्रुसत तङ्गैद यारानैज्याव।

३९ आनी हुनी भाल्सिना हुवराए याडैर डत डत जैद थल्द, ४० “नँ ध्यान फिमलाई तैःद सोलात डाजैरिज्या है लिज्याव मिँ, नक्याँलाई कै जैद नमाबाँचैधुज्याव? नँ साचो ज़ परमेस्वरए ओजा ताकिन नो क्रुसतिन भरिद हुन्के,” है दोकेर। ४१ हिताव ज़ मुख्या पुजारीर सोनो यहूदीराए यासेरर, सास्त्रीराए मनी येसुलाई गिल्लैद, ४२ “आवए छुतरालाई ताकितर याबाँचैज्याव, ओल ओक्याँलाई कै जैद ओमाबाँचैधुज्याव? इस्राएलीराए याराजा है लिज्याव नो क्रुसतिन भरिद उहुकिन वाज़ ओपाँ पतिन्या गेले। ४३ आव मिँ परमेस्वरए ओक्याँत ख्यासिद लिज्याव ओताव ताकिन परमेस्वरए ओल्योदा उयुँ थू जैद पला-हुखेहो। ओल कै जैद ‘डा परमेस्वरए ओजा ज़’ है उलिज्याव?”

है लिकेर। ४४ ओलस तङ्गैसिउ चोरनी मनी नोराए है याल्यो मिताव ज़ है लिकिनी।

येसु उसिउ

(मर्कुस १५:३३-४१; लूका २३:४४-४६;

यूहन्ना १९:२८-३०)

४५ नकिन अधमर लावाकिन तीन बजे पै देस भरी काल्या कले भयाके। ४६ तीन बजेवाक येसु बनै चोइस, “इलोई, इलोई, लामा सबखथनी?” है लिद क्रिके। नोए ओसै, “अ डापरमेस्वर, अ डापरमेस्वर, डालाई काराव नरास्नाव?” ४७ नक च्याँसिद लिज्यावराए नो पाँ थैद ख्वाराए, “आवए ते एलियालाई ची उखुल्ज्याव सा,” है लिद, ४८ तोबोए धोंःनाद भाताए उतुपात थाकना पोःद सिरो दाखमदचल छिम्द येसुए ओयाःत भाःदद्याद पिउ परीक्यो। ४९ उपुर्कावराए ते, “अब ते चिऊद गेनैया, एलिया कातारानी हुद माहाइज्याव?” है लिकेर। ५० नाःत ज़ येसु फरी ब बनै चोइस क्रिद उस० सफ्याःक्यो।

५१ हो प्राइँना ज़ ध्यान फिमलाव बारिसिउ क्वा ब उतुपानी ओजराड पै



ओलनी ज़ न्नेपरा ताद चिस्के। नामर थोनोःसिद, हॉर पाःद, ५२सिउराए याखादरर ब फुकेर। सिउ धर्मी मिँर ब कुधु सैसिद सोकेर। ५३खाली येसु सिउनी सैसिद ओसोव छीनी वाज़ नोर याखादरनी पुलुस्द यरूसलेम सहरल याबावत कुधु मिँराए याड़ाक सरैःसिकेर। ५४नो येसुलाई गुज़्याव कप्तान सोनो ओलस लिज़्याव पाल्याराए निताव भोंचालोर, अचम्ब अचम्बलावर रँःद नोर बनै छेःद, “आव ते साचो ज़ परमेस्वरए ओज़ा ची ओल्यो,” है लिकेर।

५५हो बेलाक गालीलनी हुव मेंमार येसुस बारिद ओसेवा दाज़्यावर जाँ तादानी येसुलाई चिऊद यानैज़्याव। ५६नोरानी मरियम मगदलिनी, याकूब सोनो योसेफनी निआमा मरियम, जब्दियाए ओज़ानी निआमा ब ओल्यो।

येसुए ओमोरो खादर पुपल

याभाःव

(मर्कूस १५:४२-४७; लूका २३:५०-५६;

यूहन्ना १६:३८-४२)

५७ज्याम्या रिमी ओभ्यानाक तोबो अरिमाथियालाव धनी मिँ योसेफ यादोज़्याव हुके। नो मिँ ओल मनी

येसुए ओपाँत बाज़्याव मिँ ज़ ओल्यो। ५८नोए पिलातसए ल्योक बाद येसुए ओमोरो न्निक्यो। पिलातसए नोए ओपाँ थैद येसुए ओमोरो लाँव एक्यो। ५९है जैद योसेफए येसुलाई नो क्रुसतिन हाइद पालो क्वाए लुम्बैद, ६०ओल उजूनी दावन खुपिद पुप जैद ओनैज़्याव साःरो खादरल भाःद ओयामक घ्योःव लुँए कद ख्यानैक्यो। ६१योसेफए येसुलाई खादरल ओभाःज़्याव बेलाक मरियम मगदलिनी सोनो ओनै मरियमनी नक चिऊद निनैज़्याव।

खादरक पाल्यार यारानैव

६२हो पराःती नासिन्या छ्याम ओतावत मुख्या पुजारीर सोनो फरिसीर दुप्सिद पिलातसए ल्योक बाद, ६३“हाकिम सायेब, नो छुल्या ओमासिद ज़, ‘सोलात सैसिद डासोरिज़्या,’ है उलिज़्याव थैद गेनै। ६४है जैद नँ नो सोला भरी ओमाखेमा पै गुन्या पाल्या खादरक नैदचाव ताके, मानी कातारानी उसिसर हुद ओमोरो हाइद लाँद मिँरालाई ‘सिउनी सैसिद सोके’ है ल्यो ब पैज्या। नै ओताकिन ज़ादाडावकिन भन ज़ बलेस्न्या ले,” है यादोक ते, ६५पिलातसए,

“सिपाईर लाँद जे ज़ नोरालाई पाथस गुव यारापरींचिके,” है ओरादोक ते, ६६नोर ननी बाद नो खादर पोक सु ज़ माबाधुन्या जैद पाल्यार नैद नो कसिउ लुँत माफैन्या छाप ब भाःकेर।

येसु सिउनी सैसिद ओसोव

(मर्कूस १६:१-८; लूका २४:१-१२;

यूहन्ना २०:१-१०)

२८ नासिन्या छ्याम ओखेमोत सातालाव उस०कताव छ्याम नम उसंनाक मरियम मगदलिनी, ओनैँ मरियमस खादर पोदा चिऊनाकिनी। २हाःत ज़ तोबो बनै घ्योःव भोंचालो हुद परमेस्वरए ओचाकज्या स्वर्गतिन भरिहुद नो कसिउ लुँलाई पलतैद नो लुँत चुसिके। ३नो चाकज्याए ओडाः बनै ज़ भिलिक भिलिको उलिज्याव, ओक्वार ब पोम स्यासो तक तकौर यालिज्याव। ४नो गुज्याव पाल्यार नोलाई रँःद याछ्याचेए भुम भुम गूद धलिद सिउ स्यासो ज़ ताकेर।

५नो चाकज्याए नो मेंमानिलाई, “जिन ताछेःचिन, नो कूसत तडैद यासैःव येसुलाई जिन्विम्हुज्याव ज़ ताखेहो। ६नो आल माले। ड़ादाकिनकाव है ओदाचिज्याव मिताव नो सैसिद सोधुके। अछादी आव यानैव पो चिऊचिन्केदा, ७उसिसराए ल्योदा

हतप्त ज़ बाद, ‘गेप्रभु सिउनी सैसिद सोके। जेड़ादा ज़ गालीलदा बाज्या दी, होड ज़ ओलस दैसिन्या जेले,’ है यारादोनाचिन्के,” है दाद फरी नोनिलाई, “आव भरी साचो ज़ है दाद ड़ानैचिने,” है उनिदोव प्राइँना, ८नोनी बनै छेःद निरेंतए चह चह ताद खादर पुपनी पुलुस्द धोःनाद उसिसरालाई है यारादोनाकिनी। ९निबाज्याक येमक ज़ येसु उमँःजानी निडाक च्याँःसिद, “जिनयुँ होलाँ जैचिन्के,” है उनिदोव प्राइँना ज़, नोनी उखँ क्योःद धो दोकिनी। १०नकिन येसुए नोनिलाई, “ताछेःचिन, नो डाभाइरालाई, ‘जे प्राइँ गालीलदा बाचिके दी, प्रभुस होड ज़ दैसिन्या जेले दी,’ है यारादोचिन,” है निदोक्यो।

पाल्यारालाई धुत पाँव यारापरीं

११नोनी येमत निबाज्याव बेलाक, येसुए ओमोरोलाई गुज्याव रूवा पाल्यार सहरल बाद नो यारँःव भरी प्राइँ ज़ मुख्या पुजारीरालाई है यारादोकेर। १२नो पुजारीराए पाल्याराए यापाँ थैद यहूदीराए यासैररास दुप्सिद सल्ला दाद नो पाल्यारालाई, कुधु पैसार याद, १३“आव जेपाँ सुलाई ज़ है तारादोच्यो। बुरू जे, ‘गे रील ड़ल्द गेलिज्याक उसिसर हुद गेमासैँद हाइद यालाँव ओल्यो,’ है लिच्यो।” १४फरी,

“आव पाँर कैताराक हाकिमए ल्योक ओकेस्किकन जे ताछेःच्यो, जेजूनी पाँन्या गे ज़ गेलिज़्या,” है लिद यारापरीकेर। १५ है जैद नो पाल्याराए नो पैसार रैद नो है यारादोव मिताव ज़ है यारादोनाकेर। है जैद नो पाँ हो छचामकिन ज़ यहूदीराए खार्ल प्राइँदा ज़ फीजिके।

येसुए उसिसरालाई ओपाँ सथैव ओरापरींव

(मर्कूस १६:१४-१८; लूका २४:३६-४६;
यूहन्ना २०:१६-२३; ओसाचीर १:६-८)

१६नकिन एघार जना येसुए उसिसर गालील खन्दल बाद येसुए है ओरादोव

दाँदात बाकेर। १७नड येसुस यादैसिउ प्राइँना ज़ उसिसर उखँत फुलुप्सिद धो दोकेर। तोबो नेब्लोए फरी, ‘आव ओल ज़ सैं माःक ओताव’ लिद जाँ यार्युँ ओमाहुप्ज़्याव। १८नाःत ज़ येसुए, “नाम नमलाव हक भरी परमेस्वरए डाकुइत ज़ याद नैनाव। १९ है जैद जे बाद प्राइँ जातलाव मिंरालाई डासिसर जैद डाबाबु परमेस्वरए उमिननी, डा ओज़ाए डामिननी, छैँव पुरूसए उमिननी सछैँद, २० डा जेलाई किताव किताव डापैचिउ, जे होरालाई मनी हितावनी ज़ यारापैच्यो। आव ब सैंच्यो, आव जुक ओमाखेमा पै डा जेस ज़ डातारिज़्या,” है यादोक्यो।